

**EIGHTH LEGISLATIVE ASSEMBLY OF MIZORAM  
(THIRD SESSION)**

**LIST OF BUSINESS**

FOR THIRD SITTING ON FRIDAY, THE 14<sup>th</sup> JUNE, 2019  
(Time 10:30 A.M. to 1:00 P.M. and 2:00 P.M. to 4:00 P.M.)

**QUESTIONS**

1. **Questions** entered in separate list to be asked and oral answers given.

**PRIVATE MEMBERS' BUSINESS**

2. \* **Resolutions**

**S.R. ZOKHUMA**  
Commissioner & Secretary

....

---

\* Please see Bulletin Part-II No. 58, dated the 12<sup>th</sup> June, 2019 for relative precedence of Private Members' Resolutions to be moved.

**S P E A K E R** : Mi chunga khawngaihna nei lo chu khawngaihna tel lovin rolrel sakin a awm ang; khawngaihna hi rorelna aiin a chungnung zawk a ni. Jakoba 2:13.

Vawiinah hian kan Chief Minister zahawm tak hi Delhi-ah thil pawimawhin tiin a chhukthla a, a absent a. Tin, Pu Tawnluia, Deputy Chief Minister zahawm tak chu kan hriat sa kha a ni a; tin, Pu Ngunlianchunga, member zahawm tak te an awm lo a ni. Tichuan kan House Leader chu member zahawm tak Dr. R.Lalthangliana a ni rih dawn a ni.

Zawhna leh chhannaah kan kal ang a, Starred Question No. 16- na zawt turin Pu F.Lalnunmawia, member zahawm tak i lo sawm ang.

**Pu F. LALNUNMAWIA** : Pu Speaker, ka lawm e. Hon'ble Minister zahawm tak School Education changtu chhan atan ka zawhna chu hei hi a ni.

School Education Department hnuiaia Primary School, Middle School leh High School building tlabal tak takte hi chei that tumna a awm em?

**S P E A K E R** : Chhang turin Minister zahawm tak Pu Lalchhandama Ralte i lo sawm ang.

**PU LALCHHANDAMA RALTE, MINISTER** : Pu Speaker, member zahawm tak Aizawl South III bialtu Professor F.Lalnunmawia zawhna chhanna chu :

Awm e. School Education Department hnuiaia Primary School, Middle School leh High School building tlabal tak takte hi chei that tum mek a ni.

**S P E A K E R** : Zawhbelhna zawhna neitu Pu F. Lalnunmawia i lo sawm ang.

**PU F.LALNUNMAWIA** : Pu Speaker, ka lawm e. Keini bial chhung mai bakah Mizoram hmun hrang hrangah hian school building te a tlabal hlawm hle mai a. Zirtirtu leh school naupang nu leh pa te pawh an mangang hlawm hle a ni. Zawhna kan dawng tam khawp mai a. Kum tam tak chhung, sorkar liamta chhung khan school building chei that lohte a tam hle a. Tunah hian ruah sur leh thli tleh phei chuan awm hleihtheih loh khawpa building chei

that loh a tam hle a ni. Ka bial chhunga building thenkhat phei chu a chung hi han en chho ila, a eng fur mai a ni. A eng chuai mai a, ruah sur ah phei chuan tawm khawm te a ngai thin a ni. Sorkar liamta, sorkar kalta khan Pu Speaker, Mizoramah ...Education kalpui a nih tur thu kha an sawi thin a, kan hre thin a. Mahse, kan thlen chin chu kan hre hlawm awm e. Mi beisei a pha lova, a bikin school zirtirtu indaihlo leh school building chhia tih vel hi ti ti lar em em, Zoram hmun tina ti ti a ni tih kan hre hlawm awm e.

Chuvang chuan Pu Speaker, a bik takin Elementary Education lamah hian kan building te, kan institution te chei a ngai hle a ni. Tunah hian kan Chief Minister zahawm tak Pu Zoramthanga sorkarah hian Minister zahawm tak a ngaihna hria kan han nei hi a thlamuan tlak hle in ka hria a. Ani ho hian heng kan building te hi kan chei that chhoh zel ka beisei a. Chu chu min tihsak tur pawhin ka ngen a.

Chutihrual chuan kan Minister pawh ka khawngaih khawp mai a. Kum tam tak building chei loh a lo nih tawh avang khan thawklekhkata han tih that pawh a har em em dawn a, a phur hi a rit hle ang tih chu ka ring a, ka khawngaih hle a ni. Eng pawh ni se, heng hmun hrang hranga school building hi min chei sak turin ka beisei a, chu chu ka han ngen a ni. Pu Speaker, ka lawm e.

**S P E A K E R :** Pu K.T. Rokhaw, member zahawm tak a phar hmasa ber a, i lo sawm ang.

**PU K.T. ROKHAW:** Pu Speaker, zawhbelhna, ka bial a bik takin Zawngling Govt. High School khi tunah hian teacher pakhat chauh an nei a. Teacher pakhat chauh tan zirtir ngaihna a awm loh avangin khawtlang V.C. leh NGO ten teacher pension tawh 2, a thlawnin hlawh nei lovin zitirtu tur in an ngen a. Tunah hian pension tawh 2 ten a thlawnin an zirtir mek a ni. Khi school khi a kal ve tawk tawk a ni a, chuvangin kan Minister zahawm tak hian a rang lamin zirtirtute hi min pe thei ang em tih ka zawt e.

**S P E A K E R :** Dr. Vanlaltanpuia ngawi rawh, i tih hmain, kan MLA zahawm tak takte Doctor te, Professor te an awm a, an mimal tlawmngaihna avangin an lo ziak lova, amaherawhchu a hnuah hian dilna ti mai ila, an nihna ang kha rawn sawi leh a ni a, Parliament-ah engkim dissolve fiah

vek a ni a, chuvang chuan House Member zahawm tak tak Professor te, Doctor te hi Doctor tiin kan lam tawh dawn a ni. Doctor Vanlaltanpuia.

**Dr. VANLALTANPUIA :** Pu Speaker, ka lawm e. Zawhbelhnaa ka pek duh chu kan zirna in thenkhatah hian Pupil Teacher ratio hi a lo danglam ta viau mai a, thenkhat chu naupang te nei tlem em em siin zirtirtu an awm teuh a; naupang an tamna-ah zirirtu an tlem leh em em thung a, zirtirtu nei meih lo te an awm bawk a.

Eng pawh ni se, kan institute thenkhat te hi suihfin-amalgamate tumna a awm em, khatiang ang zirtirtu indaihlo tak takte, khatiang naupang tlem lutuk te ang chi ho, a remchang dan anga suihfinna tur ang te kha a awm em? Tin, institutute thenkhat hi chu Mizoramah hian a changkang ve tawh em em a, hetiang te hi model institute ni tura han promote tumna te pawh a awm em tih ka zawt duh a.

Tin, India rama zirna in te endiktu ang chi National Accreditation Council kan tih ang chi hi kan rama zirna in te endik tu assessment leh accreditation ang te hi neih tum a ni ve em tih te ka zawt duh a.

Tin, a tawp berah chuan kan zirna in hi Pu Speaker, conventional takin tihdan phung pangngai ang hian a kal nasa ta a. Vawiina kan rama kan buaipui ber pakhat chu hna hmu thei zawng (job oriented) ang tein education hi kan kal pui lo em em tawh a, chuvang chuan kan zirna in revamp-na tur pawimawh tak atan hian job-oriented zawnga kal te, vocational courses pek ang te hi kan ti ve thei dawn em tih kha ka zawnha a ni e. Ka lawm e.

**S P E A K E R :** Chhang turin Minister kan sawm ang a. Tin, member zahawm takte kha zawnha 17-na, 19-na, 20-na, 28-na a la awm a, phar sa angah lo inngai mai rawh u. Tunah a zawttu in a zawt zau bawk a, Minister zahawm tak a chhan theih ang ang chhang turin i lo sawm ang.

**PU LALCHHANDAMA RALTE, MINISTER :** Pu Speaker, member zahawm tak Palak bialtu, Pu K.T. Rokhawa zawnha, Zawngling Govt. High School chungchang kha sorkar pawhin a hria a. Zirtirtu pakhat chauh an nei mek tih kha. Tunhnaiah pension-in a then an chhuak a. Model Code of Conduct-in min tihbuai avangin transfer & posting a tih theih mai si loh va. Tin, chumi piah lamah chuan Zawngling chhehvel hnaivaiah zirtirtu indaih deuh han pawh mai tur an awm em tih

te pawh Saiha lama kan hotute nen kan sawiho a. Helaiah hian ruahmanna awm thei ang ang te kan han buaipui a. Tin, department ang pawhin tunah hian High School zirtirtu kan indaihlo nasa em em a, 164 contract-a lak turin sorkarah pawh kan dil mek a. Chungte chu kan nghah lai a nih avangin tuna a han zawhna, harsatna an neih mek local arrangement-a an tih pawh kha sorkar-in kan hriat rukpui a. A remchan dan ang angin hei hi chu enfel chhoh zel kan tum e.

Tin, Lunglei North bialtu zahawm tak Dr. Vanlaltanpuia zawhna kha, PTR ang deuhin tun dinhmunah hian kan sikul thenkhat te hi a ratio han en pawha inmil lo deuhte pawh a lo awm a. Han sawikhawm tumna ang te kan nei thei em tih kha sorkar hian kawng hrang hrangin sawikhawm dan tur te pawh a duang a. Khaw tam tak, khaw lian deuhah hi chuan zirna in sawikhawm, amalgamation hi kan kalpui nual a. Tun chhoah pawh kan ti a, sikul tam tak hi kan sawikhawm chho mek a ni.

Tin, a zawhna dang lehah khan, sikul te hi a model deuh hlek kan nei thei em? Chutiang ruahmanna chu kan nei em? tih kha, kan theih ang tawk tawkin public school-ah pawh a model deuh hlek tur ang chi te, mipui te, a khawtlang, a hmangtu tak takte beiseina, duhna avangin public sikul pawh hi thenkhat chu English Medium-ah convert te an dil a. Hetiang hian kan tha zawk thei ang a tihna te a awm avangin chutiang tur atan chuan kan han tiin zirtirtu pawh hi hmun hran hran ami, chutianga hman tlak tur han pawh khawm deuhte pawh kan nei a. Tin, chumi piah lamah chuan SSA Mission hnuai atang hian model school pawh hi eng emaw zat kan siam a. Mizoram chhung hmun hrang hrangah hian model school tunah hian kan nei a. Naupang pawh chungah chuan kan beisei ang ngei leh model a nih angin admission pawh kan nei tha viau a ni.

Tin, a zawhna chhawng pakhat leh Sikul hi Accreditation Assessment mumal deuhin grading neih theih a ni em tih hi mimal ang tak pawhin hei hi kei pawhin ka vei khawp mai a. Tun hnaiah Department-in programme kan siam a, District hrang hrang te kan tlawh a. Kan han sawiho naah pawh College level-ah pawh NAAC (Peer Team) ten an tlawh a. Chumi ah chuan College accreditation dinhmun a pekah hian College ho pawh hi an tang sawt khawp mai a, hmuu theihin hmasawnna a awm a ni. School Education hnuaih kan sikul te pawh hi helam hawi zawng hian ruahmannate pawh hi la neih ve hi engtik hunah emaw chuan a la tul dawn a nih hi

tiin chu chu keimah ngei pawhin platform-ah pawh ka sawi a. Kan hotute nen pawh discussion-ah chuan kan sawi tawh a. Amaherawhchu sorkar ang a policy-a han neih a, “hetiang tak hian i kal ang aw” han tih chiah hi chu kan la nei lova. Ngaihtuah mek zingah a awm a ni.

Tin, a zaghna hnuhnung ber Job Vocational Oriented angin kalpui te pawh a theih lawm ni han tihte pawh hi, chutianga kalpuina chu tunah pawh hian kan nei mek a. Higher Secondary School 10 velah te pawh chutianga vocational anga kalpui te pawh chu kan nei a. Hei hi a theih chin chinah zau zawka kalpui kan tum mek e. Pu Speaker, ka lawm e.

**S P E A K E R** : Starred Question 17-na zawt turin member zahawm tak Pu Lalduhoma i lo sawm ang.

**PU LALDUHOMA** : Pu Speaker, School Education Department changtu minister zahawm tak chhan atan. “School hrang hrangah Nursery atangin Mizo tawng hman phal loh a ni tih hi Sorkar-in a hria em? Hemi chungchanga sorkar ngaihdan hi engnge?”

**S P E A K E R** : Chhang turin Minister zahawm tak Pu Lalchhandama Ralte i lo sawm ang.

**PU LALCHHANDAMA RALTE, MINISTER** : Pu Speaker, member zahawm tak Serchhip bialtu, Pu Lalduhoma zaghna chhanna chu hei hi a ni e.

(a) Govt. School English Medium-a leh (convert)-ah lo chuan Nursery atangin Mizo tawng hman phal loh a ni tih hi hriat a ni lo.

(b) Hemi chungchangah hian sorkar-in Govt. of India-in Education Policy thar a duan ngaihchan mek a ni.

**S P E A K E R** : Zawhbelhna zawt turin member zahawm tak Pu Lalduhoma i lo sawm ang.

**PU LALDUHOMA** : Pu Speaker, kan School tam takah hian sikul-a Mizo tawnga tawngte hi an hrem thin tih hi thu dik a ni a. Thangtharin kan thu leh hla an thiam loh sawt zia te, Mizo tawng chhiar te, ziate an thiam loh sawt ziate hi kan manganpui tawh a nih laia, kan tawng hmusit zawnga hetianga kan kal hian a dik

dawn em ni ka ti a. Kan House-a kan proceeding te ngei pawh hi correction atana min rawn thawn hian Mizo tawng ziak thiam kan mamawh zia chu a lang nghalin ka hria a. Chuvangin, 3 language formula kan tih ang chi, English leh keimahni mother-tongue leh Hindi te thiam kawp thei tura kalpui tumna hi a awm em? Awm se a tha zawk lo em ni? Keimahni Mizo tawng ziak dik thei tawh lo tunah pawh whatsapp-ah pawh hian dik lo hi a tam ber a ni tawh zawk a. Hetiang hi kan kalpui zel dawn chuan a tha dawnin a lang lova. Chuvang chuan a pathuma thiam theih dan kawng hawi zawnga kalpui theih dan hi a awm em? Chutiang chuan ngaihtuahna sen a ni em tih ka zawt e.

**S P E A K E R :** Pu Lalrintluanga Sailo. Ka'n tih pawlh deuh hlek ang e.

**P U L A L R I N T L U A N G A S A I L O :** Pu Speaker, ka lawm e. Ka zighthna chu hei hi a ni e. Zawhbelhna ah khan kan sorkar thar hian sorkar hmasa hun laia a bik taka Dampa MLA constituency huam chhunga zirtirtu 8 aikal la te, an lak chhanah tawng inpawh loh vang a ni tih hi a hria em tih ka zawt duh a.

**P U L A L R I N T L U A N G A S A I L O :** A pahnihnaah chuan kan bialah khuan Chakma tam tak an awm a, khaw 5 lai a awm a. Chutah chuan zirna school te pawh a awm ve neuh neuh a ni. Amaherawhchu Mizo tawng subject an zir mumal lo a, chuvang chuan kan in communicate thei lo a. Tin, chubakah hnam leh hnam inkarah hian naupangin Mizo tawng an thiam loh na na chuan harsatna tam tak a awm a, an lo puitling a, kha zel kha a kalphung a ni a. Chuvangin he kan sorkar thar, a bik takin Education Minister zahawm tak hian he Chakma area huam chhungah hian zirtirtu, Mizo subject zirtir theitu min pe thei ang em tih ka zawt e.

**S P E A K E R :** Chakma sawi lai a ni bawk a Dr. BD Chakma a phar hmasa ber e.

**D r . B D C H A K M A :** Pu Speaker, ka lawm e. Ka zighthna chu Mizo thalaite chu Hindi tawng an thiam loh vangin harsatna an tawk thin a. Chuvangin Hindi tawng hi tha taka an thiam ve theih nan Hindi School, term hmasaah pawh 1305 rawih niin anmahni chu ban vek tawh an ni a. Chuvangin tun sorkar atangin heng hi appoint turin hmalakna tunhnaiah a awm em ? Tin, zawhbelhna pahnihna chu High school thenkhatah hian school zirtirtu hi an indaihlo nasa lutuk a. Borapansuri- ah hian Mathematics zirtirtu hi pakhat chiah a awm a, kha khan health chhuanlamin voluntary pension a dil a. Kha kha voluntary pension-a a kal loh nan

hon'ble Minister hnenah lehkha pawh ka rawn ziak tawh a. Kha kha eng nge a tun dinhmun ? Ka lawm e, Pu Speaker.

**SPEAKER :** Pathum kan kim leh ta a, chhang leh phawt se, No. 19-na leh 20-na te a la awm a nia. Minister zahawm tak Pu Lalchhandama Ralte a theih ang ang chhang turin i lo sawm leh ang.

**PU LALCHHANDAMA RALTE, MINISTER :** Pu Speaker, zawhna neitu member zahawm tak Pu Lalduhoma zawhnaah khan Mizo tawng hmangte hrem an ni tih khawilai school emaw a sawi kha, ni e, tlangkamah te pawh hian kan hre ve leh thin a. English uar duh deuhna avanga an han tihte pawh hi a awm a. A tlangpuiin heng hi private institution-ah a ni tlangpui a. A lan danah chuan public school kan tih sorkar-in kan enkawlah hi chuan chutiang taka khawng taka insist-na kan nei hrarpa lo a ni tih ka sawi duh a. Tin, three language formula kha hman theih a ni dawn em tih kha a takin tunah hian helai chungchang hi chu kan hmang mek a. Amaherawhchu, kan beisei leh kan duh ang hi chu kan la achieve tawk lo deuh pawh a ni mai thei a ni. Tin, a bik takin tunah hian draft stage-ah National Education Policy 2019 hi Delhi-ah HRD Ministry-in a draft a rawn ti chhuak tawh a. Chumi ah chuan tuna kan han sawi ang deuh hian primary level-ah class I – class V-ah hian mother tongue hi hmang uar zual tura rawn tihna ang chi hi chu draft-ah chuan a awm mek a. Amaherawhchu, draft stage a la ni a. Helaia tuna MLA zahawm takin a rawn zawhna pawh hi uar zawka naupangten an mother tongue/Mizo tawng uar zawka an hman theihna turin elementary-ah a bik takin primary section-ah hian bul te pawh kan tan chhoh leh te pawh ka beisei a ni.

Tin, Dampa bialtu zahawm tak Pu Rintluanga Sailo-in a rawn zawhna, “Dampa MLA constituency-ah hian zirtirtu 8 ngawt mai tawng inpawh tawk loh avanga aikal la an awm hi sorkar-in a hria em tih hi official taka sorkar file-ah chutiang angin tawng inpawh lohna avangin tih tak hi chu keimah tak hi chuan ka la hmu lo a. Amaherawhchu, MLA-te nena han sawihonaah hian Chakma tamna ah khuan Bengali medium te a lo awm avangin zirtirtu thenkhat kan nula tlangvalten Bengali an thiam si loh avanga an post-a awm hleithei lo, Bengali zirtir thei an nih si loh avangin an aikalah tualchhung, local-te nen insiamremin tualchhung mi han la te chu an awm a ni awm e an ti a. Kawng danga aikal lak kan han ti a, kan strick viau

dawn lain khulai bik khu an harsatna kha tawng chungchang a nih avangin chu lai chu kan dinhmun a ni.

Tin, Chakma zingah Mizo tawng zirtirtu tur kan pe thei ang em tih pawh hi kan lo en zui dawn nia tiin hei hi kan in hriattir nghal ni se. Tin, Tuichawng bialtu MLA zahawm tak Dr BD Chakma zawhna, tawng chungchangah a bik takin Hindi-a kan harsatna chungchang a rawn sawi Hindi zirtirtute kha engtin nge kan tih chhunzawm dawn a tih kha. Kan hriat angin kum 2017-ah khan Hindi zirtirtu 1305 te ban tir/chawlh tir an ni a. Amaherawhchu ban tih hi a policy a tawp a ni, khalai bika kan rawihna te kha. A policy a tawp avanga bang an ni a. Chumi chuan nghawng nasa tak a nei a. Kan rama zirna in tam taka Hindi zirtirtu nei thin khan tunah hian 40% velah hian Hindi zirtirtu kan school-ah hian kan nei tawh lo a ni. Chumi harsatna chu keini Ministry-ah kan awm hlim pawhin theihpatawpin hma kan la a. Kan Chief Minister te, kan senior Minister Dr R Lalhangliana te pawh hian HRD Minister te pawh a lo sawipui a. Tin, kei ngei pawhin HRD Ministry ah te chungte pawh chu zuk sawiin Ministry thar tuna HRD Minister lakluh thar hnenah pawh hian DO letter-in Hindi zirtirtu 1305 kan chawlh tir tak avanga kan rama Hindi-a kan hniamna hi min en felsak leh ngaihtuahna/consideration thar min pe tura ngenna pawh amah hmaichhana kan inhmuh hma pawhin ka thawn lawk tawh a ni tih kha ka chhanna ni ta se.

Tin, Borapansuri High school zirtirtu Mathematics teacher voluntary rawn dil chungchang pawmsak rih loh ni se tih kha MLA zahawm tak hian min rawn pe a, kha kha kan lo hre reng a. Nakinah hemi chungchang hi a lo thlen hunah kan lo en zui ang a. Tin, High School zirtirtu Mathematics kan indaihlo a tih pawh kha keini department pawhin kan pawm khawp a. Mathematics zirtirtu ah hian B.Sc Mathematics + B.Ed nih kher a ngaih avangin Mathematics teacher nei lo te kan han inpek dawn pawh hian, “RMSA huang atanga engage theih kan nei em, han zawng mai teh u” kan tih pawhin, a khawho an lo kal pawh hian, RTE-in a phut anga qualified B.Sc Mathematics + B.Ed awl hmuh tur hi an vang rih khawp mai a. Chu chu tuna kan problem lai mek chu a ni e, Pu Speaker.

**SPEAKER :** Zawhna dangah kan kal ang a. Starred Question No. 18-na zawt turin member zahawm tak Pu K.T. Rokhaw i lo sawm ang.

**PU K.T. ROKHAW** : Pu Speaker, Starred Question No. 18-na GAD Minister chhan atan – Tipa Sub-Division-ah hian SDO Sadar tih in ziak hi Civil tur a ni e, dah tumna a awm em tih ka zawt e.

**SPEAKER** : Kan hriat angin a changtu kan Chief Minister zahawm tak a awm loh avangin, a ai Dr. R. Lalthangliana a awhtir a, hemi hi chhang turin i lo sawm ang.

**Dr. R. LALTHANGLIANA, MINISTER** : Pu Speaker, member zahawm tak Pu K.T. Rokhaw zawhna kha Civil SDO tih khan tun maiah khan a rawn thlak a, a dik a. SDO Sadar thuthmun tak hi chu DC office, Siaha-ah a ni a, chuvang chuan Sub-Division office-ah hi chuan Civil SDO kan tih thin hi post thin a ni a. Tunah hian Tuipang SDO Civil-ah hian MCS Senior Grade Officer an post mek a ni.

**SPEAKER** : Zawhbelhna. Zawhna neitu member zahawm tak Pu K.T. Rokhaw i lo sawm ang.

**PU K.T. ROKHAW** : Pu Speaker, ka zawhbelhna. Tipa Sub-Division hi kum 1998 khan Sub-Division atan puan a ni a. SDO Civil hi kum khat, 2002 leh 2003 inkar khan Pu L.R. Zawna dah a ni a. Chumi atang chuan BDO hi an kawp tir thin a. SDO Civil a hrana dah a nih khan Tipa mipuite an lawm em em a, mahse vawiin thleng hian SDO Civil hi dah a ni tawh lova, BDO kawptir a ni a. Chuvangin, kan sorkar chak tak hian SDO Civil hi a rang lamin min dahsak thei ang em tih ka zawt e.

**SPEAKER** : Zawhbelhna zawt turin member zahawm tak Pu H. Biakzauva i lo sawm ang.

**PU H. BIAKZAUVA** : Pu Speaker, ka lawm e. Ka zawhbelhna chu a concerned Minister tak kha awm lo mahse a aiawh khan tha takin min chhan theih tho ka ring ; a inang khawp mai a, Pu K.T. Rokhaw zawhna nen khan. Sangau Civil Sub-Division hi hawn a nih atanga vawiin thlengin SDO dah a la ni lova, BDO-in charge a la thin a, BDO junior te te te an awm thin a. Chu chuan SDO charge kha a va la thin a, thil inhmeh lo tak niin ka hria a. SDO dah se, BDO charge la tel se a awmin ka hria a. A hniam zawk khan a sang zawk daih charge an lak phak loh tur

kha an laktir thin tlat mai a. Pu Speaker, SDO Civil pangngai hi Sangau hmunah hian dah theih a ni ang em tih ka zawhbelh a ni. Ka lawm e.

**SPEAKER** : Kan hriat angin, kum dangah leh tunhmain Minister concern a awm lohin zawhbelhna kan la ngai lova, tunah hi chuan kan la dawn kan tih kha kan ti tak tak ta a. Amaherawhchu, a awm loh avanga har deuh deuh chhut nek kha a awm ve thei a nia. A pathumna atan member zahawm tak Pu Zodintluanga i lo sawm ang.

**PU ZODINTLUANGA** : Pu Speaker, ka lawm e. Ka zawhna tur hi a changtu Minister awm lo mahsela a hre ber tur tho a niin ka hria a. Nimin Budget Session-ah khan Hnahthial te, Khawzawl te, Saitual te District siamna tur pawisa kan dah thu te kan hria a. Ka zawhna chu Hnahthial, Saitual, Khawzawl District thar lo piang turah hian boundary tihfelna tura sorkar-in an hmalak tawhna te min hrilh thei em tih a ni a. Tin, pahnihnaah chuan thla eng zat chhungin nge District boundary hi tifel thei tura sorkar a inruahman tih a ni e.

**SPEAKER** : Aw le, kha kha kan duh tawk rih ang a. Kan sawi ang khan a changtu Minister a awm lo a, a chhan theih ang ang rawn chhang se. Tin, zawhna hnuhnung ber phei kha chu vawiina Private Members' Resolution-ah hian kan chai dawn a ni. Le, tunah chhang turin Dr. R. Lalthanglina i lo sawm ang, a theih ang ang, a theih chin chin chhang turin.

**Dr. R. LALTHANGLINA, MINISTER** : Pu Speaker, a zawhna kengtu ber Pu K.T. Rokhaw zawhna kha a pawimawh khawp mai a. BDO-ten an kawp hi chu a nih dan tur chu a ni lo a ni. Hei hi sorkar pawhin a hria a, sorkar hmasa hunlaiah te pawh khan eng eng emaw hmalakna an nei a, mahse vawiin tleng hian kawp tir an la ni a. Kan sorkar hi kan hriat angin kan la kal rei lo khawp mai a. Chuvang chuan District Reorganization Committee-in recommend-na a siamah khan heng Civil SDO, Sub-Division kan tih ang chi te hi a take care tel a, kum 2017 khan hma lo lak tawhna ang chi thil a awm a. Amaherawhchu, a nih dan tur dik takin khang Civil SDO-te kha an awmhmunah a hrangin, BDO ten kawp lova tih tumna awm mahse tihfel a la ni lo a. Kan Chief Minister zahawm tak chan a ni nachungin ngaiantuahna sorkar-in a seng turah chuan beisei ila a that ka ring a.

Pu Biakzauva, Member zahawm takin a zighthna kha vawiina zighthna hnung lam deuahah hian a awm a, kan thleng loveng tih a hlau nge a rawn zawl lawk ang deuh khan a ngaih theih deuh a. Sangau saw a buaithlak khawp mai. Kei pawh nikum hmasa khan ka va kal a. (**SPEAKER** : A vei ngang a ni ang e) Tuipang kan tih ang deuh hlek tho khan harsatna an lo nei a. Anni phei chu harsatna satliah mai pawh a ni lova, quarters leh office hrim hrim kha a rawp chhe vek a, chutiang khawp chuan harsatna lian tak an tawk a. Chuvang chuan tuna ka chhan Tuipang, Tipa kan tih tak khami case nen khan a inang a ni tih kha ka chhanna ni se. Sorkar thar, tuna bul tan chho mek hian a ngaipawimawh khawp mai. Kan Civil SDO-te thuthmun lai hi, Civil SDO hmun dang kha chu ka hre chiah lova. Amaherawhchu, Pu Biakzauva'n a han zighthna bik lai Sangau-ah hi chuan hmalakna tur ruahmanna tunhnaiah pawh hian kan nei chho dawn a. Entiran, Civil SDO office sakna tur atan pawisa te pawh ruahmanna neih a ni a. Tin, renovations ti mai ila, eng emaw repair leh siamthat ngai ang chi atan te pawh sum dah a ni dawnin ka hria a.

**Dr.R.LALTHANGLIANA, MINISTER** : Tin, heng bakah hian quarter tihna tur ang te pawh ruahmanna an nei dawn niin ka hria a. Amaherawhchu hei hi Finance lama mumal zawka la enfel ngai tur chi ah ka ngai a ni.

Member zahawm tak Pu Zodintluanga zighthna, District thar tur boundary tih chungchang kha chu ni e, hemi zighthah hian private member resolution ah khan a chhuak ang a. Eng pawh ni se, khalaiah khan thil engmah final a la awm thei lo a. Sorkar-in ngun takin a la ngaihtuah chhunzawm turah ngai ila, a hun leh ni leh thla, a peih chhuah hun tur ang chi pawh kha ka chhang thei lo ni ta phawt se. Amaherawhchu District hi vawiina resolution-a kan sawiho tur zing ami kha a ni a. Nakinah sawi belh ngaite a awm a nih chuan kan la sawi belh zel turah ngai ta ila tih kha ka chhan theih ni mai se. Hma chu kan la chho mek e, tunah hian DC office te leh a bik takin kan District 3 ah hian Treasury-ah te pawh post creation te kan ti tawh a. Tin, DC set up atana post creation ngai ang chi te pawh tunah hian hma lak a ni.

**PU ZODINTLUANGA** : Pu Speaker, ka zighthna lai kha chu boundary chungchang hma lakna lai kha a ni a, hmalakna a awmlo a nih chuan kan hrethiam tho a.

**Dr.R.LALTHANGLIANA, MINISTER :** A boundary laiah pawh khan sorkar in ngaihtuahna kan seng mek a ni tih kha ka chhanna a ni. Specific taka han zawha engtik hunah nge tih lai kha a la chhan theih loh tih mai a ni e. Ka lawm e.

**SPEAKER :** A chiang e. Starred Question 19-naah kan kal ang a, zawt turin member zahawm tak Pu Vanlalhlana ilo sawm ang.

**Pu VANLALHLANA :** Starred question 19-na Minister zahawm tak School Education Department changtu chhan atana ka zawhna chu –

- a) Zirtitru 946 lak turah hian vohbikte ( PwD) lak tumna a awm em?
- b) Awm ni se eng zat nge an tan hausak an nih?

**SPEAKER :** Chhang turin Minister zahawm tak Pu Lalchhandama Ralte i lo sawm ang.

**PU LALCHHANDAMA RALTE, MINISTER :** Pu Speaker, member zahawm tak Aizawl North I bialtu Pu Vanlalhlana zawhna chhanna chu –

- a) Awm e.
- b) PWD-in reservation an phut angin 4% hauh sak an ni ang.

**SPEAKER :** Zawhbelhna zawt turin Pu Andrew H.Thangliana i lo sawm ang, a rei tawh em mai.

**Pu ANDREW H.THANGLIANA :** Pu Speaker, ka lawm e, Zirtirtu lak chungchanga TED kan tih te, D.El.Ed paltlang ngei, tuna RMSA, SSA integrated kan tih lo thawk tawh ten tuna contract teacher lak kan tum ah hian luh zawk duhin application thehlut se, luh theih dan kawng a awm em tih kha ka zawhna a ni a.

Tlem han sawi belh lawk ka duh chu SSA, RMSA integrated chungchangah hlawh kan ba tur a ni lo tih rilru pu Minister kan nei a, a vanneihthlak em em a. Chutih mek laiin SSA leh RMSA zirtirtute dinhmun derthawn theih dan zawk hi ania ka sawi duh chu. An pay chungchangah hian in appraisal a lo pek tawhte leh intervention hrang hrang avanga tuna state-in pawisa, kan matching share bak kan chawi hi a tam hle a ni tih kan hriat ka ring a. Hei hi nakinah state matching share bak hi chu kan pe thei tawh lo ang tih dante hi lo awm palh ta se an dinhmun hi a derthawng thei dawna hriatna ka nei a. Chumiah chuan nichina ka zawhna tho, tuna

zirtirtu lak belh kan sawi mekah hian SSA ziritirtute ho hi incorporate dan a awm ang em tih lai kha ka zawhna a ni e.

**SPEAKER :** Member zahawm tak Dr. Thiamsanga i lo sawm ang.

**Dr.THIAMSANGA :** Pu Speaker, ka lawm e. Sorkar hmasa kum 10 chhung khan World Class Education Mizoramah kan siam ang tih kha a ni a. Amaherawhchu kan hriat ang khan kan building dinhmun te, school hi luah tlak loh khawpa far, awng fer fur tih te a tam mai a. Kum 10 chhung khan kan sorkar khanin eng hi nge maw a lo tih le tih te pawh hi ni e, han zawh mai theih te pawh a ni a. Amaherawhchu theihtawp an chhuah a, a lawmawm khawp a. Tichuan, zirtirtu chungchangate pawh indaihlo reng rengin a then phei chu school 15 vel laiah zirtirtute kha an lo awmlo a ni a. Chu chu theihtawpin kan Chief Minister zahawm tak Pu Zoramthanga sorkar a lo piang a, Education Minister chak tak kan han nei bawk a. Zirtirtute pawh thahnem tak min han laksak a, tunah hian MR teacher 946 lai lak an han ruahman thei ta mai pawh hi a lawmawm hlein ka hria a. Hei hi kumin chhung hian min laksak thei ang em tih hi Pu Speaker, ka rawn zawt a ni e. Ka lawm e.

**SPEAKER :** Tunah chuan pathum kan kim leh tawh a, a dawt leh a awm a, nichina phar te khan phar sa ah in ngai lo ula, rawn phar nawn ula, Pu K.Pachhunga te, Dr.Vanlalthlana te; tunah chuan a pathum nan Pu C. Lalsawivunga, member zahawm tak ilo sawm ang.

**Pu C.LALSAWIVUNGA :** Pu Speaker, ka lawm e. Zirtirtu lak thar chungchanga kan thu hriat a theih chin chin ah khaw mite duhsak an ni ang tih hi tih hlawhtlin ngei theih a ni ang em tih kha ka zawhna hmasa a ni a. Pahnihna-ah chuan Government Bethlehem Vengthlang High School-ah khuan Mathematics teacher kan indaihlo a, Mathematics zirtirtu bik atana lak hi engineer a nih avangin office lamah an la chho a, chuvangin Mathematics-ah hian zirtirtu indaihlohna a nasa a. A hmun dik tak Government Bethlehem Vengthlang High School-ah hian Mathematics zirtirtu atana lak a nih angin min dah let sak thei ang em tih kha ka zawhna a ni e.

S P E A K E R : Chhang turin Minister zahawm tak Pu Lalchhandama Ralte i lo sawm ang. A theih chin chin chhang turin.

**Pu LALCHHANDAMA RALTE. MINISTER :** Pu Speaker, ka lawm e. Tuirial bialtu zahawm tak Pu Andrew-a zawhna Sorkar-in zirtirtu la tura ruahmann a siam mekah hian SSA zirtirtute incorporate theih a ni ang em tih kha advertisement pawh kan la chhuah chiah lo a, open advertisement tur a ni a. Anmahniin an duh a an dil a nih loh chuan an tana chutiang, khatiang tiha reservation han siam bil kha neih kan tum chiah lo a. A duh apiangte, tuna Aizawl South I bialtuin a zawhna ang deuh khan, kan rilru kaihruaitu lian ber a khaw mi an awm chuan tih kha lian tak a awm tel avangin incorporate a han tih kha chu a remchang ber chiah lo a ni tih kha ka chhanna ni mai sela.

Dr. Thiamsanga, Champhai North bialtu MLA zahawm takin a zawhna M/R teacher lak tur te hi engtikah nge ? Kumin chhung hian lak theih ngei kan beisei em a tih kha, kumin chhunga lak ngei tumin Department-in theihpatawpin hma kan la a. Tunah hian tih fel ngai tlem te a la awm a. Zep lovin han sawi ta ila, M/R teacher a nih avangin a tan tira la tura kan han inruahmanah Person With Disability Commissioner, Mizoram te pawh kan han be rawn a. An tan hian reservation tih hi a tul dawn nge dawn lo, M/R basis-ah hian kan ti a. Amaherawhchu a tirah khan hei hi compulsory a nih leh nih loh chiah kha an hriat loh avangin anmahni tan khan reservation kha kan han siam lo dawn zet a. Delhi lama hotute nen an han in biak rawn leh khan M/R pawh ni se reservation hi siam ngei a ngai e, an rawn tih leh si avangin PWD pual atan reservation kan han neih leh avangin, office paltlang ngai leh thil tam tak te a awm a. Chu chuan eng emaw harsatna dang a kaihhnawih dang te nen a neih avangin kan beisei leh duh anga chak in kan kalpui hlei thei lo va. A rang thei anga tih ngei chu kan tum e.

Tin, Pu C.Lalsawivunga, Aizawl South I bialtu zahawm takin a zawhna, a theih chinah a khaw mi lak theih a ni ang em tih kha, hei hi theih ngei tura ruahmann a theih chin chinah kan ti a. A theih ngang lo pawhin a khaw hnaivai kan la ti a. Chumi piah lama la awm fo chu ‘mahni thawh duhna district-ah dil tur’ tih telh kan la tum a ni. District tinah hian a remchan phawt chuan DPC hi district level anga siam a, DP&AR aiawh te pawhin a hmunah kal chilh se, Aizawl-a centralize loa district-ah lak a, chutianga tih ngei chu a tha ang a, kan ti a. Helaia centralize-a

kan tih vak hian khawilaiah emaw appointment an hmu a, rei lo teah Aizawl-a awm leh kan dil fur thin a. Thingtlang lamah zirtirtu harsatna kan neih avangin district level-ah chinfela tih hian kan mamawh chhanna hi kan hmu hnai vai thei zawk ang tih ngaihtuahna nen chu chu kan kalpui mek a ni.

Tin, Govt. Bethlehem H/S Mathematics teacher chungchang hi a bialtu MLA zahawm tak pawh hi hmaichhanah amah pawh lo kalin min rawn sawipui tawh a. Ni e, keimahni department indaihlohma leh engineering lamah thuam chak kan ngai a, hnaruak hnawh khah theih mai loh avangin. Mithiam bik a nih avangin office lamah kan lo hawsak a ni. Hei hi engtin emaw siam rem dan tur a awm dawn em tih te chu House zahawm takah a sawi chhuak bawk a, kan lo en zui dawn nia.

**S P E A K E R :** Tunah Starred Question No. 20-naah kan kal leh ang a, zawt turin member zahawm tak Pu Nihar Kanti Chakma i lo sawm ang.

Pu NIHAR KANTI CHAKMA : Pu Speaker, Starred Question No. 20-na, School Education Minister zahawm tak chhan atan –

- (a) Tlabung Higher Secondary School saw engtikah nge upgrade a nih ve theih ang?
- (b) Tun hnaiah upgrade tumna a awm em?

**S P E A K E R :** Chhang turin Minister zahawm tak Pu Lalchhandama Ralte i lo sawm ang.

**Pu LALCHHANDAMA RALTE, MINISTER :** Pu Speaker, ka lawm e. Member zahawm tak Pu Nihar Kanti Chakma, West Tuipui constituency MLA zawhna chhanna chu –

- (a) Tlabung Higher Secondary School upgrade theih hun tur hi hriat theih a la ni rih lo.
- (b) Awm rih lo a ni e.

**S P E A K E R :** Zawhna neitu, Pu Nihar Kanti Chakma i lo sawm ang.

**Pu NIHAR KANTI CHAKMA :** Pu Speaker, ka lawm e. Kan hre vek a, ka bial hi educationally-in kan backward nasa khawp mai a. Ka bial pumpuiah

Higher Secondary awmna chhun a ni a. Kumin phei chu result hi a tha em em mai a 100% an pass a ni. He school hi mipui thawhkhawm in kan enkawl hram hram a ni a. Nikumah sorkar hmasa in lumpsum grant in min hlangkai a. Chu chu tun sorkarah upgrade a theih loh pawh in lumpsum grant pawisa min pek thin kha min tih pun belh thei ang em tih ka zawt e.

**SPEAKER :** Pu Dr. K. Pachhunga zawhbelhna zawt turin i lo sawm ang.

**Pu K. PACHHUNGA :** Pu Speaker, ka lawm e. Ka zawh duh hi tlemin ka han sawifiah deuh ang a. Zirna hi a pawimawh zia kan hre vek a, zirna avanga tun dinhmun thleng kan ni a. Nimahsela vawiinah ka rawn en a, kan society te, kan sorkar hnathawkte leh mipui kan en hian hman kan ang ta lo deuh a. Sorkar hian zirtirtu quality maintain tuai thar lehna policy eng emaw tih tumna nei se ka duh a. Tin, Mizo culture & tradition te hi a bo loh nan school-ah activities a neihpui leh thei ang em tih kha ka zighthna ni se. Chutihlai chuan, family life kan lost deuh tan a. Hmun hrang hrangah lehkha kan zir a, chhungkaw hlutna, Mizoram ram leh hnam hmangaihnate pawh kan lo tlachham ta a. Lehkhathiam tak tak mahni ram leh veng leh khua hmangaih miah lo, sum ringawt buaipui kan lo tam ta a. Education atanga siamthat leh ngaiin ka hria a. Tin zirtirtu quality kan maintain loh avangin naupangah, society-ah a result a rawn chhuak a. Heng rukrukna te, thatchhiatna te zawng zawng hi zirtirtu quality-in han in train leh ta ila, zirtirtu T-shirt ha hniang hnuang bal tak tak kan tam ta lutuk te, dress code thlengin insiamthat leh hi chu a ngai tak zetin ka hria a ni.

Tin, building chungchang kha han sawi leh ta ila. Ka bial chhung Lunglei ‘S’-ah pawh kum 6 deuh thaw ka vak kual a. Fiamthu-a kan sawi angin naupang tan school kal chakawm loh khawpin building a chhia a, thlahrang awmna ni awm tak tak a ni. Chuvang chuan kan sorkar hian, Education Minister pawh a phur a ritin ka ring a, sorkar ang pawhin thingtlang school building te hma la leh turin theihtawp chhuah turin ka ngen bawk a.

Chutih lai chuan ka zighthna 2-na ah chuan Transfer and Posting hi bialtu tan pawh a buaithlak lutuk a. School Education hian Rules khawng ve deuh hlek hi nei ta ula, a hman hman mahni venga awm theuh kan tum hi chu a dik lo a. Kum 3 a awm chuan, kum 3 post ah khatiang khan train tha ila, politician tan pawh, bialtu tan pawh a hahdamthlak ka ring e. Ka lawm e.

**SPEAKER :** Dr. Vanlalthlana i lo sawm ang.

**Dr. VANLALTHLANA :** Pu Speaker, ka lawm e. Budget kan hmu a, Education-ah sum tam tak dah a ni a, a lawmawmin a phurawm khawp mai a. Tin, kan Minister hnenah hian ka bial chhunga thil harsatna te ka'n thlen a, rang takin hma te min laksak a, lawmthu ka hrilh hmasa duh a. National Achievement Survey 2017 MHRD central lamin Class-3, 5 leh 8-te zirchianna an neih ah khan India ram pumpui ah zawhna inang school naupangho an zaws a. Khatah khan pawl 3-ah chuan national level average kha kan pha a, kan ti tha a. Class-5 atangin kan pha ta lo tan a, class-8 ah phei chuan kan pha lo viau a, Mathematics ah phei chuan kan hnufum viau a ni. Sorkar hian he thil hi a hria em? Engtinne he harsatna hi tackle a tum tih ka zaws duh a.

Tin, ka'n sawi hlek duh a, DIET-a zirtirtu pakhat hian training an pek tumin a rei deuh hlek tawh a, zirtirtu ABC pawh ziak chhuak thei lo kan training tir a ti a. Chu chu kan fate zirtirtu te an ni a. Tin, ka hmelhriat tak pakhat chu zirtirtu lak dawnin expert-ah koh a ni a, amah hmun hla tak atangin a kal a. Amaherawhchu interview Chairman ber khan list a lo nei sa a, hla tak atangin ka kal a, ka thiamna ka hman theih dawn loh chuan ka haw mai ang a ti a, haw a tum a, Chairman kha a buai viau nghe nghe a ni tih kha a hria a, amah ngeiin a sawi a.

Chuvang chuan tuna zirtirtu tak tur ah hian Hnam Run list-te, District Headquarter list tih te, Block list emaw, Unit list tih hi a awm lo ang tih hi min tiam thei ang em ka rawn ti a ni.

**SPEAKER :** Le, phar an tam a. Education hi a pawimawh si a. Aizawl, South-II bialtu zahawm tak Pu Lalchhuanthanga i sawm lawk teh ang.

**PU LALCHHUANTHANGA :** Pu Speaker, ka lawm e. Ka bial chhungah Sikulsen leh Sikulpuite hi Synod kuta hlan a ni a. Hei hi eng condition-a hlan nge a nih? Zirtirtute hi engtin nge an awm zel dawn tih leh zirlai ten free education te leh free text-books te hi an la dawng thei zel dawn em?

**SPEAKER :** Education-ah kan in concentrate lutuk a, Agriculture kan thleng hman dawn lo. A theih theih chhang turin Minister zahawm tak i lo sawm ang.

**PU LALCHHANDAMA RALTE :** Pu Speaker, ka lawm e. Education min tuipui tlang hi ka lawm a, demand sawi hunah pawh nasa leh zualin kan ti tlang turah ngai ila, a lawmawm khawp mai. Ka thahnemngaih luatah kan House Leader hi awm se chu ka ti leh zual a. Mamawhna in han sawi zawng zawng kha kan House Leader-in min han hriatpui phei se chuan a tha awm mang e te ka lo ti a.

Member zahawm tak zighthna neitu Pu Nihar-a'n a rawn sawi Higher Secondary School anmahni biala awm kha a sawi ang khan nikum Oct. ni 5-ah khan upgrade an ni a. Lump sum ah khan private atangin dah an ni. Chu chu a kal leh na tur, a next step hi chu ADHOC recurring grant-in-aid tur a ni a. Mahse kalkawngah hian tih tur tam tak a la awm avangin khalaia chhanna kan pekah pawh khan upgrade tumna a awm rih lo kan tih kha ani pawhin a hrethiam hlein ka hria a.

Chutih rual chuan, Lump sum-a sikul awm-te tanpuina hi tihpun theih a ni ang em a tih kha hun hmasa lamah khan Higher Secondary School-te hi kum khatah nuai khat leh singnga pek an ni a. Kumin atang hian sorkar thar hian Higher Secondary hi nuai 3-ah kan pun tawh zawk a ni. Tun tumah khan nuai 3 kan pe zawk a ni. Chu chu ka hriattir duh nghal a. Kha kha a zighthna lai chhanna ni in ka hria a.

Tin, Lunglei ‘S’ bialtu zahawm tak Dr. K. Pachhunga zighthna leh thahnemngaihna a han sawi lai te pawh kha han react tel ta ila. Kan sikul-ah hian kan culture-te a bo lohna tur atan te; tin, social life hrim hrim ah pawh, ram hmangaih chungchangah pawh inzirtir tharna neih tel deuh hi a tha lawm ni tih pawh kha, keimahniah pawh academic authority SCERT-ah te pawh programme kan hman tum pawhin helai chungchang hi kan lo sawi tawh a. Kan text-books revise leh hun turah pawh helam hawi zawng te hi a theih chin chinah thun belh deuh deuh dan zawn ni se kan ti a. Chutiang chuan a thuphung chuan tuna i han vei lai pawh kha academic authority-te pawh kan lo sawipui tawh a ni. Dress code chungchang te leh thil dangte pawh kha i thahnemngaihna kha a theih chin chinah kan lo um zui dawn e.

Tin, Transfer & Posting Rules neih chungchang a rawn sawi pawh kha ni e, tunhma khan Transfer and Posting Rules hi duan a ni a. Amaherawchu, hman dawn khan a hman hleih theih loh avangin ‘kept in abeyance’ a dah reng a ni a.

Chu chu Ministry thar kan han kal a, kan han awm hian ngaih pawimawh leh hna hmasa ah Transfer and Posting Rules pawh hi kan han nei chhunzawm a. Official-ho te nen te kan sawi khawm a, kan dan neih sa te en that ngai lai te kan han en a. A duangtu tur deuh leh lo enzuitu tur te kan in siam a, chu pawh chu kan review leh tawh a. Tah chuan kan han en kan han en na ah keimahni pawhin siam rem ngai lai awm te pawh kan la nei niin kan hriat avangin tun thla (June thla) chhung hi kan official-te, a thiam bik te pawh siam rem ngai lai kan tih te lo siam rem a, lo khawr pum turin leh zawh hram tum ni se te kan in ti a, Chutiang chuan kan lo buaipui mek e.

Tin, Dr Vanlalthlana, Aizawl North II bialtu zahawm takin a rawn sawi, National Achievement Survey of India-in a han enah khan class 3,5, leh 8-ah te kan tlahniam, class 3-ah chuan national standard kan pha, 5 leh 8-ahte chuan kan tlahniam a tih kha Department ten kan hria a, hemi chungchang pawh hi department ten kan sawi khawm a. Hemi chungchang pawh hi NASA takin hei hi enge a chhan ni ang tiin kan sawiho a, Zirtirtu association-ho te nen pawh kan sawiho a ni. Chumi ah chuan kan ngahtuahnaa lian deuh leh min veipuitu tam tak te pawhin an han sawi ah hian, class V leh Class VIII chhoa kan chhiatna-ah hian kan system hman pakhat, CCE hi a tha lo lam ni lo in, zirtirtu indaih tawk lohna te leh kan hmang thiam tawk lo deuh nia hriatna kan nei a. Chumiah chuan hemi atanga kan han insiamthat leh theihna tur beiseina kan neih avangin CCE hi a vaia hnawl lovin CCE modified form-in kumin session-ah hian kalpui turin ruahmanna kan siam ta a, kan hman lai ah hi chuan exam pawh awm tawh chuang lovin grading-in a kal a, naupang in tual phiat faiin eng eng emaw te pawh an tih khan No Detention Policy TE atangin a lo awm bawk nen, pawl an sawn zel a ngai tho bawk si a. An fail hleithei bawk si lo, exam awm bawk si lo, thuthluang policy deuh hi tlem in kan lo intlahdah phah deuh em maw ni le kan tih avangin tunah hian sikul calender thar kan siam a, hmanniah social media lamah te ka thusawi tlemin an lo hre fuh lo deuh a. School calender tih ah khan accademic session ni lovin school calender hi kumina kan hman dan tur kan siam sa kha he CCE modified form kan siam hnu-ah hian exam system-te pawh awm ve leh se kan ti a.

Tin, tunhma ang khan 1<sup>st</sup> term, 2<sup>nd</sup> term, 3<sup>rd</sup> term ang hi awm leh rawh se kan tih avangin term exam turin, calender kan siamtha leh a, chu zawk chu school calender kan thlak danglam kan tih kha a ni. Tin, engtin nge measurement kan lak,

hemi siamthatna atan tih hi chulai chu tun dinhmunah chuan hmalakna step pakhatah chuan kan neih lai mek a ni.

Tin, zirtirtu lak thar turah hian Hnam Run list tihte, Block list tih te hi awm loin min assure thei ang em tih hi, politics-ah hian nimin-ah kan session zawh khan, Tlunghvel-ah kan Deputy Speaker nen hun kan han hmang a, ka han sawi a. Thil reng reng hi keimahni politician vek te hianin mipui kan zirtir sual niin ka hria a. Zirtirtu kan lak turah pawh hian a theih chin chinah thianghlim leh felfai tha taka lak kan tum a, IV Grade la tura kan inruahman pawhin chutiang chuan mipui te, kan thalai lehkhathiam te hnenah beiseina an neih theihna tura kalpui kan tum a, ruahmannan kan siam a, theihpatawp kan chhuah laiin keimahni vek hian forum hrang hrang atangin thil dang hi kan sawi fo thin a.

Mipuite ah sorkar rin tawk lohna emaw, rinhlelhna mit kan neih tir niin ka hria a, hei hi chu kan result lo en phawt ula, sawi duh kan neih chuan sawi ni se a tha in ka hria a. A theih chin chin ah a fair thei ang berin tih kan tum, kan theih chin chinah tih hi ka sawi duh a. A khaw mi qualified an awm chuan lak kan tum, an awm loh pawhin a khaw hnaivai ah a district chhung ami anmahni duhthlannain kan tih zawng zawng hi kan theih chin chin ah a remchan dan ang angin kalpui kan tum e tih kha ka han sawi nawn leh a ni.

A dawt lehah chuan Aizawl South II member zahawm tak Pu Lalchhuanthanga zighthna kha Sikulsen leh saw laia kan Sikul upa ber mai Synod kuta kan hlan chungchang kha question dangah pawh khan a rawn zawt a, mahse vawiinah a chhuak tello hlauh a, a rawn zawt belh a. May ni 29-ah khan Mizoram Synod hruaitute kutah he Sikulsen hi kan hlan let leh ta a ni. Hlan let a ni tih kha ka sawi duh a. Hei hi Mizoramah zirna bul Mission-in a enkawl a ni a. Hun hmasa zawng zawng ah Synod ta a ni. Amaherawhchu sorkar-in eng emaw chen kan lo enkawl sak a, annin historical place te leh thil dang te alo nih ve bawk avang leh Synod khawmpui pawhin hei hi kan ram rohlu, kan kohhran history-a thil awmte a nih avangin (Speaker : Ngawi rawh aw, hun a tawp a, a chhan laklawh lai kha chhan tir chhunzawm ang aw) min hlan let leh thei lawm ni ? an rawn ti a. Stage hrang hrang paltlang ngai lai te paltlang a nih hnuah a neitu hmasa kutah hei hi kan hlan let leh a ni. Chumiah chuan zirtirtute engtin nge an awm zel dan tur tih hi kan inremnaah hian a detail-a han sawi dawnin hun a awm tawh loh avangin a

tlangpuiah chuan inremna kan siamah chuan kumin 2019-2020 accademic session chhung hi an kal ang a, 2020-2021 atang chuan Mizoram Synod-in a enkawl chhunzawm ang a, tuna a thawktu kan neih mek te saw chu sorkar in an awm chhunzawm na tur te a ngaihtuahsak dawn a ni tih chin kha ni mai sel a tha awm e. Pu Speaker, ka lawm e.

**SPEAKER :** Zawhna leh chhanna hun a tawp tawh a, nichina Starred Question No-18 zawhna, member zahawm tak, Pu K.T.Rokhaw-an a zawhna kha kan Minister zahawm tak Dr R.Lalthangliana zawhna kha a dika, zawhnaah hian Tuipang Sub-Divisional Office-ah hian SDO Sadar dah tumna a awm em tih a inziak kah a ni. Chuvangin a chhanna kha a dik zawk a ni.

Business dangah kan kal ang a tunah chuan kan dan 27-na pakhatna angin private member business kan tih ni a ni a. Vawiin ni 14.6.2019 ami tur hi ni 16.6.2019 Nilaini chawhnu dar 1-ah khanin ballot a ni a. Chuta tang chuan resolution sawm (10) thlan chhuah a ni a. A indawt dan chu Buletin part II 58-na ah khan a rawn dah tawh a ni. Chutianga kan ballot chhuah zingah chuan pakhatna kan la ang a. Resolution chu ‘MNF sorkar-in kum 2008-a District thar pathum Khawzawl, Saitual leh Hnahthial District a hawn te kum 10 lai hlamchhiah a nih hnu ah sorkar-in tihlawhtling tura hma chak taka a la hi a lawmawm kan ti hle’ tih a ni a. Resolution neitu chu C.Lalmuanpuia, member zahawm tak a ni a, move turin tunah i lo sawm ang u.

**PU C.LALMUANPUIA :** Pu Speaker, ka lawm e. Vawiinah resolution pawimawh tak move theia ka awm hi ka lawm tak zet a ni. Pu Speaker, Mizoram state hi district tam zawka then sawm tumna sorkar anga ngaihtuahna hmasa ber nia lang chu kum 1996 kha niin ka hria a. Khatih hunlai kha December ni 6 kha ni ta in ka hria a. Kan G.A.D secretary, Pu Vanhela Pachuau chuan Council of Minister ngaihtuah turin heti hian a thlen a ni.

He a thil thlenah hian Aizawl District chu hmun thum ah leh hmun li a then rawtna a awm a. Flag-A tiin sorkar chuan an sawi mai thin a. Chuta an sawina pakhat flag-A zawkah chuan Aizawl District chu Mamit, Khawzawl leh Aizawl District headquarters awm tura ngaihtuahna a awm a. Tin, flag-B zawkah chuan Aizawl District chu hmun thum ah tho Lengpui, Saitual leh Aizawl te chu district headquarters a rawtna a awm a ni.

Tichuan, khatihlaia G.A.D secretary-in a ziah dan, a lan danah chuan he rawtna hi administration fawng chelhtute thlirna atang chuan a duhawm leh rintlak tha ber nia ngaih a ni a. Chu mai a la ni lo a, he rawtna pahnih bakah hian Pu Lalbiakthanga (IAS rtd.) khan district then darh tura ruahmann sorkar-in a mawhphurhna ah dahin hetiang hian rawtna a siam ve leh a. Chu rawtna ah chuan Aizawl District chu District pali ah, Aizawl, Kolasib, Champhai leh Thenzawl-ah district headquarters awm tura rawtna hi thlen leh a ni ta a ni. Amaherawhchu vanduaithlak takin kan ti dawn nge Pu Speaker, he rawtna hi a nih tur ang a nih hma in a leak out hlauh mai a. Chuvang chuan khatih hunlaia kan CM zahawm tak Pu Lal Thanhawla chuan notesheet-ah ziakin he rawtna hi a pawt let leh ta a ni a. A ziah dan chu ka'n chhiar chhuak nghe nghe teh ang.

“Even before many Ministers could see the proposal being circulated for their opinion, some irresponsible Minister indulge the proposal to the people. It was quite possible that some Minister may not agree to the proposals and may even want to do (...) verbally. Therefore, the final (...) as early as convenient”, tiin a ziak nghe nghe a ni.

Minister tam tak ten an sawi khawm hma leh an hriat ve hma leh sawi khawm an duh hmaa hetia a lo awm tak avang hian he file pawh hi pawh let leh a ni a. Meeting pawh hi remchang hmasa ah kan ko ang tiin a siam ta nghe nghe a ni. Hemi hnu hian Aizawl District then darh chungchangah thutlukna nei loa hun rei tak a awm hnu ti mai ila, kum khat vel bawrah khan December ni 10, 1997-ah khan khatihlaia kan Chief Secretary Pu Lalfakzuala leh sorkar hotu lian pasarih dangte chu an thu khawm leh a.

Chutah chuan chipchiar zawkin Aizawl District then dan tur rel a ni a. District thar headquarters-te nghah a nihna hmun tur a zirin Sub-Division hmun tur te pawh ngaihtuah a ni bawk a. He thu hi mipuiin an lo hria a. A then lawm a an au lain a then an tap bawk a ni. Pu Speaker, Mizoram chu district chungchangah hian min sawi dual dual a ni ta ber mai a ni. A bik takin Khawzawl khua te phei chu an thinrim em em a, District headquarters an chang dawn lovin an inngai a. An thinrim avangin kawng pawh an dangchat a. Tin, office te hial kutthlak a ni ta nghe nghe a nih kha.

Tichuan an khaw tlangval sawm rual lai pawh Central Jail-ah thawn thlak an ni nghe nghe a ni, Pu Speaker. Tichuan hun a lo kal zel a, Chief Secretary hoa sorkar hotu lu hrang hrangte an meeting leh chuan report hrang hrang a rawn lutkhawm a. Chu chu February ni 2, 1998 kha a ni a. Chutah chuan Khawzawl khaw chhunga pisa hrang hrang tihchhiat te report a rawn lut a, an dawng khawm a. Chuta notesheet-a lan dan chu ka sawi kher duh a.

PWD building pahnih, PHE building pahnih, BDO office, P&E building pahnih, Soil & Water Conservation Department building pahnih, Department pakhat, Horticulture building pakhat, AH&Vety. dispensary leh Forest Range Office pakhat te a tel bawk a ni. Department thenkhatte chuan hun reilote chhunga he office hian hna a tan leh theih mai kha an beisei a. Chutiang chuan Secretary te chuan kan CS hnenah thlenin CS chuan kan CM hnenah a thlen chhawng leh nghe nghe a ni a.

Chutah pawh chuan khatih hunlaia kan Chief Minister zahawm tak khan heti hian thutlukna a siam a. “Thutlukna ka siam hma loh chuan he thil hian ni eng emaw zat chu lo awh rawh se. Khawngaihin tuna thawk sa pisa te tih loh chu lo chawl rih rawh se”, tiin thutlukna kha notesheet-ah a ziak nghe nghe a ni.

Tichuan ni 11, March 1998-ah khan sorkar-in notification chhuahin, rorelna tha zawk a awm theihna turin Mizo District chu hmun thum ah a then a. Chungte chu Aizawl District, Aizawl East District leh Aizawl West District-tea then an ni a. Aizawl chu Aizawl District headquarters a ni a. Champhai chu Aizawl East District headquarters a ni a. Mamit pawh chu Aizawl West District headquarters ah puan a ni ta a ni.

Aizawl District ah hian khawchhak lamah Tuivawl leh Tuichang inkar leh khawthlang lamah Tlawng lui thleng a huam a. Aizawl East District hian khawchhak lamah Tuivawl leh Tuichang chhak lam zawng huamin Aizawl West District hian khawthlang, Tlawng thlang lam zawng kha a huam ve thung a ni.

Tichuan Pu Speaker, ni 29 July, 1998-ah khan Aizawl District huam chhungah chuan notification dang sorkar-in a chhuah leh ta a. Chutah chuan Aizawl District hi hmun thum-ah bawk then darh a ni leh a. Aizawl District, Aizawl North District leh Aizawl South District-ah te then darh a ni. Aizawl District headquarters chu Aizawl a ni a, Aizawl North District headquarters chu Kolasib tiin Aizawl South

District headquarters chu Serchhip a ni a. Hemi rual hian Chhimtuipui District pawh hmun hnih-ah then darh niin Chhimtuipui East District leh Chhimtuipui West District te a lo piang a.

Chhimtuipui East District headquarters chu Saiha niin Chhimtuipui West District headquarters chu Lawngtai a ni a. Tichuan Mizoramah hian District pariat (8) kan lo nei ta a ni. Khami kan neih hnu lawk khan han ti ila, District a lo pian darh hnu lawk khan MLA inthlan a lo hun leh ta mai a. Chutah chuan Pu Lal Thanhawla, Mizoram Chief Minister kaihruai sorkar chu mipuiten pahi thla in sorkar thar, Pu Zoramthanga, Mizoram Chief Minister kaihruai sorkar chu a lo piang ta bawk a.

He sorkar tharah hian District thar 5 sorkar hmasa-in a lo puan tawh te chu tha taka hna thawk thei tura ruangam dinin bul a tan a sorkar-in a phak tawkin a ti changtlung zui zel a ni.

3<sup>rd</sup> June, 1999-ah khan Notification chhuah leh in sorkar thar lo piang chuan District nichina kan sawi chhuah tak te kha an hming hetiang hian a rawn thlak leh ta a Aizawl East District chu Champhai ti in, Aizawl West District chu Mamit ti in, Aizawl North District chu Kolasib District ti in, Aizawl South District chu Serchhip ti in, Chhimtuipui West District chu Lawngtai District ti in, Chhimtuipui East District chu Saiha District ti in an lo thlak a, Aizawl District leh Lunglei District erawh chu thlak ve lo in a hming ngai an lo ring ta a ni.

Kum 1998-a District 5 lo pian belh hma leh pian belh hnu khan Mizoram mipui leh khaw hrang hrangah District thar duhna boruak a lian chho zel a, a bikin heng khua Khawzawl, Saitual leh Hnahthial leh a chhehvel khua te hian District thar nasa takin an nawr chho zel a. An duhna leh mamawhna te hria in, khatih laia Mizoram sorkar Cabinet Meeting chuan 1<sup>st</sup> September, 2008 khan District thar 3 Hnahthial, Khawzawl leh Saitual te chu siam belh rem a lo ti ta a ni. Tichuan, 12<sup>th</sup> September, 2018 khan heng District thar 3 siamna tur hi Notification tihchhuah a ni a. Heng District thar 3 lo pian tak avang hian heng khua Hnahthial, Khawzawl leh Saitual mipuite hi an lawm hle a ni. Mipuiten ruai nen an lawm nghe nghe a ni.

District thar 3 puan a nih hnu hian Mizoramah sorkar thar Pu Lal Thanhawla, Mizoram Chief Minister kaihruai a lo piang a. Mahse he sorkar thar

hian mipuiten nasa taka an nawr chung leh inthlan dawna District thar sorkar hmasain a lo puan tawhte chu an chhunzawm, function dawn thu an aupui chungin, a taka chan tir/implement turin kum 10 chhungin hma a la zui ta miah lo a ni. Engpawh ni se Pu Speaker, kum 2018 MLA inthlan dawnah khan Pu Zoramthanga kaihhruai MNF Party chuan kan thupuiah, manifesto-ah hial telhin kan sorkar hmasak laia District thar 3 kan lo puan tawhte chu kan chhunzawm tur thu kan sawi a. Pathian zarah MNF Party chuan kum 2018 MLA inthlan-ah hnehma changin Pu Zoramthanga, Mizoram Chief Minister kaihhruai sorkar thar a lo piang ta a ni. 19<sup>th</sup> March, 2019-ah khan Mizoram Assembly House zahawm tak chuan Vote on Account Budget thla 4 chhung atan pharhin a tuk 20<sup>th</sup> March, 2019-ah khan he Budget hi he House zahawm tak ah hian passed a ni a. He Budget-ah hian sorkar thar hian mipuite hnena an lo intiam tawh ang ngeiin District thar 3-te bul tanna tur ₹120 lakh theuh a lo dah ta a ni. Tichuan 3<sup>rd</sup> June, 2019-ah khan Notification tih chhuah a ni leh a, hmanni lawk kha a nih chu Pu Speaker, chutah chuan Mizoram sorkar chuan Hnahthial District, Khawzawl District leh Saitual District-ahte Deputy Commissioner, DC Office dinna tur thupek a lo chhuah zui ta bawk a ni.

Pu Speaker, District thar 3 Khawzawl, Saitual leh Hnahthial District te kum 10 lai hlamchhiah an nih hnuah sorkar-in hlawhtling tura chak taka hma a la hi lawmawm kan ti hle a ni. Ka lawm e.

**SPEAKER :** Aw le, tikhan Resolution chu a rawn move ta a, sawi ho tan mai i la. Hun hi eng ang vel nge kan in pek ang le? Minute engzat nge kan inpek ang? A thenin 15, a thenin 10, 15 a tha kan ti ang em? Pakhatin minute 10 a rawt a. Dar 4 chu kan pel dawn lo nia, tul bik riau te a awm a nih loh chuan. Deputy Speaker-in a awmna lam a tan tlat mai, minute 10 i ti mai ang u aw. A nih le, minute 10 kan ti ang a. Tin, Group Leader-te chu kan hriat kha kan pe tam deuh ang a. Tunah sawihona kan tan ang a, tunge sawi tan ang le? Member zahawm tak Dr. Z.R.Thiamsanga sawi turin i lo sawm ang.

**Dr. Z.R.THIAMSANGA :** Pu Speaker, ka lawm e. Vawinah Mizoram sorkar-in kum 2008-a District 3 Khawzawl, Saitual leh Hnahthial District a hawnte kum 10 lai hlamchhiah a nih hnuah sorkar-in tihawhtling tura chak taka hma a la hi lawmawm kan ti hle tih Resolution a lo lut hi a lawmawm hle a. Kan hria a, Mizoram chu tlangram chhengchhe tak a ni a, inkalpawhnate a har em em mai a, fur

chhiaah phei chuan Champhai - Aizawl te pawh hi nikum lamah te khan darkar 12 kan kal a. Amaherawhchu, sorkar-in hma an lak chhoh tak avangin, tunah erawh chuan darkar 6/7-ah te pawh kan lo thleng thei ve tawk chu a ni ta mai a. Amaherawhchu, hmun tam takah kawng te pawh hi a la chhia a, kan ram mil hian District te pawh hi kan neih tam pawh a lo ngaiin a lang a.

Kan chhehvel Meghalaya State-ah khuan District 11 an nei a Arunachal phei chu ram lian a ni bik lo a, an ram a chhengchhiat avangin District 26 lai an nei a ni ta mai a. Tin, Nagaland te pawh tunah hian District 12 lai an nei tawh a ni. Manipur-ah hian an ram khi phairam a ni a, tlangram chu tlemte a ni a, chuti chung chuan District 16 lai an nei tawh a ni. Tunah District 8 kan han nei a, District 3 kan neih belh dawn a, chuta belh khawm chu 11 chauh a ni a. Chuvangin kan ram dinhmun te ngaihtuahin District 3 a taka an piang thar tur hi, a taka awm tur hi a lawmawm hle a, MNF sorkar hmasa 12<sup>th</sup> September, 2008 daih tawha he District a lo puan tawh, Congress sorkar-in kum 10 chhungin hma an la miah lo mai a. Tun MNF sorkar hun reilo te, thla 4 thla 5 chhung leka chak taka hma an la a, Budget-te pawh an ruahman ta mai hi a lawmawm hle in, a ropui in ka hria.

Tin, District a lo nih takah chuan central atanga tanpuina tam tak direct funding te tam tak a awm dawn a. Tin, District-in a kalpui, Mizoram in kan mamawh em em Health chungchangahte pawh District Hopital te a lo piang ang a, automatic-in kan Health Care System-ah te pawh hian hma kan sawn dawn a ni.

Chutiang bawkin Education chungchangahte pawh department hrang hrangah hmasawnna tur kan nei dawn a, Agriculture-ah te leh Power chungchangah te. Chungah chuan he sorkar-in District thar pathum a taka function tura a rawn ruahmanna hi kan ram tan, a bik takin thingtlang tan phei chuan hmasawnna ropui tak a ni dawn a ni.

Thingtlanga, kan mi leh saten hmun hla tak tak atanga khawpui district an han pan te hi a senso a tam a, kal man leh haw man ringawt atan te pawh hian sum tam tak an seng a. Office dawr tur ringawt pawh hian tha leh zung, sum leh pai tam tak an seng a ni. Chumi ringawt pawh chu thingtlang mi tam takin awm hmuna an mamawhte, kan mamawhte an han ti thei mai turte hi Pu Speaker, a lawmawm khawpin ka hria a.

Tuna kan resolution pawimawh tak mai hi a lawmawm ka ti a, nichina ka sawi tawh ang khan state dang tam takte pawh hian thil dang dangah, Medical Science-ah te hma an sawn chak em em hi District an neih tam vangte niin a lang a. Chuvangin, vawiina private member resolution “MNF sorkar-in kum 2008-a District thar pathum Khawzawl, Saitual leh Hnahthial District a hawnte kum sawm lai hlamchhiah an nih hnuah, sorkar-in tihsawhling tura chak taka hma a la hi a lawmawm hle” tih hi vawiinah hian ka sawi duh a ni e Pu Speaker, ka lawm e.

**SPEAKER :** Hun i va hmang tlem ve. Tunah member zahawm tak Pu K.T. Rokhaw i lo sawm ang.

**PU K.T. ROKHAW :** Pu Speaker, ka lawm e. He resolution sawi ve thei tura hun tha min pek avangin ka lawm e. Pu Speaker, tun tuma District pathum Saitual, Khawzawl leh Hnahthial te District tura puan a ni hi a lawmawm ka ti a. A bik takin he District pathum mipuite hi ka lawmpui a ni. Amaherawhchu Pu Speaker, Saitual, Khawzawl leh Hnahthial te District tura puan a nih khan district boundary chu, ‘In due course’-a tihfel a ni ang a tih kha. Vawiinah hian he sorkar hi thla sarih a kal mek a. District Boundary hi tun thleng hian tihfel a la ni lova. Tin, notification pawh chhuah a ni lova. Chuvangin he district chungchang ‘In due course’ hi engtia rei tur nge tih hi hriat a chakawm khawpin ka hria.

District boundary pathum hi District an puan lai hian chiang sa turah kan lo ngai a. Tun thlenga sorkar thla sarih a kal tawh hnuah pawh District boundary a la chian loh chuan thil mak tak a niin ka hria. District an puan hi a lem viauin ka hria, a boundary engmah a hriat loh a, chuvangin Pu Speaker, kan Minister te thu sawi atang khan tun atanga rei lo teah District pathumah hian Deputy Commissioner dah a ni dawn a, an quarter luah tur te, an office tur te pawh vawiinah hian ruahman a la ni mek a ni tih te kan lo hria a, a lawmawm em em rualin District Deputy Commissioner kha lo dah ta se, a boundary kha eng chen nge tih a hriat loh chuan engtin nge kha a lal ram, a jurisdiction chin kha a hriat theih ang? Engtin nge hna a thawh theih ang, engtin nge hma a lak theih ang tih kha ngaiantuahawm tak a la niin ka hria.

Tin, vawiinah hian he sorkar hian D.C. dah a tum takah chuan a boundary hi notification a chhuah loh pawhin a lo tifel thawkhat tawh pawh a ni mai thei a. An lo tifel tawh a nih chuan a boundary chinte pawh he House-ah hian min hrilh hria sela a tha khawpin ka hria.

Tin, Pu Speaker kum 1998-ah khan, khami lai kha kei MLA ka nih ve lai a ni a. Khatih laia Congress sorkar khan District panga a siam than a. Chuta a district puante chu a then chauh ka rawn sawi ang a, Aizawl North District a ti ta a ni. Aizawl North District-ah khan MLA bial pathum a huam ang a ti a, chung MLA bialte chu Kolasib, Kawnpui leh Bilkhawthlir te an ni. A capital tur erawhchu Kolasib a ni ang a ti a ni. Chuvangin District boundary kha a fel sa thlap mai a ni. MLA Constituency pathum boundary chin kha District pakhat, Aizawl North District a ni mai dawn a ni. Chutiang tho in Aizawl South District a ti leh a. Aizawl South District-ah khan MLA bial thum a huam ang a, chung MLA bialte chu Serchhip, North Vanlaiphai leh Lungpho MLA bialte a ni ang. District capital tur erawh chu Serchhip a ni ang a ti a ni. Tichuan a boundary kha chu a chiang sa vek a ni.

Tun tuma kan sorkar-in district a puan Saitual, Khawzawl, Hnahthial-te erawh hi chu a boundary engmah hriat a la ni lo va, a boundary hi an la puang lo va. MLA bial eng zat nge a huam dawn tih pawh a hriat loh a ni. Chu mi avang chuan a district neitu mipuite pawh hi a ruk chuan an lawm em em rualin an mangang viau a ni. Chuvangin Pu Speaker, heng district pathum Saitual, Khawzawl leh Hnahthial District tura puan a nih hma khan tun sorkarah khan District Reorganization Committee din a nih pawh kan hre lo a ni. Chuvang chuan Pu Speaker, vawiinah heng District pathum Saitual, Khawzawl, Hnahthial District boundary-te hi tihfel vek ni ta se chuan he Session a MLA te hi kan lawmna a kim hle tur a ni a. Mahse, a boundary chin chinfel a nih lohna laiah hian kan lawmna a kim lo a ni, kan rilru a hnual deuh a ni tih kha ka han sawi ve duh a.

Tin, Pu Speaker, a tawpnaa ka han sawi duh chu nichina member zahawm takin a rawn sawi tawh ang khan District pathum hi pek a ni tawh a, a mipuite pawh kan lawmpui hle a. A lawmawm kan tih rual rualin District Headquarter dil mek Darlawn-in District an dilna hi ka ngaiantuah thin a, an phu hliah hliahin ka hre thin a. Tunah hian Aizawl District huam chhungah kan dah ta a ni. Darlawn hi Aizawl

atang hian a hla em em ta a ni. A thente phei chu Zokhawthiang te, Zohmun te, Khawlek te, Mauchar-te phei hi chu Aizawl atanga 200km deuhthaw a hla vek a ni. Chuvangin, anni tan an District Headquarters Aizawl rawn dawr hi a hla em em a ni. Chuvang chuan, Arunachal-te pawhin district 20 chuang an nei thei a nih chuan engah nge Darlawn hi district kan pek ve mai loh tih hi ka rawn sawi tel a ni e. Pu Speaker, ka lawm e.

**S P E A K E R :** Tu nge sawi leh ang ? Member zahawm tak Pu Lalrintluanga Sailo i lo sawm ang.

**Pu LALRINTLUANGA SAILO :** Pu Speaker, ka lawm e. Vawiinah MNF sorkar-in kum 2008-a district thar pathum Khawzawl, Saitual leh Hnahthial District a hawnte kum 10 lai hlamchhiah a nih hnuah Sorkar-in tihsawtling tura chak taka hma a la hi lawmawm kan ti hle a ni tih Private Resolution member zahawm tak Pu C. Lalmuanpuia chungah lawmthu ka han sawi hmasa duh a. Hetianga ram mipui leh bial mipui ten tihtakzet leh nghakhlel taka an lo thlir kan tihsawtling mai tur hi a lawmawm hle in ka hria a. Chu mai ni lovin niminah kan House Leader zahawm takin heng district thar pathum tihsawtlinna tur atana Budget-a an sum hman turte a rawn tarlang kha a lawmawm ka ti leh zual a. Member zahawm takin a han sawi ang khan a leh lamah chuan a boundary siam fel chu a la ni hauh lo a ni tih kan hria a, amaherawhchu, a boundary awm lo hian thil tam tak hi siam a awm tawh a ni tih Pu Speaker, ka han tarlang tel duh a.

A bikin ka bial chhungah hian Village Council panga ngawt mai kum 20 chuang tawh vawiin thlengin boundary nei lo an ni a, kum tin lo neia eizawng an ni a, an buai em em mai a. Pukzing Village Council hnuaih hian Hruiduk te, Pukzing Vengthar te, W. Phulpui kan tih ang te leh Hnava te a awm a. Khatiang khan sorkar kal tawh hian kum tam tak chhung anmahni khaw din ngei Village Council an lo pek pawh boundary an lo siam lo a nih si chuan, vawiinah hian sawisel tur an ni em aw tih ka ngaiantuah a. Chu tih rual chuan sorkar hmasa khan ka bial chhunga Silsury khuaah chuan Village Council pakhat kha pahnihah a pawm a. An han practice chho va, an han inthlantir a, a buaithlak khawp mai a. Electoral Roll-ah chiah khan VC an awm a, a kawmthlang ami kha Silsury East VC-ah te an han dah a. A kawmchhak chiah kha West-ahte a dah a. An la in awm pawlh vek a ni. Chuvang chuan, helai hi member zahawm tak khan a hriat sual a nih ka ring a. A boundary-ah chuan buai loh

phawt kha tha in ka han hre deuh a. Tin, notification pawh ka hriat sual loh chuan a chhuak tawh niin ka hre nghe nghe a tih kha ka han tarlang hmasa duh a ni.

Pu Speaker, vawiinah hian district thar pathum Khawzawl, Saitual leh Hnahthial a nihna ang taka tihpuitlin a nihna tur atana he sorkar, Pu Zoramthanga kaihhruaiin hma chak taka a lak tak avang hian lawmthu ka sawi rualin, a area chhunga awm mipuite an lawmzia kan hmuh hian lawmpui loh rual an ni lo a ni tihi rawn tarlan ka duh a.

Tin, he Private Resolution fing tak maia rawn puluttu member zahawm tak Pu C. Lalmuanpuia, Aizawl North III bialtu hnenah hian lawmthu ka han sawi nawn leh a ni. Chutih rual chuan Pu Speaker, kum 2008 September ni 1 daih tawhah khan Pu Zoramthanga kaihhruai Ministry khan heng district pathum-te a pian theihna atan khan hma lo la in, kei ngei pawh khatih laia MNF OB leh kan MLA te Joint Legislature Party meeting State Guest House-a kan neihnaah heng district pathum pianna tur atana ngaihtuahtute zinga min dah avangin vawiina kan House Leader zahawm tak hnenah hian lawmthu ka han sawi nawn leh duh a ni a. Khatiang ngaihtuahtute zinga ka han awm kha a ropui ve hrim hrim a, Pu Speaker, vawiinah hian ka han hre leh hnuhnawh a ni tih kha ka han tarlang duh a. Heng district thar pathum a lo pian thu tarlan a nih atanga vawiin tleng hian sawi duh dan hi kawng hrang hrangin a inanglo em em mai a. Sawichhiatna leh indemna thawm a ring hle a; tin, Mizorama kan politics kalphung pawh nasa takin a sawi danglam a ni a, chuvang chuan, vawiinah hian lawmthu sawi loh rual a niin ka hre lo va, lawmthu hi kan sawi mawlh mawlh turah ka ngai a ni.

Pu Speaker, thenkhatin district kan ngah lutuk a, a area a zim a, kan Mizo mizo-na leh kan inpumkhatnate a tichhia ti ang zawngte pawhin sawi an awm thin a.

Tin, ram hruaitu lu ber pakhat phei chuan kan awm loh chhungan a lo tiam zut zut alawm maw le ti tein tawngkam mawilo takte pawh an hmang hial a ni a. Chutiang chuan kawng hrang hranga indemna thawm a ring hle thin a nih kha. Pu Speaker, kei chuan hei hi ka sawi duh chu a ni a. Chhiarpui hnuhnung ber kum 2011 khan nichina member zahawm tak Dr. Thiamsanga'n a sawi ang khan Mizoramah hian mipui 10,91,014 (nuai sawm leh singkua leh sawmpali) kan awm a. Chu chuan district 8 kan nei a ni a.

Tin, kan thenawm hnaivai ami keimahni ang tho, tlangram chhengchhe taka awm ve tho Arunachal-ah chuan kum-2011 chhiarpuiah khan mihring 13,82,611 (nuai sawm pathum singriat sanghnih zaruk leh sawm pakhat) chiah an awm a. Chu chuan district 25 ngawt Pu Speaker, a nei a ni. Chuvang chuan Mizoram population, mipui ai hian chhiarpui hnuhnung berah hian 2,91,597 (nuai hnih singkua sangkhat zanga sawmkua pasarih) chauhin an tam a. Chu chuan district 25 an nei a. Tin, Rural Development Block hi keinin 24 atanga 26 (a chiaha hi ka chiang lova) kan neih lain, Arunachal state hian 99 a nei a ni. Chutiang khawp chuan administrative area-te pawh a inzau hleihin a inzim hleih em em mai a ni a.

Tin, kan hriat angin central sorkar atanga thingtlang lam hmasawnna ngaihtuahna atana sum a rawn pek hi District emaw, RD Block against hian a rawn release thin a. Chuvangin, kan sum hmuh pawh hi a intam hleih em em a ni tih kan hriat nawn thanin ka hria a. Chuvang chuan, vawiinah hian kan district hi a tam lo a ni. Pu Zoramthanga kaihhruai hi Pathian zarah a kal chho zel ang a, a dang sawm te pawh hi puan leh hial chi alawm maw ni le Pu Speaker, an ti hial a ni. Population-a kan en chuan Arunachal kha kan la pha lo hial ang. Sawm pawh hi puan belh ila 21 chauh kan la nei dawn a ni. Chuvangin, kan hotute hmalakna hi a lawmawm ka ti a, a chhuanawm tak zetin ka hria a, lawmthu ka sawi a.

Pu Speaker, chutih rual chuan special state, category state kan nihna ve ve han en pawh hian a awm hliah hliahin ka hria a. Tin, communication gap a nasat em avang pawh hian hei hi chu kan tih loh theih lohah kan ngai a ni. Chutih rual chuan kan House Leader-in chak taka hma a lak chhohna hi a fakawm tak zetin ka hria a. Inthlahrunna tur awm pawhin ka hre lo a ni. Pu Speaker, i veilama thu ten district thar 3 kan House Leader-in a puan lai khan mak an ti a, awm lo an ti bawk kha a ni a. Chuvangin, political party-te hi kan Leader min kaihhruaina zir zelin hma kan la thin a ni a. Vawiinah hian leader tha, hmathlir vision nei tha tak kan nei hi kan vannei hlein ka hria a, chhuanawm pawh ka ti a. Pu Speaker, kan House Leader hi kum 45 vel, thihna luikawr ruam zawh thlengin ka lo zui ve tawh a ni a. Chutiang taka hotu atana pawmtlak a nihzia hi ka tarlang tel duh a ni.

Pu Speaker, niminah khan Vanapa Hall-ah kan House Leader zahawm tak khan vision fel tak a neihzia tarlangin Aizawl khawpui traffic jam nasa lutuk tih ziaawm nan hmalakna ropui tak PAHOSS launching programme-ahte kan va tel ve

a. Kan House Leader hmelah khan Pu Speaker, nimin khan Isua hmel hi langin ka hre hial a ni. Chuvangin, a hmalakna hi a ropui ka ti tak zet a, chhuanawm ka ti a. A chhan chu, amah dotute leh NASA taka sawiseltute hnenah niminah khan itsikna leh elrelna tel miah lovin sum a nuai za tel an pe duhte kha, hetiang leader kan nei hi kan bawp hi kan beng thlenga khai tur kan ni hial lawm maw ni le, lawm avang hian ka ti a. Hruaitu dangten ka unau pianpui pawh ni sela, congress a nih loh chuan engah mah ka ngai lo tih tawngkam an hmante nen chuan Pu Speaker, ava danglam tak em ka ti deuh a ni! Chuvangin Pu Speaker, kan House Leader hian vision a nei thain, hmathlir fel tak a neih avanga hei hi thleng kan ni tih ka tarlang duh a.

Pu Speaker, minute khat lek (ka sawi laklawh a). District thar pathum chungchangah hian Aizawl traffic jam tihziaawmna PAHOSS-a hmalaknate leh kawng hrang hranga thlirna a langin ka hria a. I veilama thu ten super Chief Minister candidate hial lo ni tawhte pawh hian House zahawm takah khan keini chu issue base-in a nia kan kal ni te an han ti thin kha a ni a. Hmathlir nei lovin min hruai chuan khawnge kan thlen ang aw tihte pawh min ngaihtuhtir a. Chuvanin, vision fel tak nei leader kan nei hi lawmawm ka ti a. Keini zawng fak hla siamtuin Krismas hla a siam ang khan, ‘Keini zawng kan chan bik hi kan vannei hle a ni,’ ka’n ti deuh hlek a ni Pu Speaker. A tawp berah chuan Pu Speaker, district 3 tihpuitlinna tur atana kan House Leader kaihruaina hnuiaia chak taka hmalak a lo ni tawh hi lawmawm ka ti a. Chutah chuan kan House Leader hnenah lawmthu ka sawi a. Chutih rualin, heng district 3 tihhawhtlin a lo nih theihna atana sorkar na chelh tlaka min ngai a, min thlang tlingtu mipui zawng zawngte chungah vawiinah hian lawmthu ka sawi a ni e. Ka lawm e.

**SPEAKER** : Member zahawm tak Pu L. Thangmawia, ilo sawm ang.

**Pu L. THANGMAWIA** : Pu Speaker, ka lawm e. vawiinah member zahawm tak Aizawl North III Assembly Constituency atanga thlan tlin Pu C. Lalmuapuia’n, ‘MNF sorkar-in kum 2008-a district thar 3 Khawzawl, Saitual leh Hnahthial district a lo hawnte kum 10 lai hlamchhiah an nih hnuah sorkar-in tihawhtling tura chak taka hma a la hi lawmawm kan ti hle,’ tih a rawn pulut hi a lawmawm hlein ka hria a. Opposition bench-a thu member zahawm tak tak te pawh an lawm ve tho ka ring a. Min pass pui ngei pawh ka ring.

A lawmawm em emna chu he resolution-a a ziah ang hian ‘hma a la hi’ tih mai a ni lova, ‘chak taka hma a la hi’ tihlai hi a lawmawm zualna niin ka hria a. A district kaihhnawih mipui kum 10 chuang lo thlir vang vangtu tan phei chuan a lawmawm lehzual viauin ka ring a. MP inthlan model code of conduct leh thil dang dangin min tibuai chho chungin, rem leh rem loin Mizoram sorkar MNF kaihruai hian heng district-te an function theih nan sorkar thar lakluh ni atangin hma a la nghal mawlh mawlh tih chu hai rual awm loin a lang a. Kum 1998-ah khan, khatihlai sorkar khan district thar 5 ngawt mai kha an hawng a. Tute emaw sawi dan takah pen pakhat pawh khawiahmah an dah lo a ni, DC te dah chu sawi loh. Chuti chung chuan, sorkar thar MNF sorkar lo piang khan heng district thar zawng zawngte kum 10-a sorkar chhung khan DC a dah hman vek a. Ramri a tihfel vek a, thil tul zawng zawng a tih zawk hnuah tunah phei chuan district tangkai tak tak kan lo nei chho ta a.

Hun a lo kal zel a, kum 2008 khan district pathum Hnahthial, Saitual leh Khawzawl te kha MNF sorkar khan a tih thar veleh ta kha a ni a. Inthlan hnu lawkah Minister changtu in a rawn sawi ang khan sorkar a rawn inthlak a, Congress sorkar kaihruai Mizoramah chak takin a lo ding chho a. Kum 10 a sorkar chhungin pen pakhat pawh dah lovin district pathum te a ngai ngaiin an awmin ka hria a, Nimin lamah ka zawng kual ve a, resolution kan sawi dawn avang hian. Ka han sawi belh duh chu Pu Speaker, member zahawm tak Palak bialtu MLA pawh khan boundary kha a vei viau a, kum 10 chhung khan a boundary chungchang hi ngaihtuahna an lo nei miah lo em ni ? Tun thla 6 vela ngaihtuah fel vek tura min beisei kha min hriathiamna ka dil a, a chhan chu hun a awm ngang lo a ni.

D.C. te kan dah ang a, hotuten an ngaihtuah ang a, thla 6 pawh tling hma hmaa lang thei sorkar chuan a rawn tifel mai ang tih kha kei chuan Pu Speaker, ka ring tawk a, hei chu harsatna lian a ni lo a, Officer pawimawh leh a a post tur awm sela, a boundary hi chu sawi ngai lovin a rawn keng tel mai tur niin ka hria a. Amaherawhchu, min veipui lai leh thahnemngai taka House-a a rawn sawi kha member zahawm tak Palak bialtu pawh kha lawmthu ka hrilh duh a. Hei hian kan sorkar hotute leh thuneitu sang te a nawr chak ka ring a. Khalai kha sawisel zawnga rawn sawi ka ni lo tih min hriatsak se.

Tin, rilruin hun hlui te a chhui kir ve a, district 5 a rawn pian tantirh a thil hrang hrang te resolution puluttu in rawn sawi tawh mahse thil hlui te min chhui tir a. Chumi hnuah MNF sorkar-in 2008-a district a hawn hnua thil tleng te ka chhui kir a, district thar duh hoin beisei nei takin khatihlaia sorkar kha hnehna nasa tak chantirin MLA te pawh an lo nei zel a. Pu Speaker, keimah ngei pawh Khawzawl bialah chuan district an duhna avanga nangmah ngei pawh vawi hnih tlantlin i ni a. Min lo hrethiam la, Pu Speaker, vawiina platform-ah pawh inthlan leh ah chuan Khawzawl D.C. ah nomination ka file tawh i ti angah ka ngai a, khatiang khawp khan mipuiin beiseina an lo nei thin niin ka hria a, (Speaker : Ka ti chiah lo a nia, "ka tum ang" ka ti chauh a nia). Ka hriat dan a nia. Min lo ngaidam la, chutiang zelin Saitual bialtu MLA zahawm tak Pu R.Lalzirliana pawh khan district a awm theih nan theihtawp a chhuah a, vawiina hetiang dinhmuna a rawn awm theihna te pawh hi a bul tak hi chu Pu Speaker, district issue tho tho niin ka hria.

Chuvang chuan vawiina hetiang a rawn tleng ta hi a lawmawm hlein ka hria a. Sawiseltu tam takin district chungchang te hi an rawn sawi thin a. Mizoramah kan ram a zim a, mipui kan tlem a, district chuti khati an rawn ti a. Amaherawhchu phak ang tawk tawkin hma kan han la ve a. District hi chuti zat tur tih hi guidelines a la awm lo niin ka hria a, Pu Speaker. Chuvang chuan India rama District te ber mipui tam lam zinga te ber Dibang Valley District Arunachal District phei chu 2011 census ah khanin mi singkhat (10000) pawh an tling lo a ni. Mi 7849 an a awm a. Chutih laiin India rama mihring tamna ber Maharashtra District ah phei chuan crore khat ai tam 1.11 crore, Mizoram mipui let sawm deuhthaw ang a nih chu District khatah awm, khatiang kha a ni a. India ramah pawh an la inzat lo khawp mai a. District khat a mipui awm zat pawh hi. Chuvang chuan Mizoramah chuan a remchan dan ang angte kan tih chho a kha a tha a, tuna ruahmanna Sorkar-in a siam leh a lo hawn tawh te pawh hi a tha viauin ka hria a.

Chutihlai chuan pu Speaker, i remtihnaing kan sawi belh duh a chu, a area inzat thuak tho si ah kan member zahawm tak tak ten min lo hrethiam sela. Rural Development an ti a, R.D. Block an ti ang chi-te pawh hi Nagaland te, Mizoram ai chuan a zim zawk a, record a ka hmuah chuan 16000Sq Km. chuang hret a ni a, Mizoram hi 21000Sq Km. chuang a ni a. Manipur hi 22000Sq Km chuang a ni bawk a. Chutah chuan R.D. Block hi (Speaker : Chair kan inthlak lawk dawn nia aw, kan inthlak zawhah i chhunzawm dawn nia).

**DEPUTY SPEAKER :** Tan teh le.

**PUL. THANGMAWIA :** Pu Deputy Speaker, ka lawm e. R.D. Block 26 chauh kan neih lai hian Tripura-ah te chuan 58 a lo nei a, Nagaland ah chuan 74 a ni a, Manipur-ah 70 Meghalaya te pawh 46 a ni a. Hengte thleng thleng pawh hian ngaihtuahna kan hman thar a tul hle a. District thar a lo pian rual hian a ngaiin ka hria a.

Hei ka bial angahte pawh, Kawlkulhah te pawh, R.D. Block leh Sub-Division atan a rem em em bawk a, he lama ngaihtuahna hmangtu kan Sorkar thuneitu te pawhin ngaihtuahna lo hmang se. Ka bial loah pawh remchang tak tak a awm theiin ka ring a, a that ka ring a. Kan State tiat leh kan State ai tete pawh hian R.D. Block leh thil dang te pawh tam deuh an lo nei a, khatiang chi te khanin District thar a lo pian hian a ramri turte ngaihtuah rual hian Civil Sub-Division leh R.D. Block thar tur te pawh hi ngaihtuah tel nghan a tha awm mang e aw ka ti a. Vawiina motion hi a remchang em a, Pu Deputy Speaker, i remtihain chungte chu kan sawi belh te ni se la.

Tin, tun dinhmunah hian a kaihnawih a District thar kan hawn tur te an lawm em emin ka hria a. (Deputy Speaker : Minute khat i la nei) Pu Deputy speaker, hei sawi na hun te hi kan nei khat a, minute min pek belh te pawh kha i remtihain ka rawn dil duh te pawh ni ta se la. Tunah hian kan Sorkar chak tak hianin DC- te dah chhoh tura hma a la hi a lawmawm hlein ka hria a. Hmanni pawh khanin S.P. Office hmun turte district capital tur hmun thenkhatah te an enin ka hria a, a lawmawm em em mai a. Tuna kan district thar lo piang tur kan lawm rual hianin kan Sorkar-in a ti hlawhtling tura chak taka hma a han la hi lawmawm hlein ka hria a Mizoram hmasawnna duhtu leh ram tana rilru pe tak tak te kan ni a, Opposition a thu kan member zahawm tak tak te pawh hi Pu Deputy Speaker, anni pawh hi an lawm ve hlein ka ring a.

Hei lo pawh hi a remchan dan angin Mizoram mamawh dan ang leh kan ramina a kal zel turah kan sawi tak angin R.D. Block te, Civil Sub-Division thar te leh District thar te pawh hi a rawn piang chhoh zel turah pawh ngai ila. Tuna mi bik erawh hi chu kum 10 lai mai rahbeh kan ti dawn nge, rahhrual; vawikhat phei chu ka khawngaih khawp mai a. Mizorama thuneitu ber hi khaw pakhatah phei

chuan an lo hmuak a, khami khuua kal tur chiah pawh kha a ni lo bawk a a hriatthiamawm thoah ngai ila.

**PU L. THANGMAWIA** : Duh nei phut welcome hi chu ti khan an inchhang a, khatih laia an hawhaih hmelte kha TV leh Whatsapp-a rawn lang kha ka rilru ah hian a rawn lang a, khangho tan phei chuan zalenna dar (Deputy Speaker : I hun a tawp a) chhanchhuahna ni a rawn her chhuak ta niin ka hria a. Engpawh nise, ka rawn dil tawh angin Pu Deputy Speaker, ka inbuatsaihna hi ka han sawi zo law law ang a, ka sawi rei tawh lo ang Pu Deputy Speaker.

Chuvangin anni pawn he district lo awm turah hian an lawmthu sawi ve theihna nia ka hriat he House zahawm tak kaltlanga ka han ngen duh a chu he district thar function turah hian thil tam tak mipui in an lo tawiawm ngai te pawh a awm dawn niin ka hria a, chung ah chuan theihtawp chhuaha lo tawiawm a sorkar in chak lehzual a. Heng district-te a tihhlawhtlin theih nana mipui lam atanga tih fel ngai leh lo puih ngaiate pawh theihtawp min lo chhuahpui se tih kha he House zahawmtak kaltlang hian ka han ngen duh ni se.

A tawp berah chuan, Pu Deputy Speaker, he motion hi a nih ang ang hian a thain ka hria a, a lawmawmin ka hria a. Kan sorkar-in tihhawhtling tura chak taka hma a la hi a lawmawm kan ti hle tih hi, he motion-a hi min pass-pui ngei turin, kan opposition bench-a mite pawh ka'n ngen lawk duh ni se, ka lawm e, Pu Deputy Speaker.

**DEPUTY SPEAKER** : Minute 13 vel a la awm a, tunge han sawi leh ang. Aw, Pu Vanlalhlana i lo sawm ang u.

**PU VANLALHLANA** : Pu Deputy Speaker, ka lawm e. Member zahawmtak Pu C. Lalmuanpuia resolution hi ‘MNF sorkar-in kum 2008-a district thar 3 Khawzawl, Saitual leh Hnahthial district an hawnte kum sawm lai hlamchhiah an nih hnuah sorkar-in tihhawhtling tura chak taka hma a la hi lawmawm kan ti hle’ tih a ni a. A tha ka ti khawp mai a, ka rilru hmasa ah chuan ka thlawp khawp mai a, amaherawhchu question hour atang khan kan sawi kan sawi a, ka la hriat loh ka hriat thar chu district boundary siam fel a la ni lo tih a ni tlat mai a. Engpawh ni se kan rilru hmasa kan bansan thei lo ang a, tha kan ti a kan thlawp a, amaherawhchu sorkar

hian district boundary siam fel thuai hi chu a ba ve thung a ni tih kha ka'n sawi lang duh a ni.

UT laiin district pathum kan nei a, Aizawl District, Lunglei District leh Chhimtuipui District te kan ti a, chutiang chuan UT kan tluan a. State-ah pawh chutiang bawk chuan engemaw chen kan kal a. Kan hriat angin district panga a rawn pian belh ta a. Aizawl District atangin Kolasib District te, Mamit District te, Champhai District te, Serchhip District te a lo piang a. Chhimtuipui District nuai bovin Lawngtlai District te, Saiha District te a lo piang bawk a, tichuan district pariat kan nei ta a ni. Chumi hnuah chuan tunah district pathum kan han neih belh leh dawn a ni a. Khawzawl District te, Saitual District te leh Hnahthial district te, District sawm leh pakhat kan nei dawn a.

Kha kan chhehvel state kha kan thiante khan an han sawi a, a dik a. Tripura khu Sq. Km. 10000 vela zau a ni a, kan Mizoram chanve vel hi a ni, district pariat an nei a. Nagaland khi Sq. Km. 16000 leh tlem a ni a, district sawm leh pahnih an nei a. Manipur hi keini aiin an lian deh hlek a, Sq. Km. 22000 vel an ni a, district sawm leh paruk an nei a. Mizoram hi Sq. Km. 21000 leh tlem kan ni a, tunah district sawm leh pakhat kan nei dawn a ni a. La pian belh leh pawh hi kan chhehvel state te en chuan a pawi lo thei in ka hria. He district pathum, Hnahthial District te, Khawzawl District te, Saitual District te lo pian tur chungchang hi a ngaihnawm, politics involved pawh hi a thuk in ka hria, a kawngte hi bumboh a. Hmeichhia angin nau nei tur ni ta se a sehsam chhungte hi a rei ka ti.

2008-ah a thuin notification siamin district pek an ni a, chumi hma chuan rei fe an bei tawh a ni, UT lai atang tawhin an bei tawh a ni, district an duhna hi an tilang tawh a ni. Hnahthial-ah te phei chuan hemi district demand leh a process chhung hian thil nuihzatthlak deuh te, lungchhiat thlak deuh te, thil serious deuh te hi a awm nawk mai a. Ka'n sawi ang khan political drama mak tak tak te pawh a awm a, a tawpah an han hmu ta hlawl a. Ka ngaiantuah let a, 2008-a an hmuh pawh khan minister te, ram hruaitu te an hmu thin a. Thenkhat lo dawsawn danah kha chuan district an dil dawn a ni tih hre rengin district dil nachang hre lo ula chuan a ka ti ngawt ang che u tih tawngkamte kha kan han hmu a.

A hnuah nichina kan han ngaihthlak ang khan hotu thenkhat chuan “Tiamzela angin ka tiām ve ang che u,” a fuke kimin ka function-tir ang an han tia,

amaherawhchu a function leh hlem hlei lo a. Tichuan tunah district kan han inpe dawn kan tia, a boundary-a pawh chu kan la tifel lem hlei lo a. Chuvangin sorkar hian hmalak a tum a nih chuan heng hi a ngaih pawimawh hmasak turah ka ngai a. Tin, tuna district a pianna tur takah pawh hian mak ka tih deuh chu 2008-ah khan MNF ministry hun laia district hi notification chhuaha piang a ni a, in ti teh ang, function lo mahse. Mipui rilru pawh hi engemaw ni tehreng ni, inthlan kan hmachhawn a, Hnathial bialah te, Saitual bialah te, Khawzawl bialah te chuan district pe tute kha an tla vek mai a, an tling lo vek mai a.

Tichuan, hun a lo kal leh a, inthlan te kan han nei lehah pawh khatiang deuh bawk kha a lo ni chho a. Amaherawhchu tun district piang tur, misistry lo piang turah hian MNF party deuh vek hi an tling thung a heng district thar puanna turah hian. Mipui hmaa commitment-te tihlawhtlingin district te cabinet meeting-ah an han sawi chho a, tiang hian thu tisaa chang tur hmel te pawh kan han hmu chho turah ngai ta ila. Tun tumah hi chuan mipui pawh an lawmin ka hria, MP election kan nei a, mipui ten district petu chu lawmthu an hrilh em aw ka tia, Hnahthial bialah te, Khawzawl (Tuichang) bialah te, Saitual (Tawi) bialah te MNF candidate ten vote sang tak hmuin anmahni constiturncy bialah chuan an khingpuite an hnehin ka hria a, chung chu an lawmthu sawina veahte pawh kan ngaihsak te pawh a thain ka ring a.

District kan nei dawn ta a, hmabak thui tak kal tur an nei, a bul tan that a pawimawh khawp mai a. Nichina an han sawi ang khan sorkar pawhin a ngai pawimawh a, nimin budget speech kan ngaihthlakna-ah pawh DC Office tanna tur te, SP Office tur te SEDP atang pawhin cheng nuai 855 te dah a niin he district pathum piang tur atan hian a vai thuin cheng nuai 1500 budget-ah khan dah a ni ta a.

**PU VANLALHLANA :** Chu chu District pathum ten an inseum chuan nuai 500 theuhin an chang dawn tihna a lo ni leh a. Awm lo ata bul tan tur chuan nuaih 500 kha a tam lua lo mai thei a ni. Amaherawhchu an plan fund atang ten pawh theih a ni tih te kan ngaithla leh zel a, a lawmawmah ngai ta ila. Chuvangin a tawpa kan conclude duhna chu Pu Deputy Speaker, he motion, he Private Resolution lo lut a hi a tha a, a thlawp pawh a thlawp awm khawp mai, kan thlawp ang. Amaherawhchu, sorkar hian District boundary hi chu rang taka a chinfel a ngai a ni. District boundary D.C. ten min juristiction hre lovin , chin

hre lovin engtinng ro an rel ang? V/C boundary buai te nen chuan a in ang lo deuh hlek a ni. Pu Deputy Speaker ka lawm e.

**DEPUTY SPEAKER :** Tunge sawi leh ang aw, Pu Zama i sawm ang aw.

**PU V.L.ZAITHANZAMA :** Pu Deputy Speaker, ka lawm e, kan member zahawm tak Pu C.Lalmuapuia Resolution - MNF sorkar-in kum 2008 a District thar 3 Khawzawl, Saitual leh Hnahthial District pathum te kum 10 lai hlamchhiah a nih hnuah tihlawhtling tura chak taka hma a la hi a lawmawm kan ti hle.

Hei hi kan member pui zahawm tak tak ten an rawn sawi tawh a. Sawi tur tam tak ka nei lo nangin ka rilruah sawi loh theih loh eng emaw zat a awm a.

A hmasa berah chuan, District hmu thar 3 te ka lawm pui a, amaherawhchu, ka hmaa mi ten an rawn sawi tak ang khan kum 2008 daiha piang tawh kum 10 vei hnuah tihlawhtling tura hma kan han la chauh hi an khawngaihthlak hlein ka hria a. Tun term kum 5 chhung hi chuan pian to fel taka piang turin ka beisei a ni. Ka rilrua ka'n vei ber lai zawka chu District thar 3 kan nei ta a, a dang pawh a la piang zel turah ngai ila. Kan thusawi kan ngaihthlak tak kan Member zahawm tak takte thusawi han ngaihthlak khan a dang pawh a la piang zel turah ngai ila. Chumi lo piang zel turah chuan ka rilruah District hi hnam hming te hian piang zel tawh lo se a tha em aw, tih ngaihtuahna ka nei a. Mizoramah hian hei MLA bial 40 constituency tam tak hi khaw hming ni thin kha tunah hian lui hming te, tlang hming te tam tak thlak a ni tawh ang hian Mizorama District thar a lo piang leh a nih pawn tu khaw hming bik emaw, tu hnam hming bik emaw hian rawn piang tawh lo se, tih hi ka duh dan a ni a, chu chu ka'n sawi ve hrim hrim duh a. Minute 10 pawh kha hman kher tulin ka hre lova, ka sawi tum tak ka sawi zawh chuan duh tawk mai dawn ila.

He Motion hi a tha hle a. Amaherawhchu tuna ka sawi ang khan, District thar lo piang turte hnam hming leh khaw hming a nih tawh loh ka duh rualin, tuna Mizorama hnam hming leh khaw hming District awm te pawh hi, Pu Deputy Speaker, thlak leh dan a awm lawm ni, tih hi ka rawn sawi ve duh a ni. Chu chu ka rawn din chhan a ni e. Ka lawm e.

**DEPUTY SPEAKER :** Tunge sawi leh ang le? Pu Lalbiakzama i lo sawm ang u.

**PU H. BIAKZAUVA :** Pu Dy. Speaker, ka lawm e. Ka hming kha ‘Lal’ a tel lova, ‘H. Biakzauva’ tih ringawt kha a nia, kha kha min hriathiam sak dawn a nia.

Pu Dy. Speaker, vawiinah resolution duhawm tak mai sawi theia kan awm hi lawmawm ka ti a. Tin, a puluttu MLA zahawm tak Pu Lalmuanpuia pawh a fakawm hlein ka hria a. A rawn move-na chungchangah a inbuatsaihna a famkim thawkhat hlein ka hria. Tin, he resolution hi tihawm ngei ngei chi leh tun kan dinhmun anga kan thlir chuan lawmthu sawi hi kan mawhphurhna leh kan bat niin ka hria a. Sorkar a kal tan chauh a, hetiang thil lian tham tak mai hmachhawp a han nei nghal hi he sorkar chak tak pawh hi titha hlein ka hria a ni. Thil tum leh thil kalpui te a liantham hle a, a fakawm hlein ka hria a ni. District a tam hian mipui tan a zangkhai a, mipui tana rawngbawl tur kan ni a, ram kan hmangaih a, mipui kan hmangaih a, chumi te tana rawngbawl tura inpe kan nih avangin hetianga District 3 a han awm chho ta mai hi mipui hmangaihna leh ram rawngbawlna tak tak chu a bul a intan niin ka hria.

Tin, Khawzawl, Saitual leh Hnahthial te hian District neih hi an phu hlein hriatna ka nei a. Kan ngaihthlak tak angin kum 10 District a puan an nih hnuah a liam ta a. 1998-ah District 5 a piang a, chumi atanga kum 10 ah chiah District dang 3 a pian belh leh a, mahse, tihpuitlin a ni ta lova. Mahse, tunhmaa awm sa nen District 11 kan lo nei dawn ta a. Mizoram len dan ngaihtuah leh mipui tam dan ngaihtuah chuan a awm hlein kei chuan ka hria a ni.

Tin, District a tlem lutuk hian mipui hmun kilkhawr zawka awm ten harsatna tam tak an tawk a. Tehkhinthu han sawi ta ila, Lawngtlai East bial chu Lawngtlai leh Sangau R.D. Block huamchhung hmun karkik takah District pakhatin a awp avangin Ration Card siam turin Sangau bul Phawngpui tlang bul thuta awmte tan chuan DCSO Lunglei-in a bial tlat avangin Lungleiah kal daih a ngai ta mai a.

Tin, a piah deuhah Siaha bul Bualpui vel, Lungzarhtum vel amite chu DCSO Lawngtlaiin a bial leh daih a, Lawngtlaiah an kal a ngai a. Lawngtlai khaw chhung ami chu DCSO dangin a bial a. DCSO pathum kan hrawn mek a ni. Ka han tarlan duhna chhan chu District thar pathum kan lo neih chuan Department hrang hrangte

hi restructuring a ngaih ka ring a. Chutiang a nih chuan harsatna tam tak District pakhat chhunga District dangin Department thenkhat a rawn enkawl ang chi pawh hi tih bo a nih theih ka ring a. PWD-ah chuan Lawngtlai District-a Sangau RD Block huam chhung chu Siaha PWD EE-in a bial daih mai a, Lawngtlai District ni si khan. Tin, PHE angah pawh Siaha District-in a lo bial ta daih mai a. Tin, P&E-ah ni se Lunglei-in Lawngtlai District kha a va control leh daih mai a. Supply-ah pawh khatiang kha a ni a. Khatiang ang khan District kha kan in zen pawlh vek mai a. Hetia District pathum a lo awm tak hi chuan restructuring a ngaih ngei ka ring a. Department tam tak hi an District chhungah, anmahni jurisdiction-a thuneituten an control theihna pawh hun remchang tak in siam thei dawnin ka ngai nghe nghe a. Kei pawhin rawtnate ka nei nghe nghe a. District pathum lo piang hian Mizoram hmun hrang hranga Department hrang hrang te hnathawhna turah hian NASA takin a ti chak dawn a, min pui dawn a ni.

Tunlaiah document tam tak thingtlang amite pawhin an mamawh ang chi hi District Headquarters-ah te lak a ngai a. Chutiang la tur chuan hmun kilkhawr zawka awmte tan chuan District Headquarters pan vang vang a ngai a, harsatna tam tak heng hian communication chungchangah te, economics chungchangah te min siam a ni. Tin, Department thenkhatten survey an han nei a, anmahni District chhung an kal velna leh an chet velna atan pawh hmun kilkhawra awmte an District a zau avangin harsatna tam tak an tawk a. Ka ngaih dan phei chuan District hi hei aia tam pawh hi la awm se, tun aia mipui tana rawng kan bawlna kawngah hian awlsam phahna leh that zawkna tam tak a awm ka ring nghe nghe a. Administration chungchangah NASA takin min pui dawn a. Kan mipuiten NASA takin harsatna tam tak an pumpelh phah dawn a, an khawsak a zangkhai phah dawn hle a ni. Chutiang a nih avang chuan, he Resolution rawn puluttuin a rawn sawi tak ang khan a tulna leh a mamawhna kan ramin a hrin chhuah ve tawh ni pawhin a lang a. He resolution hi resolution tha tak, lawmthu sawina phu hliah hliah niin keipawhin ka hria a ni. Kha kha ka sawi theih chin ni se, ka lawm e.

**DEPUTY SPEAKER :** Dr. F. Lalnunmawia i lo sawm ang.

**Dr. F. LALNUNMAWIA :** Pu Deputy Speaker, ka lawm e. Vawiinah Private Members' Resolution Aizawl North III MLA zahawm tak Pu C. Lalmuanpuia'n a rawn putluh 'District pathum kan neih thar Khawzawl, Saitual leh

Hnahthial District ti hlawhtling tura chak taka hmalak a ni ta hi lawmawm kan ti hle' tia a rawn move hi Pu Deputy Speaker, han thlawp ve ka duh a. A move-tu hi ka fak duh a, a chin chhuakin, tun hma a history atangin a rawn sawi chhuak a, a bengvarthlak viauin ka hria a, keimah a mimal pawhin ka lo hriat loh thil te a lo tar lang a. Kum tam tak chhung District lo pian nan hian a lo inthoh tawh a, a rawn hlawhtling chho ta hi lawmawm hlein ka hria a ni. Heng District thar pathum hawn belh a nih chungchangah hian a bik takin kan sorkar, kan CM zahawm tak Pu Zoramthanga kaihruai sorkar hmalaknaah hian lawmthu sawi tur tam tak a awmin ka hria a. Tin, Hnathial, Saitual leh Khawzawl mipuite pawh thinlung takin ka lawmpui tak zet a ni.

Vawiinah hian ka rilrua lo awm chu he House zahawm tak leh kan Deputy Chief Minister, Khawzawl bialtu ni bawk Pu Tawnluia ka rilruin ka ngaiantuah chhuak a. Vawiina kan sawihona hunah hian han awm ve se a lawm ve tur zia te, a hlim ve tur zia te ka ngaiantuah a, a awm ve lo hi a khawhar thlak viauin ka hria a ni. Tin, kan Minister zahawm tak pahnih Hnathial leh Saitual bialtute vawiinah kan zingah an awm a. Anni hi ka thinlung takin ka lawmpui a, kum tam tak mipuite pawhin an lo beisei leh an lo nghah tawh tun huna tihhawhlin, tihpuitlin a ni ta hi ka lawm a, ka lawmpui a ni. A bik takin Saitual bialtu Minister zahawm tak Pu R. Lalzirliana hi ka lawmpuina thu a bik taka han sawi pawh ka duh a Pu Deputy Speaker. Ani hi sorkar liamtaah pawh bialtu, term nga a bialna a ni tawh a tun hi. Khatih hun chhung zawng khan Saitual District hi nau veiin a lo vei tawh thin tihte pawh kan lo hria a. Chungah chuan harsatna tam tak a lo tawk a. Ministry hmasa lamah phei kha chuan tuboh leh dolung inkara awm ang deuhte pawh kha a niin kan hre deuh a, a dinhmun kha a harsain a khawngaihthlak ka ti a. A lo vei em em, mipuite pawhin pressure nasa tak an lo pe tawh thin a, a bial mipuiten. Lehlamah sorkar lam atangin harsatna kha a awm ve bawk si a, tuboh leh dolung inkara awm ang deuhin kha leh chen kha a lo awm tawh a. Hetianga sorkar thar hnuaih harsatnate chin fela District pek an lo ni ta hi ka lawmpui hle a ni tih ka sawi duh a.

Tin, District hrang hrang khang Hnathial te, Khawzawl te pawh vawi tam tak Demand Committee-te dinin an lo bei tawh thin a, hlawhtlinna hmel an hmu ta hi ka lawmpui a. Tin, District kan han pek hi a party ang pawha kan policy, thuneihna sem zai, decentralization of power and functions chi khatah te pawh hian a ngaih theihin ka hria. Hemi thuneihna semzai hmanga hmasawnna rualkhai zawka kalpuite pawh

hi party ang pawha kan policy kha a ni a. Hemi hi SEDP-ah pawh tarlan a ni a. Hemi hmang hian thuneihna hmun hrang hrangah kan sem darh ang a, thingtlang kilkhawr zawkah te pawh hmasawnna tha tak a thlen te pawh ka beisei a ni. Tin, heng district tharte tan hian Aizawl kal kher lova thil tih fel theih a lo ni tur te, tin, Lunglei kal kher lova file han tihfel theih tur te; tin, Champhai kal kher lova thil han chinfel theih a ni tur hi, hun leh tha leh zung tam tak sen ngai thinte pawh kha sen ngai lo tura tuna District thar kan han nei hi a lawmawm hlein ka hria a. Tin, hei bakah hian District beisei, tih rih lohte pawh an awm a, hengte pawh hi District hmu kher lo pawh hian kan hotute hian, kan sorkar hian an ngaihtuahin ka ring a. Hemi thuneihna semzaina kawng hrang hrang hian Mizoram khawtinte hmalakna tur hi he sorkar hian hma a la turah ka beisei a ni. Tichuan Pu Deputy Speaker, vawiina kan Private Members' Resolution hi Opposition Group-te pawhin min thlawp tlang niin ka hria a, a lawmawm hlein ka hria a. Kan lawm tlang niin ka hria a, Zoram mipuite leh bial hrang hrang bialtu MLA leh he House pumpui hi kan lawm niin ka hria a, ka lawm tak zet a ni. Chuvang chuan he resolution hi lawm takin ka thlawp a. Kan vaia kan pass pui hi ka beisei a ni tih kha tawite in ka rawn sawi ve duh a ni e. Pu Deputy Speaker, ka lawm e.

**DEPUTY SPEAKER :** Tunge sawi leh ang aw? Pu H. Lalzirliana, Mamit bialtu sawm ang aw.

**PU H. LALZIRLIANA :** Pu Deputy Speaker, ka lawm e. Private Member Resolution Pu C. Lalmuanpuia, Aizawl North III bialtu rawn putluh, "MNF sorkar-in kum 2008-a District thar 3 Khawzawl, Saitual leh Hnahthial District a hawn te kum sawm lai hlamchhiah an nih hnuah sorkar-in tihsawhling tura chak taka hma a la hi lawmawm kan ti hle" tih hi ka thlawp a, a lawmawm ka ti hle a. IT world-ah chuan khawvel pumpui hi 'Global Village' min ti tawp mai a. USA a ni emaw, Tawngkawlawng a ni emaw, Global Village-ah chuan kan tel vek a ni. Heng district thar lo piangah hian a thatna leh a that lohna, merits & de-merits sawi tur tam tak a awmin a rinawm a. Amaherawhchu, IT savvy vek kan ni a. Google-ah te pawh han kal kual ila, a de-merits ai chuan a merits, a advantage a tam zawk zel a ni. Heng district thar lo piang hi kei phei chuan ka lawmna a zual leh zual a. Aspirational district, Mamit min chhawk zangkhaitu turte pawh hi ka melh ve deuh a ni. Chungte an awm thei a nih phei chuan a aia tam pawh hi kei chuan ka thlawp hial a. Phaileng District te pawh hi awm se, a thain ka ring hial a ni.

A thatna kawng sawi dawn ta ila, social leh economic leh politics-ah. Social lamah chuan urban leh rural inthliarna i ti mai ang, intluk lohna te pawh hi a tikiamin a rinawm a. District capital-a awm leh thingtlang kilkhawr deuha awm chu kan ngaihtuahna te pawh tlem chuan a insan hleih deuh em aw tih te; tin, thingtlang miin khawpui mite kan thlir dan te a dang em em a. Chungte pawh chu nasa takin heng district lo piang thar hian a tizim dawn niin a hriat a. Health leh Education chungchangah pawh a operating area kha a tlem avangin manage a awl dawn a. Chu chuan mipuite tan zirna leh hriselna chungchangah pawh hmasawnna a thlen ngei a rinawm a ni.

Tin, kan sawi tak ang khan politics chungchangah pawh ‘decentralization of power’ kan tih te kha kan operating area a zima, kan administrative area a zima, mipuite kan enkawl hneh phawt chuan khang zawng zawng pawh kha nasa takin improvement a awm dawn a. Rorelna tha zawk, better government a lo awm ang a, administration a lo fel ang a. Mipuite ah sorkar scheme hrang hrang leh policy te changtlung zawkin implement a lo awlsam dawn a ni. Chutiang chuan district hi a boundary-ah, a pawimawh berah chuan kan ngaihtuahna hi global phawt mai sela. Administrative convenience avanga kan boundaries hi chu engti kawng pawhin engtik lai pawha sutkian theih a ni a. A pawimawh berah chuan khawvelin global family, global village tia min puan mek lai hian keinin te reuh te te, a boundary tih vela kan lo buai kha a felin ka hre lova. Kan rilru hi global phawt mai sela. Tih tak takah chuan thingtlang leh khawpui pawh hi smartphone kan nei theuh a, khawvel lehlamah hian chhungkua member tinte pawh hi kan cheng theuh tlang a ni. Chutiang khawp chuan kan rilru ngaihtuahna, thingtlang kan ni emaw, khawpui kan ni emaw pawh hi a inkhairual khawp mai. Kan lifestyle te, kan dress code thlengin, kan style hi kan fashion thleng hian thingtlang a nih leh khawpui mi a nih pawh hi kan inhriat hran tak tak loh, Mizo angah ngat phei chuan. Vai ramah hi chuan a rethei leh hausa, thingtlang leh khawpui hi hmel en hian a hriat nghal ngawih ngawih a ni. Chutiang chu kan ni ve lova, kan vannei hle a. Chuvangin kan rilru hi global phawt mai sela, heti lai bawr vel a boundaries chungchang kha chu kan hotuten an tifel thuai turah ngai ila a tha awm e. Chuvang chuan he resolution lo lut hi a thlawpawm hle a, a lawmawm bawk a. Nasa takin kan hotute leh kan Minister te, kan MLA ten au hla leh kum tam tak nau veia an lo vei tawh kum nga zawh hmaa tih chhuaha a lo awm hi district bialtu te leh district mipui te zawng zawng lawmthu

ka hrilh a, ka lawmpui a. Chutiang chuan heng district 3 lo piang turte hi Zoram mipuite pawh hian ngaihtuahna zau zawk neiin global taka rilru ngaihtuahna neiin heng district 3 piang hi a lawmawm a ni tih hi mipui te pawh hian hre thar ila a thain ka hria.

Keini district, keini state tiatpu te pawhin keini aia tam hlir an nei a. A then chuan 20 chuangte pawh an nei a ni, kan han elpui ve te pawhin. Chuvang chuan district 3 lo piang hi mipuite tan pawh hmasawnna tur a ni tih hi Zoram mipuite hian hre thar leh ila a tha in ka hre khawp mai.

Vawiina Private Resolution lo lut hi ka thlawp e.

**DEPUTY SPEAKER :** Minute 6 vel a la awm a, kan hun pekah khan minute 10 kan ti a. Minute 6 vela sawi zo thei kan awm em aw ? Kan awm chuan phal ta ilangin. Kan awm lo a nih chuan House ngaihdan kan lak a ngai dawn a. Minute 6 chhunga sawi zo thei kan awm chuan, Pu Lawmawma i lo sawm ang.

**PU LAWMAWMA TOCHHAWNG :** Pu Deputy Speaker, ka lawm e. Kan hun hi hetiang hi a ni a, a rei lo thei ang bera sawi ka tum ang a.

He resolution MNF sorkar-in kum 2008-a district thar 3 Khawzawl, Saitual leh Hnahthial District a hawn te, kum 10 lai hlamchhiah an nih hnuah sorkar-in ti hlawhtling tura chak taka hma a la hi a lawmawm kan ti hle tih Pu C Lalmuanpuia, MLA zahawm takin a rawn pulut hi a lawmawm hlein ka hria a. Sawi kan ngaithla tam tawh a, fiah tak takin ngaihnawm tak takin kan ngaihthla tam tawh a. Chuvangin sawi thui pawh a tul tawhin ka hre lo a. Amaherawhchu, eng emaw zawnga ngaihtuah chuan Lunglei District atanga Hnahthial hi lo piang a nih ve bawk avangin han sawi hrim hrim hi a tulin ka hria a.

A tuah tawh ngang aniang tuna lo piang chhawmnun, tihnen, tihchak a ni tur hi, mihring ni ta se, phir 3 piang thawt ang a ni awm e. Nu leh pa hrinctu tan chuan lawmawm tak ni turin ka hria. A inthamna a rei a, a immung rei a, kum 10 tel tehmeuh a lo ni tawh a nih hi maw le! A huamchhung amiten an nghakhlel tawh bawk a, eng emaw chang phei chuan eng tawngkam nge kan ngaihthlak thin kha, “A hmin hmain kan hawlh kan hawlh a, a hmin hunah chuan a hmin kan za vaiin kan ei tleng ang chu maw le,” tih te pawh kha thu ngaihnawm tak tak ngaihthlak tur te pawh kha a awmin ka hria a. A lehlam zawng ngaihthlak nuam lo deuh zawng te,

hriat nawn chakawm loh te pawh awm bawk mah se, chuti chung chung chuan vawiinah hian tun hun hi kan lo thleng ta a. Tunah chuan a hun takah kan Pathian thu angin, engkim tan hun ruat a awm tih kha a lo thleng a ni ta ber mai a, dan rual lohin. Chu chu lawm taka kan pawm tlan mai hi a finthlak awm ber mang e aw, kan thatpui zawk awm mang e aw tih te pawh ngaihtuahnaah a awm a. A hun takah, a veitu tak leh a paitu takin a han hring a ni a. A chawm lian mek hi hmuh a nuamin hmuh a hrehawm loh hle in ka hria. Tunlai thalaite tawngkam takah, “A va tha khep khep” tih hi hnial rual a ni em ni ka ti a ni. Chuvangin, he resolution hi lawm takin he House hian pawm ang u, tiin ka han insawm hmasa duh a.

Heng district 3 te hi kum 2008 daiha lo puan tawh, lo hrin tawh niin enkawl loh leh chawm lohvin an awm tih kan hriat tawh leh kan ngaihthlak tawh kha a ni a. An nih tur ang ni tura ke an penna kawngah hian kan CM zahawm tak, kan House Leader, Pu Zoramthanga, hi lawmthu hrilh a phu hlein ka hria.

Hun hmasa lama district 5 kutbeng, kutruaka hnutchhiah ang ni hauh lo khan, a hmanrua tur, a ei tur, a in tur, a hnathawhna tur district mamawh pawisa, pawisa mai pawh ni lo in a thawktu tur te pawh ruahmanna an nei nghal a ni a. Hetiang thil kimchang taka ngaihtuahu, hrugaitu Mizoramin kan nei hi thil lawmawm tak a ni bawk a. Pahrawn ni lo, a khua leh tui te hmangaih tak taktu, pa tak tak, hringtu pa a nih zia te pawh hi tarlanin a awm in ka hria a. A chungah heng district 3-te bakah hian, Zoram mipuite pawhin lawmthu sawi kan ba hlein ka hria a ni.

Kan ngaihthlak tawh angin MNF party te chuan thuneihna insem zai hi a tha e, hmun khata thuneihna bawkkhawm luau lo hian kan ti a. Party dangte pawhin kan lo aupui tawh thin a. Tunah hian chu thil chu a takin kan hmu mek a. Kan tawng hi chu kan lo umphak tehmeuh mai tih pawh hi a lo lang chhuakin ka hria. Ram mipui te pawh hian hei hi kan hre mek niin ka hria. Thil lawmawm tak a ni.

Ram pum pui tan thil tha tak a ni ang tih hi a rinawm a. Heng district 3 lo piang hi lawma zaia, khuangpui leh khuangte nena chumchilha tlaivarpu tham te pawh a ni lawm ni le te pawh a tih theihin ka hria. Eng emaw zawng taka ngaihtuah erawh chuan keini Lunglei lam tan hian chuan a khawharthlak deuh ruih mai a. Hnahthial, kan thiante, kan lo thawhpui tawhte, a sur a sa hnuaiah pawh kan lo chetpui tawh te kha district thar a lo pian chuan, ram pum pui thilah lo chuan,

district ang chuan a hrang hrangin mahni seh seh mualah tiin lungthu kan tlawh hrang tawh dawn a nih hmel si a. A khawharthlak deuh ruih mai a, a lunglenthlak nghal deuh ruih mai. Chuti chung chung chuan kan ramin a thatpui ang a ....

**DEPUTY SPEAKER** : Hun hi a zo tlat mai a. Enge House ngaihdan? Kan sawi zawk tir law law dawn em ? Sawi zawkfir law law ang aw ?

**PU LAWMAWMA TOCHHAWNG** : Pu Deputy Speaker, tawngkam hnih khat chiah aw, a tlangkawmna chiah a ni tawh e. I phalna in. Ka lawm e.

Heng district 3 te tan hian, heng district thar lo piang, kal mek chawmlena a awm tur hi chhenfakawm a ni ngei ang tih a rinawm bawk a ni. Engpawh ni se 1 a niha hma hma a, ‘a fual awm diai duai em mai, a chhing awm tei tui em mai’ tih vang ringawta lo enghelh nghal ringawt lo hian, resolution lawmawm tak Pu Lalmuanpuia MLA zahawm takin a rawn putluh hi lungsi takin i pass ho ang u khai. Ka lawm e.

**DEPUTY SPEAKER** : Aw le, kan chawhma hun chu a zo a. Kan chawl rih ang a, dar 2-ah kan inkhawm kan tan leh dawn nia. I tawp ang u le.

#### **RECESS TILL 2:00 PM**

#### **2:00 PM**

**DEPUTY SPEAKER** : Aw le, kan rorel kan tan leh dawn ang a, chawhma lamah khan mi 10 in kan sawi a. Tunah tunge sawi leh ang aw? Minister zahawm tak Pu R.Lalzirliana i lo sawm ang u.

**PU R.LALZIRLIANA, MINISTER** : Pu Deputy Speaker, hun min pek avangin ka lawm e. Vawiina private member resolution Pu C. Lalmuanpuia rawn putluh, ‘MNF sorkar-in kum 2008-a district thar 3 Khawzawl, Saitual leh Hnahthial District a hawnte kum 10 lai hlamchhiah MNF sorkar-in tihsawhtling tura chak taka hma a la hi lawmawm kan ti’ tih a rawn pulut hi a lawmawm ka ti a. A affected area-a awm ka lo ni bawk a, chuvangin a chungah pawh hian lawmthu ka han sawi a ni.

He district lo piang tur hian kan bialte, tun hma chuan Saitual District tih a ni thin a, chutiang chuan kum 40 lai district ngiata lo sawi tawh thin an ni a. Kei pawh

MLA ka nih tan tirhah pawh khan Saitual hmun khi a rem em em a, tin, Aizawl District hi kan lian lutuk a, chuvangin tih tet kha tha kan ti khawp mai a. Tun hmaa district 4/5 a lo pian pawh khan beisei em em-in kan lo awm ve tawh thin a ni. Amaherawhchu thlan kha kan ni lo zel a, tun hnu ah MNF Ministry Pu Zoramthanga kaihuuai sorkar-in khilai te, Hnahthial te, Khawzawl te district a pe kha kan lawm hle a. Amaherawhchu tipuitling hman loin an tla ta si a. Keini Congress-a kan lo sorkar chhoh lai a ni bawk a, a hmingin party- ah, hotute zarah, mipui zarah, a kaihuraitute kan lo ni ve bawk a, kha term chhung khan kan nei thei ngei turah ka ngai a, beiseina nung nen kan lo thlir ve reng a ni. Tichuan 18<sup>th</sup> Dec,2015 khan Saitual Centenary lawmna kharna kan nei a, function ropui ber tih ni khan khatih laia kan Chief Minister zahawm tak kha khuallianah sawmin kei ka tel bawk a. Mipui tam tak an lo kal khawm a, tah chuan thu ka sawi a, ka thusawinaah chuan, ‘Saitual District hei sorkar hmasa lamin an lo pek tawh tipuitling tur hian engkim mai, tuilak tih te, office -te luah sen loh kan nei tawh a, chuvangchuan kawng chungchangah pawh khilam Ngopa lam te an lo chhukna turin Saichal - Saitual road, Tuivawl kaltlangin kan lo laitlang tawh bawk a, district ni tur hian kan inpeih thawkhat a ni,’ tih thu te ka sawi ve a, sawi tha ka intih ve tehlul nen khan Pu Deputy Speaker, ka hnungah kan khuallian khan thu a rawn sawi ve a. Chutah chuan kan ‘Home Minister zahawm tak leh kan hotupa in 2018 a helaia candidate beisei ni awm tak campaign pui tura lo kal ang maiin min han sawngbawl kha pawi ka ti khawp mai,’ a rawn ti chhuak ta hlauh mai a, a zahthlak hi ka ti veng veng a, mit lo chuan men ngaihna a awm chuang silo a, han hnial chi kha a ni tawh lo tawp mai si a. Khalai atang tawh reng khan district khilaia han function kha chu min tum pui lo hle a ni awm mang e kan hotupa chuan tih ngaihdan lian tak kha a lo piang tawh a. Ka biala lo ngaithla chiang te leh district duh em em ho khan telephone chhiar sen lohin, ‘Kan pu han tihdan che kha chu a va han in zahpah loh thlak deuh ve maw le,’ tih kha kan dawn hnem ber a ni. Amaherawhchu khan tha takin kan thawk ho cho ta zel a. Hun a lo kal zel a, Saitual-ah kalin Saitual piahah Dil Khan-ah a kal dawn a, tahchuanin Saitual, Keifang, Rulchawm leh khilai khua a hnaivai zawng zawng an lo inpun khawm a, Keifang-ah an lo ti ding a, thusawi turin an sawm a. District an ngenna kha an han pe leh a, thusawi turin platform ah a kal a, chutah chuan khawvela Chief Minister thusawi tawi ber record a nih ka ring a. ‘In bialah hian tih tur neia lo kal ka ni lova, hmun dangah tih tur neia kal ka ni a, ka lawm e,’ a ti a, a kalsan leh ta hmiah mai a, mipui an hrilhhai em em a ni. Chutiang

chu kan thil tawn kha a ni ta a. Vawiinah resolution a rawn lut a, hetianga lawmthu sawi theihna kan nei ta mai hi a ropui ka ti a, ka lawm leh zual a ni. MNF sorkar hi an fakawm hlein ka hria a, hotu hmasa ten thil an lo tih tawh, district chungchangah ngat phei chuan district 5, Congress ministry-in an lo pek tawh Kolasib, Mamit, Serchhip, Saitual, Lawngtlaite pawh kha tipuitling hman bik lo in an tla leh ta a. Chumi chu MNF sorkar lo piang khan a theih ang angin harsa takin hotu hmasate thiltih a ni a tiin kan ram ah Aizawl emaw, Lunglei-ah kan inbawkkhawm ringawt hi chuan mirethei zawk te, thinglang mite tan sorkar miliante dawr a lo harsa a. Tin, thil dang tam tak tribal certificate kan tih te, eng eng emaw la tur ringawt pawh khan, Aizawl-ah te phei chuan ni 2/3 hnuah lo chuan lak hleih theih a ni lo va. Chuvangin mipuite tan tiin an rawn tipuitling nghal a. Vawiinah heng district 3 - Saitual, Khawzawl, Hnahthial te tipuitling thei tura kan sorkar-in chak taka hma a rawn la hi a ropui ka ti em em a. Tin, chutiang piah lamah miretheite hi kan VIP te an ni kan ti thin a, sorkar hmasa lamah khan, a mawi em em a. Amaherawhchu, district kan ngaihtuah kim lo deuh hlek niin ka hria a. District hi tam zawk kan pek chuan tuna awm in ti em em te pawh a theih a nih chuan nakinah sorkar-in a la ngaihtuah zel ang a. Aizawl pawh tunhma chuan District Council-a awm kan ni thin a, Mizoram pumpui hi district pakhat a ni thin a. Sorkar a lo thang zel a, tun hunah chuan District 8 kan neih piah lamah vawiina kan implement tur te nen phei chuan 11 kan lo nei dawn ta a. Chutiang chuan mirethei ten milian zawk te, sorkar hnathawk te, an mamawhna anga awlsam taka an dawr zung zung theihna tura hetiang lo piang ta hi keini pawh hian mirethei te hi kan VIP te an ni ti ta ila kan inhme hle mai awm mang e aw tihte pawh ka rilruah chuan ngaihtuahna a lo awm a ni.

Saitual District kan nei thei hi keimah ngau ngau ah phei chuan politic-ah chuan ka achievement ropui ber a niin ka hria a. A tir atanga district kan neih theihna tura rilru lo pu kha ka ni chho a. District kan neih theihna tur a nih chuan mualpho deuh pawh. Pu Deputy Speaker, ka hmaa sawi te khan minute 5 lek lekte kha an sawi a, district neitu nih manah han sawi hnem deuh te pawh min phalsak la, a lawmawm ngawtin ka ring a, kan dil nghal bawk che a ni. Tunah hian Saitual District lo piang tur leh a dang district lo piang tur pawh hi a pawimawhna em em chu khawpuiah hna thar lak te pawh hi, (kha Pu Chhantea, Education Minister zahawm takin a rawn sawi ang khan) district wise-in kan ti ang, an ti a. Khatiang a

nih phei chuan district hi lo piang zur zur se a thain ka hria a. A chhan chu Aizawl-ah milian leh hausa tam tak an awm a, an fate school thaah, phaiah an dah thei a. Written Test leh Interview nikhuaah thinglanga mirethei zawk fate chuan school tha kan lo nei lo va, zirtirna kan lo dawng tha ve lo va, khawpui mi kan phak thei lo reng reng a. Chuvang chuan, district lo piang hi sorkar hna lakah pawh hamthatna tam tak mirethei fa ten an nei dawn niin ka hria a. District thar piang tura beh duh lo te pawh hi an fate emaw, thalaite phei chuan hna an lo neih theih ve na tur a ni tih hriaa helamah hian, district tharah kan bet zawk ang e an tih ruih ruih mai te pawh hi kan ring deuh a, kan beisei tak zet a ni.

Pu Deputy Speaker, engpawhniela, hun a tawp tawh si chuan ka duh tawk dawn mai ang a. Ka conclusion atan chuan tunah hian Aizawl khawpui ringawt hi kan eizawnna tur leh kan chak lakna tur a ni lo thuai dawn a, Aizawl hi hnuchhawn ram a la ni thuai dawn a ni. A chhan chu Act East Policy, India sorkar-in nasa takin rawn tihpuitlin a tum a. Chumi atan chuan Kawrpuichhuah leh Lawngtlai atanga kawngpui kan han sial chhoh te, Zokhawthar a border trade kan han neih ringawtte pawh khi tunah chuan mipui an an na ber chu phurh tur a tam lutuk a, Truck lian ke 12 a kal a, kawng a tichhia, tih kha a ni ringawt tawh mai a. Chuvangin, foreign atangin thil thar tha, kan ei/in tur man tlawm zawk si a lo la kal chur chur dawn a, khi lamte, saw lamte saw kan eizawnna tur a la ni tih hria in he resolution pawimawh tak mai leh lawmawm tak mai hi ka thlawp thu ka rawn sawi ve a ni e. Ka lawm e.

**DEPUTY SPEAKER :** Tunge sawi leh ang aw? West I bialtu i lo sawm ang u. Pu Zothantluanga.

**Pu ZOTHANTLUANGA :** Pu Deputy Speaker, ka lawm e. He House zahawm takah thusawi theihna hun hmasa ber min pek avangin ka lawm leh zual a ni. Private Members' Resolution sawi hma hian he House zahawm taka ka lo awm ve chungchang hi i phalna in sawi hmasak ka duh a Pu Deputy Speaker. General Election, 2018 – ah khan MNF-in chak takin sorkar a siam a. Keini bial erawh chu member zahawm tak Pu Lalduhoma, Serchhip-ah leh Aizawl West I- ah a tlin kawp avangin Serchhip lam awpin keini lam bial kha a vacate a. Hemiah hian bye-election-ah kan hotute leh kan party te duhsakna avangin mi tha leh mi fel tak tak tam tak awm karah kei min thlang chhuak a, ka lawm hle a. Amaherawhchu, a

lawmawm rual rualin a huphurhawmna lam pawh a tam hle a ni. Inthlan hmasak result kan enin pakhatna leh pathumna an tangho a, pahnihna kha kan ni si a. Hetiang inthlanna-a chak a har dan tur zia kha chu mi tu pawhin kan chhut thiamin a rinawm a. Amaherawhchu, Pathian leh mipui leh kan party zarah thlan tlinin ka lo awm ve ta mai a. He House zahawm taka member ni tura min thlang tlingtu Aizawl West I mipuite chungah he House zahawm tak kaltlang hian vawiinah hian lawmthu ka sawi a ni.

Tichuan, he bial hi bialtu tha tak tak ten an lo enkawl tawh thin a. He bial hi bialtu tha tak tak ten an lo enkawl twh thin a vawiina khu biala hmasawnna awm zawng zawng pawh hi kan bialtu hmasate hnathawh vek a la ni a. A bik takin bialtu kal chhuak Pu K. Sangthuama, vawiinah phei chuan damlohma avangin phai lamah enkawlin a la awm mek a, Ani khan a theih tawkin bial tan hian hna a thawk a, hmasawnna chi hrang hrang leh ruahmanna tha tak takte a nei a. Amaherawhchu, opposition MLA te a nih avangin duh ang leh tum angin a kal pur pur thei lo a. Hmasawnna tih tur tam tak hmachhawp a nei a ni tih erawh chu ka hria a, chuvang chuan hetianga bial aiawhtu ka lo nih takah chuan kan hotupa kal chhuak ta hma thlir te, a ruahmanna lo awm tawh te tihhawhtlinna kawngah hian theiawp chhuah ka tum a ni.

Tichuan, hmasawnna eng emaw chen kal tawh mahsela, khawpui chhung bial kan ni chungin hmasawnna chi hrang hrang he bialah hian thawh tur tam tak kan nei a Pu Dy. Speaker. Mizoram University awmna bial kan ni a, chuti chungin kha University-a kal tur chawmtu College pakhat pawh kan la nei lo a. Tin, chu mai chu sawi loh, Higher Secondary School pakhatmah sorkar sikul kan nei lo bawk a ni. Nichinah zawhna hmasa lamah khan Education kan ngaih pawimawh zia te, education-a hma lak a ngaih nasat zia thu te kan ngaithla a, chhanna te pawh kan nei a. Hemi kawngah hian hma lak nasat a ngaih lein ka hria a. Kan thalai tam takte an zir tur ang ang an zir zo a, an zir zawk khan hna pek mai tur te sorkar angin emaw, corporation ang pawhin tam tak a awm lova. Chuvang chuan kan thalai ten an zir tur an zawk hunah thawh tur an neih loh avangin an hun awl hmana kha an hmang rei thin a, an hmang thiam lova. Chuvang chuan suahsualna kawngah NASA takin Mizo thalaite, kan bial chauh pawh ni loin an kal mek a ni a. Hei hian kan society-ah harsatna min thlen a, ruihhlo chungchangahte kan kal a. Chuvang chuan heng han hmuh hian an hmakhua tur ngaihtuah hi kan sorkar tharin a tum a ni tih kan hriat

rual rualin House pumpui ang pawha kan ngaih pawimawh hi a ngai tak zetin ka hria.

Ruihhlo avanga hrisel lohna avangte hian kan thalaite an buai hle a ni tih pawh kan hria in ka ring a. Sawi awm loh a ni em ka hre lova, vawiinah hian keini bialah phei khu chuan Sairang kawngah, Airport kalkawnga awm kan ni a, Phunchawng leh Rangvamualte chu ruihtheih thilah kan lar em em a, Zoram pum ang pawha khaw lar tak te kan ni a. Hemi chungchangah hian an ruihhlo zawrhte khu man sak thinin anmahni pawh Jail-ah tantir thin mah ila, chu chuan kan harsatna a phuhruk si lova, a tidam chuang si lo a. Chuvangin, tun hma pawhin Aizawl veng eng emaw zatah chuan zu zawrhna te, ruihhlo zawrhna chi hrang hrang veng eng emaw zat lar thinte pawh kha kan nei ve tho.

Hemi tihbo chungchangah hian kohhran te, sorkar te, NGO-te tanhona avangin chung hun laia ruihhlo avanga veng hmingchhe tak tak thinte pawh kha vawiinah chuan veng tha tak takte, kohhran, NGO, rintlak tak takte lo dinna veng zahawm takte an lo ni chho ta ang hian, Airport kawng a nih avangin India ram sorkar aiawha lo kal thinte leh state dang atanga lo kal thin chi hrang hrang bakah foreign atanga lo kal thinte pawhin an hmuh hmasak thin a nih avangin, helai chinfel kawngah hian sorkar anga theihtawp kan chhuah loh chuan kan ram hi a mawi thei dawn lo a, a thianghlim thei dawn lo a. Chuvang chuan, a man ringawt lampang ni lo a, eizawnna dang an neih theihna tur atana kan sorkar-in SEDP a ruahmanna hnuaiah te leh kohhran leh NGO-te sorkar ang pawha theihtawp kan chhuah chuan veng pangngai tak, veng thianghlim takah kan chhuah thei ang tih hi ka beisei a.

Chuvang chuan, a bial neutu ka nih angin, in zavaia chumi kawnga kan thawhna tur atan min support turin ka sawm duh che u a. Tin, hun rei lo te MLA anga kan han awm ve chhung hian kan bial khu ka sawi tawh ang khan khawpui chhung bial ni mah ila, a thingtlang lampangte leh a veng mawng lampangah chuan rethei leh harsa tak tak te kan awm a. Damdawi inah hian tlawh ngai tam tak kan nei reng a, an damdawi man chu sawi loh, damdawi ina awmna tur in khul chhuak thei lo te hi tam tak kan la awm a ni tih min hriatpui ka duh a. Chuvang chuan, kan sorkar budget kan han ngaithlak thuakah khan Health Care-ah te pawisa tam tak dah a ni te hi a thlamuanthlakin ka hria a, sorkar chungah pawh kan mi leh sa, rethei leh harsa tak tak te, an hrisel reng thei bik lo a, an nat, an damloh changa mimal anga

intanpui sen pawh a ni lo a, theih pawh a ni lo a. Hemi kawngah hian sorkar-in Health Care changtlung tak, tha tak mai a buatsaih te pawh hi lawmawm ka ti a.

Chuvang chuan kan ram hi hmasawn (develop)-ah inngai thin mah ila education-ah te kan changkan si loha, health care-ah te kan changkan si loh chuan kan hmasawnna kha a khingbai dawn a. Hetianga sorkar-in ruahmanna tha tak a siam hi lawmthu ka sawi duh bawk a ni.

Tichuan he private resolution Pu C.Lalmuanpuia, Aizawl North III MLA zahawm takin a rawn present hi MNF sorkar-in kum 2008-a District thar 3, Khawzawl, Saitual leh Hnahthial district a hawnte hi kum 10 lai hlamchhiah a nih hnua sorkar-in tihlawhtling tura chak taka hma a la hi a lawmawm kan ti hle tih hi a tha ka ti khawp mai a. Nichinah Saitual bialtu MLA kan Minister zahawm takin a sawi ang khan hun rei tak district beisein a chang chuan tha rum tel lek lek khawpa district demand te a lo ni a, kum 10 lai ngaihthaha a awm hi a pawi hlein ka hria a. Chhungkuahte pawh hian nu leh pate pawh hian kan fanau te hi kum 10 han ngaihthah mai ila chuh, kan chhiat nasat tur ziate han ngaihtuah hian an lawmpui awm hlein ka hria a. Tin, Hnahthial, Saitual leh Khawzawl bialtu te, duh ngawih ngawiha nghak thin, mipuite pawh thlamuan ve thinte pawh vawiinah hian ka lawmpui bawk a.

Tin, Pu Zoramthanga kaihruai sorkar-in decentralization of powers a ruahmanna chungchangah pawh hian district thar lo awm zelte hian an district-ah hmasawnna a keng dawn a ni a. Kum 10 hmalama district ni ngai lo, vawiina district ni ta te han en hian thuneihna, hmasawnna khang district-ah khan a kal a ni. A bik takin district headquarters zawng zawng te kan en chuan khang biala khaw dang ai chuan hma an sawn a ni tih phat rual a ni lo va.

Tin, district wise anga department hrang hrang ten hma an han la a, budget te an han pe a, sum leh pai a lo luh na na na kha chuan district chhunga mipui ten education chungchangah pawh hma kan lo sawn a. Tin, kawng chungchangah te, eng chungchangah te, kawng engkimah hmasawnna a lut tih chu tumah inhrilh kan ngai lo va kan hre vek a. Chuvangin heng district thar implement ni mek leh implement chho zel tura an awm chho hi a lawmawm ka ti a. Chuvang chuan he resolution hi ka thlawp a ni tih Pu Deputy Speaker, ka han sawi duh a ni e. Ka lawm e.

**DEPUTY SPEAKER :** Member zahawm tak Pu Zothantluanga hi House-a a thusawi vawi khatna, speech a nih avangin hun kan han pe deuh a ni tih kha min lo hriat sak ula. Tichuan Pu Lalrindika Ralte i lo sawm ang aw.

**PU LALRINDIKA RALTE :** Pu Deputy Speaker, ka lawm e. Kan resolution hi tha tilo ngawt chu an awm ka ring lo va. Kei pawhin tha ka ti a, a lawmawm pawh ka ti a. Kan sawi duh dan erawh chu kan thutna a zir emaw, hetiang dinhmun beisei ve-a, chang ve ta lo kan nihin emaw kan ngaihdan a danglam thei viau in ka ring a, chutihrual erawh chuan ngaih pawimawhawm ber, ngaih pawimawhawm tak nia ka hriat chu he kan ram leh hnam thanna atan hian kan ram mipuite leh he sorkar hian district 3 tihhlawhtlin hi kan hna hmasa atan hian kan mamawh hmasa a ni em tih hi kan inzawh a thain ka hria a. Chu chu kan mamawh hmasa a nih chuan heng kan hmalakna te pawh hi a pawmawm zualin ka hria a.

Eng pawh ni se, ngun taka ngaihtuah hi a pawimawh hlein ka hria a. Kan ram leh hnam tana inpe te kan ni a, chutiang tur chuan kan ngaihtuahna pawh hmang zel ila thain ka hria. Tin, kan sorkar hian a ngai pawimawh tak tak a nih chuan sum leh pai a dah hran te hi duh angin a tam tawk lo hle a. Sum leh pai tam zawka a umzui hi a tul hlein ka hria a, chutiang tur chuan sorkar pawh ka beisei bawk a ni.

Pu Deputy Speaker, ka han sawi tel duh pakhat chu, inthlang ram kan ni a. Politics hi kan khel chho zel dawn niin a lang a. Hemi kalkawngah hian tu emaw mimal hamthatna emaw, political party pakhat hamthat nan emaw mipui sum hi hman loh tum a thain ka hria a. Mipuite tana hmasawnna tur leh he ram ngaihtuaha mipui sum hi kan hman a thain ka hria. Chutiang ngaihtuah chung chuan vawiinah hian hmalam panin i kal zel ang u tiin kan in sawm duh bawk a ni.

A tawp berah chuan Pu Deputy Speaker, heng Khawzawl, Saitual leh Hnahthial District tihhlawhtlin nghakhlel em em tute thinlung taka lawmpui chungin chumi thu tawite chu ka han sawi ve duh a ni e. Ka lawm e.

**DEPUTY SPEAKER :** Tunge sawi leh ang? Pu Lalchhuanthanga i lo sawm ang.

**PU LALCHHUANTHANGA :** Pu Deputy Speaker, ka lawm e. Pu C. Lalmuanpuia resolution kan han sawi khawm a, lawmthu lampang hlir kan han sawi a. Amaherawhchu kei chu lawmthu sawi tur vak hi ka hre lo a. Kan resolution hian a tum a thelh deuh niin ka hria. District 3 kan han ti a, a area kan la sawi thei si lo a.

Chuvang chuan tlema tihdanglam deuh hlek ka han rawt duh deuh a, Pu Deputy Speaker.

District thar tih karah hian district headquarters thar ti khan thlak ta ila a fel deuh berin ka ring a. Keinin lawmthu kan lo sawi ve vak vak lai hian district thar 3-a a area thenkhat, khaw thenkhat hi an lawmlo hle niin kan hre lehnghal a. A then phei chu an thinrim zawk mah a ni a. Chuvangin helaia lawmthu kan lo sawi vak vak hi a fuh ber ang em le tih te kha ka sawi duh te chu a ni a.

Tin, thil pakhat ka rilrua lo lang chu Khawzawl khi ka rilruah a lo lang a. An khaw thenawm 2 te district headquarters an nih kha chuan district headquarters la pek belh theih ang deuh te khan kan sawi a, pe ve leh law law ta mai ila, an 3 hian district headquarters te hi intlar chho tawh mai se a tha mai lawm ni tih rawtnate pawh ka han siam duh deuh a ni. Tichuan Pu Deputy Speaker, district headquarters 3, Khawzawl, Saitual, Hnahthial tihah khan a piaha district kha han paih leh ta ila, tichuan a fel deuh thluam lo maw tih ka han rawt a nih chu.

**DEPUTY SPEAKER** : Pu Lalrinsanga Ralte i lo sawm ang.

**PU LALRINSANGA RALTE** : Pu Deputy Speaker, ka lawm e. Vawiina kan resolution Pu C.Lalmuanpuia, Aizawl North III bialtu zahawm takin MNF sorkar-in kum 2008-a district thar 3, Khawzawl, Saitual leh Hnahthial District a hawn te kum 10 lai hlamchhiah a nih hnuah sorkar-in tihsawtling tura chak taka hma a la hi lawmawm kan ti hle tih resolution a rawn pulut hi tha ka ti tak zet a ni.

Pu Deputy Speaker, hei kum 10 chhung district pek tawh sa function thei loa awm char char kha kan hria a. Tin, party tinin kan political agenda lian tak a ni bawk a. 2008 election dawn khan Congress hotupa ber khan Hnahthial leh a chheh velah te pawh district thar pek a nih tur thu a tiaw dum dum tihte social media-ah kan hmu a. Party tin hi chuan kan ngai pawimawh vek ni hian a lang a. Inthlan dawnah kan aupui dum dum zel a. Amaherawhchu, he sorkar rawn pian hma, sorkar hmasa lo kal ta kum 10 chhung khan tihsawtlin a ni ta lo va. Chuvang chuan he district thar lo piang pawh hian kan hravuitute mahni thutama ding leh ding lo pawh a tilang fiah viauin ka hria tih ka sawi hmasa duh a ni.

Tin, heng district 3 rawn piang tur ten theihtawp chhuaha hun rei tak hma an lo lak tawhna te, an lo nawr tawhna te en hian awm ka tihpuiin tha ka ti hle bawk a ni.

Tin, Pu Deputy Speaker, Mizoram hi mihring tlemna hmun ni mah ila, tlangram chhengchhe tak tak kara cheng, inkalpawhna leh inbiakpawhnaah te pawh harsatna tam tak nei kan ni a.

Tin, inrelbawlna lamah pawh hma chak taka lak zung zung theih lohna kan niin ka hria a, hei vang hian state dangte nena khaikhina state dangahte chuan mihring an tama District pawh nei tam tur an ni alawm, tia kan khaikhin fo te pawh hi fuhlohma chen a awmin ka hria.

Tin, kan ram pianhmang a geographical condition avangte hian state dang district inthen dan population base-a kan inthen ve hi remchang lo bawkin a hriat a. Chuvang chuan Pu Deputy Speaker, vawiina district thar kan siam tak Saitual, Khawzawl leh Hnahthial te tuna an awmn mek na district Aizawl, Champhai leh Lunglei District te hi Mizoramin district kan neih 8 zinga a lian ber ber 3-te an ni a. Kum 2011 census-a a lan dan chuan Aizawl District hi 3500 sq.km. chuang a ni a. Tin RD-block 5 awmin khua pawh hi 508 lai a awm a, mihring phei chu 400,000 chuang kan cheng a. Tin, Champhai District hi 3185 sq.km. niin RD-block 5 awmin khua 94 lai a awm a. Tin, mihring pawh 120,000 an cheng a ni. Tin, Lunglei District hi a zau zawngah Mizorama district lian ber niin 4536 sq.km a zau a ni a. RD-block 4 awmin khua 198 lai a awm a. Chutiang khawpa district 8 kan neih zinga 3 zau leh lian tak takte an ni a. Hengah te hian mipui cheng tam takten harsatna an tawh thin tam tak a awmin a lang a. Nichina Saitual bialtu zahawm tak Pu R.Lalzirliana'n a sawi ang khan Aizawl District chhunga thingtlang tlema khaw per deuh ten District DC-a tribal certificate a ni emaw, eng emaw an rawn buaipui pawh ni 2/3 te an buai a ngai thin a. Hetianga district lian atanga district thar 3 kan siam thar tur hi a awm hliah hliah hian ka hria a ni.

Tin, Pu Deputy Speaker, kum 2014-a Andhra Pradesh atanga Telangana state siam thar a nih khan, Telangana state sorkar thar chuan district thar 31 lai a siam a, kan hre vek a. Tin, district lian tak tak awm mahse khang disctrict a siam thar zingah pawh khan district te tak Mizoram, kan district area zau zawng pawh phak lo te a awm ve bawk a. District te ber Hyderabad District phei chu 217sq.km chauha zau a

ni. Chutiang chuan Mizoramah pawh hian a population-a zir emaw, kan area emaw lam hi a niin ka hre lova, plain area leh helaia kan Mizoram awm dante a hran em avang hian sorkar function thil emaw, mipuiin harsatna kan neih leh mamawh kan neihah te pawh awlsam zawka chet theihna kan zawn tlan hi a thain ka hria.

Tin, district tam tak a lo pian hian hmasawnna hnathawh leh inrelbawlna lamah pawh awlsamna nasa tak kan neih phah thei niin a lang bawk a ni. Pu Deputy Speaker, kan ram dinhmun han en pawh hian district tlem ai chuan keimahni phu tawk leh awm tawka a tam lam kan nei hi a thain ka hria a. Central atanga tanpuina emaw, scheme hrang hrang lo kalah pawh hian district-wise angte pawhin rawn kal tam tak a awm thin a. RD Department hnuaiia National Rural Livelihood Mission-te pawh hi district-wise a lo kal niin, district a tam poh leh kan thalaiten heng hnuaiyah te pawh hian hnathawh tur tam tak an nei thei dawnin a lang bawk a ni.

Tin, Pu Deputy Speaker, district kan siam thar tak huam chhunga mipuite tan pawh hian sorkar-a an duh leh an mamawhte thlen zung zung a awl mai bakah sorkar lama kan official-te tan pawh hma chak taka lak a, a hmun hmaa han kal a, mipui tan development pekah pawh thil awlsamna tam tak a awm phah thei in a lang bawk a ni. Chuvang chuan Pu Deputy Speaker, India ram state thenkhat chuan district hi tam tak neiin district 4/5 te kha division-ah siam lehin chutah chuan division-te chu Divisional Commissioner-in a awp thin a. Hetiang ang em hi kan ram hian la thleng phak lo pawh ni se, hun a rawn la kal ang a, engtik niah emaw chuan kan ram dinhmun han en hian district te pawh kan la neih belh chho zel ang a. Hetianga administration mumal tak Divisional Commissioner-in a awp a, eng emaw harsatna kan neihte Secretariat-a rawn buaipua chinfel zel a, Aizawl rawn kalkhawm ngai lo deuh hian administration mumal pawh hi kan la nei thei dawn niin a lang bawk a ni.

Pu Deputy Speaker, sorkar-in district thar 3 a function tir tumnaah hian sum leh pai pawh tam tak he sorkar thar hian a dah nghal niin a lang a. Kan hmu theuh a, district 3 DC office-te buaipui nan ₹ 450 lakh-te, SP office buaipuina turin ₹ 195 lakh-te dah a ni. Tin, heng bakah hian district 3 an rawn function a an mamawh leh an harsatnate phuhruk chhoh zelna turin ₹ 855 lakh lai ruahman lawk a ni te hi lawmawm ka ti tak zet a.

Chuvang chuan MNF sorkar lo piang hi Pathian leh kan ram tan titu, thuthlung neitu a nihna angin, mipui leh harsa zawk, thingtlang khua te tan, kuthnathawktute leh mirethei zawk te tan pawh in hnemhnanna tlak, mahni thutiamma ding MNF sorkar-in district thar an pe tur hi lawmawm ka ti hle a ni. Chuvangin Pu Deputy Speaker, vawiina kan resolution Pu C. Lalmuanpuia rawn putluh “MNF sorkar-in kum 2008-a district thar 3 Khawzawl, Saitual leh Hnahthial District a hawnte kum 10 lai hlamchhiah an nih hnuah sorkar-in tihlawhtling tura chak taka hma a la hi lawmawm kan ti hle” ti hi tha ka tiin ka rawn thlawp a ni e.

**DEPUTY SPEAKER :** Aw le, Pu Ramthanmawia i lo sawm phawt ang.

**Pu RAMTHANMAWIA :** Pu Deputy Speaker, ka lawm e. Vawiin-a member zahawm tak Pu C. Lalmuanpuia resolution rawn putluh hi sawi a nuam hlein ka hria a. “MNF sorkar-in kum 2008-a District thar 3 Khawzawl, Saitual leh Hnahthial District a hawnte kum 10 lai hlamchhiah a nih hnuah sorkar-in tihlawhtling tura chak taka hma a la hi lawmawm kan ti hle” a ti a. Hei hi a dik tlat si a, dawt a ni si lo va. Chuvang chuan, pawmpui leh thlawp hi a phu hliah hliain ka hria a.

Politician-te leh ram hruaitute hi mipuiin min hmuh dan hi sawi ka duh a. Thu tha tak tak hi kan sawi a, kan intiam thin a, ram kan hruai dan tur leh kan sorkar huna ram kan hruai tum dan te kan sawi a, kan ziak a. Amaherawhchu, kan sawi ang leh kan intiam ang hian kan kal lo fo a ni. MNF danglamna chu kan ti ang a tih chuan a ti mai tih laia hi a ropui ka ti a. District lo piang hi a lawmawm em em mai a, tuna 3 mai ni lo, 1998-a khatih hun laia Congress sorkar-in a 5 a puan takte kha lawmawm ka ti a. A chhan chu tuna District 5 angte kha han thlir kir ila, district an nih hma leh tun hi chu inthlau tak an ni. A bial mipuite hmasawnna hmuh theihin a awm a ni. Chuvangin MNF sorkar lo piang khan kha District 5 sorkar hmasain an lo puan tawh kha phur takin, ram tan a tha tiin a tul ang ang tiphusui turin hma a la a, kum 5/10 chhung khan engkim a peih fel hman vek a ni. District puitling tha takin an function vek tih kan hria a. Khami district 5 chhunga mipuite hamthatna leh thil tam tak a ken tel kha a zar an zo va. Vawiinah chuan khang district 5 bial huam chhunga kan mipuite chu,

khang district a pian hma nen chuan khaikhin thamin an awm tawh a ni, hmasawnna ropui tak an dawng a ni tih kan hmu a ni.

Pu Deputy Speaker, vawiinah hian Aizawl khawpuiah lirthei chungchangah kan buai em em, lirthei dahna tura kan buaipui luih luih, kan pu hoa nimin maia function kan han neihte kha ka han ngaihtuah let a. Hmasawnna hi Aizawl-ah chauh a luanglut em ni tih mai turin thingtlang lam atangin zokhaw lamah eibar zawnna kawng a harsa a, chungrte avang chuan khawpui kan pan ruih ruih a. Mi in hnuaite luahin, harsa takin khawpuiah kan lut hlawm a ni. Chung chu vawiina khawpui kan tawt leh lirthei pawh kal hleithei lova intlan chhawk ngai ta hial kan nihna te pawh hi, a chhan tak chu thingtlang lamah hmasawnna development a kal rual loh a vangin harsatna kan tawh phah niin ka hria.

Chumi sukiang tura thil pakhat, vawiina MNF sorkar 2008-in, district thar 3 a lo puanna chhan pawh hi, chung zawng zawng chu tikiang thei lo mahsela a pawimawh em mai a, heng district 3 lo piang hian, tuna kan harsatna Aizawl-a engkim mai awm, engkim mai tihna tur hmun leh lamna tur hmun, mipui kan tlan khawmna, chumi atanga kan mipuite an hmakhua leh an hmasawnna tur, heng district 3 huam chhunga kan mipuiten an lo chan ve tawh dawn avangin, heng district 3 lo piang hian rah tha tak a chhuah ka ring a. Chu chu a lawmawm ka ti a. District 3 mai ni lo, nakinah phei chuan a aia tam te pawh a la tul mai thei e.

He mi kan sawi laia ka rirlua awm lian em em mai chu, (member zahawm tak takte pawh khan an sawi tawh a). RD Block-ah hian tun ai hian thahnem kan ngaih a ngai tih hi a ni. Hmasawnna reng reng central atanga project lo kalte hi district wise-te, RD wise-te a nih tawh avangin, chung kan neih tam theihna tur chuan district-te, RD Block-te kan neih tam hian thingtlangahte hmasawnna rualkhai takin a awm theih phah dawn a ni. Chuvang chuan, he mi kan sawi lai mek pawh hian RD Block pawh hi tun aia tam zawk kan hawn hi a ngai mang e aw. Ka bial chhungah khian Khawbung-ah kan nei a, khaw 26 kan awm a, kan intawm a ni. A karkik em em mai a, khingahte khian RD Block 2 han hawn belh leh thei ila chuan hmasawnna chu a zuanin a zuang ang tih hi ka ring tlat a. Chuvang chuan helaia vawiina kan han sawi atang hian Khawzawl, Saitual leh Hnahthial District-ah a bial

chhung mipuiten hmasawnna an han nei tur hi an lawmpuiawm a. Tun hmaa an neih ngai loh an han nei ang a, thil thar, hmasawnna thar an lo nei tawh ang a. District-in a ken tel tam tak sawi sen loh a awm a, chungte chu chung hmunah chuan a lo inhung tawh ang a. Aizawl kal ngai lovin thil tam tak tihfel theih a lo ni tawh ang a. Aizawl-ah pem a ngai tawh lo ve, Saitual-ah hian awmhmun ka khuar mai ang e, Khawzawlah awmhmun ka khuar dawn, Hnahthial-ah awmhmun ka khuar dawn tih hi Zokhaw lama kan unauten nakina an sawi dan tur chu a ni. Eizawn pawh a awl ta, Aizawl khawpui lirthei pawh kal hleih theih lohna ai chuan boruak nuam, sik leh sa pawh nuam zawk heng district 3 huam chhunga mipui chengte pawh hian heng district pathum lo piangah hian hlim tak leh thlamuang takin eizawnna ngelng het te an la nei thei ang tih ka ring tlat a, ka duhsak hle bawk a ni.

Nichina ka sawi tawh ang khan kan thutiamah din ngheh hi a pawimawh hlein ka hria. Kan thusawiah hian chiang ila, kan tih theih loh tur hi chu sawi lo ila. Vawiinah erawh chuan MNF sorkar-in Pu Zoramthanga, kan Leader zahawm takin ‘ka ti ang a’ tih chu a ti ta chat chat mai a, hei hi Pathianin min pek a ni tih vawiinah hian ka sawi duh a ni. Pathianin min pekna ang ngeia he ram hi retheihna, harsatna atanga min hruai chhuak turin Pathianin Pu Zoramthanga kaihruai MNF sorkar min pe a, chu sorkar chu mipui duh dan anga ram mipuite retheihna atanga khai chhuak turin tun inthlan tan hma mai ni lo va, 2008-a a lo intiam tawh angin, thuneihna a neih veleh a pawimawh hmasa berah ngaiin district 3 puangin, tihlawhtling tura chak taka hma a han la hi lawmthu sawi loh rual niin ka hre lo va, lawmawm ka ti a, ka thlawp a ni. Pu Speaker, ka lawm e.

**SPEAKER :** Pu C. Lalsawivunga i lo sawm ang.

**Pu C. LALSAWIVUNGA :** Pu Deputy Speaker, ka lawm e. I dinglamah khan kan Minister kha nichin deuh atang khan a phar a. Phar lo leh deuhin ka hria a, mahse min han sawm a, chuvangin ka din khalh mai ang a. Vawiina kan resolution hi ‘MNF Sorkar-in kum 2008-a district thar pathum Khawzawl, Saitual leh Hnahthial District a hawnte kum sawm lai hlamchhiah a nih hnuah Sorkar-in tihlawhtling tura chak taka hma a la hi a lawmawm kan ti hle’ tih kha a ni a. A pawmawm viauah han ngai phawt ila. Amaherawhchu, i dinglama thute hi lawm e ti lovin an hmel hi a ngui thup hian ka hria a. Pu Deputy Speaker, an lawm tak tak lo emaw ni chu aw ka ti a. Lawm hmel an pu lo tlat mai a, nge ni, kum 5 bak sorkar an

inring lo va. Vawiina lawmthu an sawi pawh hian a hming maiin an sawi nge ni ang aw ka ti a.

Kum 2023-ah chuan ZPM a sorkar tawh dawn si a. ZPM sorkar-in hma a lakna turah kan sorkar-in bul a rawn tan hi a lawmawm ka ti hrim hrim a, lawmthu i dinglam amite hnenah khan ka sawi a ni.

Vawiinah kan sawi leh kan ngaihthlak hi a tam viau a. Han sawi thui lutuk tur pawh hi a awm meuh pawhin ka hre lo va. District nihna hi chu kum 2008 ah daih tawh khan puan an lo ni tawh a, tun tumah hi chuan a thar teh hluai pawh ni lovin, district puan an lo nih tawh ang khan function tir a, implement chhoh tumna a ni a, a lawmawm hrim hrimin ka hria a.

Tin, kan Chief Minister Budget speech-ah te pawh khan kan hmu a. District thar pathumte tan hian ₹ 450,00,000/- dah hran a nih thu, chu chu, ₹ 150,00,000/- theuh kha an chan tur a nih tur thute tarlan a ni a. Amaherawhchu, district pathum Khawzawl, Saitual leh Hnahthial enkawlna tur leh a implement-na atana sum dah hi a beitham hle a. District thar implement-na tur leh mumal taka a kal theihna turin office pawimawh dah a tul dawn a. District Administration huam chin tur boundary pawh chiang taka siam a tul bawk a. Office hrang hrang bawkah quarters sak ngai a ni bawk dawn a. Heng zawng zawng la khawih loh leh a taka hmalakna awm lo chhunga lawmthu kan sawi hi a hma lutuk deuhin ka hria. Amaherawhchu, district thar 3 te hi kan lawmpui tak zet a ni.

Chubakah chuan SEDP nuai sing sarih leh sangnga atangin heng district hrang hrangte tan hian nuai 855 dah hran a nih thute kan ngaithla a, a lawmawm khawp mai a. Hmalakna kal chho tur hi hmuh pawh a chakawmin ka hria. Tunah rih hi chuan eng emaw zawnga ka rilrua ka ngaihtuah chuan kan lawm over ang tihte pawh hi ka hlau deuh a, kan over lo turah ngai ta ila. Engmah kutthlak leh thil a implement zawng a hmalakna tak tak a hmunah, ‘tah hian DC a thu ang a, tah hian Treasury office a awm ang a, tah hian SP office a awm ang’, ti a mumal taka thil a awm hmain lawmthu kan han sawi lo thei ta si lova, kan lawm bawk lah tak a. Mahse kan over lutuk ang tihte pawh kha thil hlauhawm deuh mai a nia. Kan over lo turah ngai ila. Heng zawng zawng hi tuna kan Chief Minister zahawm takin, a speech-a a rawn tarlan ang khan theihpatawp chhuaha kut thlaka hmalak chhoh tur a ni dawn tih kha a hmuh theih a. District thar mipuite tan pawh hian thil

nghahhlehawm tak niin ka hria a, ka lawmpui em em a ni. Vawiinah hian he House kaltlang hian kan lawmpui a ni tih ka sawi duh bawk a ni.

Tin, kan thenawm state te pawhin district tam tak an nei tihte kan hria a. Google-ah han lut ila an dinhmunte han bih hian a lo lang mai a, han chhiar mai theihte hian a awm hlawm a. Ka rilrua lawmthu sawina resolution kan sawi laia lo awm pakhat chu, kan ram dinhmun hi keini ho hian uluk tak leh fimkhur taka, kan thlira, kan ngaihtuah hi a tul hlein ka hria a. A chhan chu tuna kan dinhmun mekah hian, a nihna takah chuan engahmah hian intodelhna kan la nei miah lo a ni. Buh-ah kan intodelh lo a, hriau pakhat pawh hi kan la siam chhuak lo reng reng a. Kawlphetha-ah kan intodelh lova, kawngpui ni se kan dinhmun chu heti hi a ni a.

Tin, communication-ah thlawhna chungchangah pawh a ni a, lawng chungchangah pawh a ni a. Chutiang chuan, kan ram hian intodelhna hi engahmah hian kan la nei lo reng reng mai a. Chuvangin, vawiina district thar 3 (pathum) te kan lawmpuina thu kan sawinaah hian ka ngaihtuahna chi hrang hrang lo vakvelah chuan, kan kalchhoh zelna turah pawh hian ram leh hnam, sakhua thlir chunga ke kan pen hi a tul hle dawnin ka hria a. A bul atanga tan lo hian a ler atangin kan inhruai ang tih hi a hlawuhawm in ka hria. State kan nih hnuah kum 30 chuang kan lokal tawh a, kan hmasawn dan hi a lungawi thlak loh. Chuvangin, kan ram dinhmunte han thlir hian kan ram rorelna thu te hian he kan hun chhung ngei hian thinlung leh tih takzeta kan ngaihtuahna kan hman pawh hi a tulin ka hria a. Chuvangin, district thar 3 (pathum)-te pawh hian sorkar chunga beiseina an neih dan tur te zu suangtuahpui hian chak taka hma lakpui hi kan tihmakmawh niah ka ngai a. A ramri thu ah, DC-te pawh han indah dawn ta ila, SP-te pawh han indah dawn ta ila, administration thu ah hian Khawzawl a lo awm a, Saitual a lo awm ang a, Champhai a lo awm ang a, khatah khan a roreltu tur, mawhphurhna kengtu turte khan khawichin nge ka area tih kha an hriat loh chuan harsatna a piang nghal dawn a ni.

Heng zawng zawng hi Pu Deputy Speaker, kan hotutena an hriat sa a nih ka ring a. Chuti chung chung chuan thahnemngaihnaah district boundary fel taka siam vat hi a pawimawh dawnin ka ring a. DC office chu tah hian a awm ang a, Treasury office helai hmunah hian, SP tah hian a awm ang tih ruahmannate kha la kal chhohpui zel tur a ni a. Heta tan hian pawisa te pawh tam tham tak dah a tul dawn a ni.

ni. Sorkar-in hma lak ngei a tum hi a thlamuan tlak a, chutihrual chuan he House chhunga kan thusawi hi kan duh tawk mai ang a, kan ngaihthah mai ang tih hi thil hlauhawm tak niin ka hria a. Chuvangin Pu Deputy Speaker, District thar 3 Khawzawl, Saitual leh Hnahthial mipui zawng zawngte kan lawmpui rualin a taka hnathawh a tul a ni tih hi House kaltlang hian ka sawi duh a ni. Hetih rual hian thinlung leh tih tak zet in, ngaihtuahna tak tak sengin kan ram, kan hnam leh sakhaw tan hmasawnna hna thawk turin he resolution kaltlang hian ka ngen nghal bawk a ni. Ka lawm e.

**DEPUTY SPEAKER :** Hun i hmang thiam hle mai. Pu Lalruatkima, Minister zahawm tak i sawm ang aw.

**PU LALRUATKIMA, MINISTER :** Pu Deputy Speaker, (I vei lam amite kha i melh deuh zel mai a, he lam hi min rawn melh hreh deuh nge ni, kan hmailang a mawi lo deuh te pawh a ni mai thei a, i ring i herh ang tih te pawh kan hlau deuh khawp mai a) hun tha tak min pek avangin ka lawm e.

Vawiinah hian Private Resolution, “MNF sorkar-in kum 2008-a district thar 3 Khawzawl, Saitual leh Hnahthial district-a hawn te kum 10 lai hlamchhiah an nih hnuah sorkar-in tihlawhtling tura chak taka hma a la hi lawmawm kan ti hle” tih member zahawm tak Pu Lalmuanpuia, Aizawl North III bialtu putluh sawihona hun tha tak kan nei hi lawmawm hlein ka hria a ni.

Kan hriat angin Mizoram hian UT kan han nih chhoh atang khan district 3 kan nei a. August ni 31, 1972 khan Lunglei Sub-Division ni thin chu Lunglei District-ah puan a ni a. Chumi ni vekah chuan District Council 3 Pawi, Lakher leh Chakma te huam turin Chhimtuipui District, Headquarters atan Saiha puan a ni a. A tuk September ni 1, 1972-ah khan Aizawl Sub-Division of the Mizo District kan tih thin chu Aizawl District tiin, District khawpuiah Aizawl hmang tura puan a lo ni a. Heng district 3 tunhma atanga kan neih thin te khan September ni 1, 1972 atang khan hna an thawk tan a. Tichuan March 11, 1998 khan Aizawl District chu 3-ah, Aizawl District, Aizawl leh Aizawl East District Champhai-ah leh Aizawl West District Mamit-ah then turin notification chhuah leh a ni a. Amaherawhchu, July ni 29, 1998-ah khan notification thar chhuah lehin district 5-ah Zoram pum chu then a lo ni leh ta a, a awm sa te bakah. Chutiang chuan Aizawl District kha constituency 12 huamin headquarter atan Aizawl leh Aizawl North District tiin constituency

pathum huamin Kolasib headquarter atan hmang turin tih a ni a. Tin, Aizawl South District constituency pathum huamin headquarter atan Serchhip a ni a. Chhimtuipui District thenin, Chhimtuipui West District LADC leh CADC huamin then a ni bawk a. Chhimtuipui East District MADC leh Sangau constituency district huamin din a ni bawk a.

Tichuan sorkar a lo tawp a, inthlan kan hmachhawn a, sorkar thar a lo piang a. MNF ministry lo piangin chung district 5 puan, engmah hna la thawk si lote kha rawn enkawl chhoi chutiang chuan vawiinah District 8 kan lo nei ta a ni.

Kan hriat angin September 22, 2008 khan notification chhuah lehin Hnahthial District leh Khawzawl District leh Saitual District te puan a ni leh a. Chutihlai chuan MNF sorkar tlain sorkar thar a lo piang a. Chu sorkar thar chuan September 22, 2008-a district a puan a kha notify kha bawhzui lovin a awm ta reng a, kum 10 chhung zet khatiang khan hun hman a ni ta a. Hun a lo kal zel a, politics ball-ah te kan hmang a, sorkar kal ta khan June 26,2016 khan “District Reorganisation Committee” a din a, chu chuan district thar tih puitlin dan turte, district thar boundary chungchangte leh Sub-Division chungchangte a rawn rel a. Chutiang chuan ‘Report and Recommendation of District Reorganisation Committee’ hi 17.7.2017 khan thehluh a ni bawk a. Amaherawhchu district thar dinna tur emaw, district reorganize tur khan sorkar chuan hma a la zui ta chuang lova. Sub division thar dinna tur emaw, strengthen-na turin emaw hmalak a ni zui ta chuang lova. Politics ball-ah a lut lo thei lova, thenkhatin election-ah nasa takin kan tlangau pui a, ‘Tiamzela pawhin a tiam leh tawh a,’ te kan ti a. Tiamzellova khan a pe chuang reng reng lova, kan hre tlang vek a.

Tichuan kum 2013-ah election campaign vawrtawp a thleng dawn a, chutah chuan Delhi tlang atangin an hotu pa ber helicopter-in a rawn tlawlk chho a. Chutah chuan mipui hmaa chiang taka a sawi chu video clip pawh kan nei vekin ka ring a, you tube te pawh a awm a. Chuta a sawi chu, ‘Thla kim lova nau piang hi keini chuan district hi kan piantir dawn a, kan function-tir dawn a ni,’ a ti a. Sorkarna fawng an chelh a, amaherawhchu kum nga chhung khan nau piang, thla kim loa piang nia a sawi kha a function thei ta reng reng lova, an beidawng em em a ni. Tichuan kan ngaihthlak tawh ang khan Saitual centenary lawm nan present-ah khan a hmang mai awm mang e aw kan tih laiin khati lam kha an hawi zui ta lova.

Election dawn hnai a ni a, Saitual te, Khawzawl-te, Hnahthial mipui ten nghakhlel takin an thlir a, chutah chuan a bik takin Saitual khua kan hotu pa in a han tlawh dawn khan sikul naupang nen, mahni thiam ang tawkin, mahni chawlhi kawr nen an lo thawkchhuak a, an lo hmuak a, a ropui thei ang berin. Chutah chuan ‘duh nei welcome’ kan ti a, kan kalsan daih a, mipui an beidawng em em a, an mittui a tla a ni.

Chungte chu hun kal tawh a ni a, sawi sawi pawh hi a nuam lo in ka hre thin a. Chutah chuan Pathian leh mipui zarah sorkarna kan lo chan chuan MNF party chuan heng district 2008-a puan tawhte hi kan tihlawhtling ang tiin huaisen takin ke kan pen a. Tichuan nau chu a paitu ngeiin a hring a, a enkawl tluka tha hi a awm lo a ni an tih ang khan Pathianin sorkar thar min pe a. Chu sorkar thar chuan thla ruk chauh a liam a, notification a rawn chhuah ta ut ut mai a, chutah chuan district thar function dan tur te ruahmanna fel tak rawn neiiin, budget session-ah te, vote on account-ah te chu district thar rawn piang turah chuan (Deputy Speaker : Minute khat a la awm e) ruahmanna sorkar thar chuan chak takin a rawn nei zui ta bawk a. Saitual leh Khawzawl te, Hnahthial mipui tan chuan, ‘He sorkar tak hi chu aw!’ tia lawmthu sawi mawlh mawlh lo kha chu bat reng an nei lo tih pawh an inre zui a ni.

District thar a lo pian hian decentralization of power kan ti a, India ramah Naxalite kan hria a, Naxalite awmna chhan chu development a thlen tur ang a thlen loh avanga lungawi lo te an ni tlangpui a ni. Chuvang chuan power decentralize a lo ni dawn ta a, chung chu hnam dang, ram dang, state pawn amiten an chhawr dawn lo, a chhawrtu chu Zofate kan ni dawn a ni. Chutiang chuan nichinah khan member zahawm tak, i vei lam amite khan thahnemngai takin a boundary pawh a la awm si lo tihte kha an rawn sawi a, a dik ang. Amaherawhchu library-ah te kan han zawng a, kan han google-a, district thar din dawn reng rengin boundary chinfel hmasak phawt ni rawh se tih kha kan han zawng a, a lo awm reng reng lo a ni Pu Deputy Speaker. Chuvang chuan hla pawh hi an phuah a, an phuah hnuah a thlukte hi an siam deuh chauh tih kha, Pu Deputy Speaker, min lo hrithiam lawk la. Term hmasa lamah thahnemngai takin kan sawiho tlan thin kha, ani aiawhin i ngaihdan kha han sawi chhuahte pawh thain ka hria a. An lo mitthla, kum tam tak atanga an lo mitthla, MZ-010 han tih te, MZ-011 te, MZ-012 han tih te kha an mitthla ve vek a ni. Engtikah nge chu hun chu a lo thlen dawn? Tlumte thlira an lo thlir kha kumin budget session a lo thleng a, kan han zo ang a, rei lo teah hian chung chu an kutah,

an khuaah ngei motor registration chu an ti ve tawh ang. Leiman an khuaah an pe ang a, Revenue Settlement Officer-te an awm ang a, chutiang chuan district-in a ken tel tam tak kha awm a ni. Chutiang chu an nghakhlel a ni, chumi tleng ve zo lo mi tam tak district a han function ang a, an chhungte mittui a tla zawih zawih ang. Hmu ve se an tih ngawih ngawih te, hmu ve ta lo te kha an mitthlain a rinawm a ni. Pu Speaker, kan sorkar chak tak hian mipui beisei phak bakin hna an thawk a, kawng NASA takin a enkawl a, a chei hnum a. Chutiang chuan mipui harsatna chi hrang hrang, sikul naupang zing kal hma thin pum tha lo harsatnate sukiangin tan tlai te a lo ni a. Kan sawi seng lo, life time vehicle tax-te pawh one time anga kan pek thin kha instalment-a pek dan te a rawn duang chhuak a. Chini sem tur tein kan inbuatsaih a, khatiang khan kan election manifesto-a thil tam tak kan dah, kan lo tipuitling chho ta a. Chutiang chuan vawiinah hian district thar 3 an function thei tur hi i veilam ami te pawh Pu Deputy Speaker, an lawm ve tho in ka hria. An manifesto-ahte pawh khan ziak lo mah se, tih an duh ve reng, mahse khap bettu kha an awm mai chauh a ni. Chuvangin keinin kan han sutpui a, keinin kan han tihlawhtling a, keini chauh tihlawhtlin theih a ni lo, i veilam amite nen lungual taka kan tih tlan, kan lawm tlan vek tur niin ka hria a. Chuvang chuan heng khawpui district thar 3-ah hian an han zin mah nanga an lo zawn ve thovin ka ring. Chaw ei ah te pawh an lo sawm ang. A lawmawm em a ni ti rawh u. Sub-Division ni mai lovin district headquarters han tih te kha chu a dan hi a dang em em a ni. District headquarters an lawm dan tur chu, an beihna pawh a NASA, tha leh tui, hun an sen pawh kha a NASA em em a ni.

Chuvangin keini he House zahawm taka member zawng zawnge pawh hian kan lawmpui a ni. Zoram mipuite hian kan lawmpui a ni. Development chak leh zualin a kal dawn a ni tih hi a chiang em em mai a. Chuvang chuan vawiinah hian Pu Zoramthanga hruai MNF sorkar hi mipui sorkar chu a lo ni ngei mai. Pu Zoramthanga hi a thutiamah a lo ding a ni tih hi Zoram mipui ten chiang leh zualin an hmu a, chuvang chuan District headquarters 3 MNF sorkar hmasain a lo puan tawh Khawzawl, Saitual leh Hnahthial District-te hi Nau chu a paitu ngeiin a hring a, a enkawl zel dawn a ni tih hi Zoram mipuite, a bik takin a bial mipui te kan lawmpui tak zet a. He resolution hi he House zahawm tak hian lungual takin i pass ang u tiin ka thlawp a ni e. Ka lawm e.

**DEPUTY SPEAKER :** Dr. Vanlaltanpuia i lo sawm ang.

**Dr. VANLALTANPUIA :** Pu Speaker, ka lawm e, he Private member resolution Pu C.Lalmuanpuia, Aizawl N III bialtuin a rawn putluh “MNF sorkar-in kum 2008-a District thar 3 Khawzawl, Saitual leh Hnathial a hawnte kum 10 lai hlamchhiah an nih hnuah sorkar-in hlawhtling tura chak taka hma a la hi lawmawm kan ti hle” tih hi kei pawhin lawmawm ka ti a, han sawi ve ka duh a. Ka thu sawi hi hmun hnih ang deuhin pakhatna ah ka lawmna thu sawi ka duh a. Tin, a dawt lehah hian Lunglei lam leh he bial, District headquarters pakhat Hnathial-in a lak tur deuh kha, chumi content atang chuan sawi ka duh deuh bawk a.

Pu Lalmuanpuia, a rawn puluttu hi Pu Deputy Speaker, a fakawm hlein ka hria a. Vawiinah hian a rawn putluh dan te a chiang em em a, amah a in-convince mai ni lovin document a la tha a. He a thu rawn putluh ah hian chiang takin Zoram mipuiten he district thar hawn tur chungchange thil inthial vel hrang hrang a rawn phawrh te hi lawmawm ka ti a. Zoram mipuite aiawha roreltu a nihna hi a hre chiang hlein ka hria a. Tin, he House rorelhate a tizahawmin a tihlu hlein ka hria a, fak a phuin ka hria a ni.

Pu Deputy Speaker, heng district thar nei tur Khawzawl te, Saitual leh Hnahthial mipuite thinlung takin ka lawmpuina thu he House kaltlang 14.6.2019 hian hlan ve ka duh a. An harsatna tawte a nasa em em a, thawkkhat lai phei chu Hnahthial lam atang khan kein an rawn kal a, long march an rawn nei a. Ke durh vekin Hnahthial atangin an rawn kal a, Aizawl kha an rawn thleng a. Chutiang chuan heng bial lo beiseitu, mipui hoten an tuar nasa em em a. Khawvel sorkar tha tehna good governments indicators-a entirtu hrang hrangah hian effective sorkar, a ngaihna hria sorkar leh sorkar hriam tha kan tih ang chi te, langtlang, transparent sorkar kan tih te; tin, responsive sorkar kan tih ang chi te hi a tehna lian a lo ni a. Responsive, mipuite mamawh rang taka phuhru thei sorkar nih hi sorkar tha tehna a lo ni a. Tichuan Zoram mipuiten an mamawh an tlangau te rang taka phuhru thei sorkar a lo piang hi lawmawm ka ti a. Hei hi sawi lan a tulin ka hria. Aizawl leh Lunglei leh Chhimtuipui district a pian hnuin district issue kan khel leh tan chu 1996 atangin a ni, tih thute kan ngaithla tawh a. Chuta tanga han chhiar chuan tun kum hi kum 23-na lai a ni tawh a. Heng district chungchang kan khel, nau kan vei chhung hi a rei em em tawh mai a, kum 23 lai a ni tawh a. Tin, heng district thar hawn tur

notification, Sept 12, 2008-a chhuah a nih atangin kumin hi a kum 11-na a ni bawk a. Pan hnai la, Pu Deputy Speaker, inthoh rei tak mai kan han khei chhuak ang deuh kha a ni a. Mipuite mamawh leh mipuiten hrehawm an tuarna te hi heng district thar kan hawn rual hian solve a lo ni ta turte hi a lawmawm ka ti em em a. Vawiinah hian chung thute chu han sawi ka duh a ni.

District thar hawn hi kan sawi tak ang khan, kan ram hian a mamawhna tam tak a awm a. A pakhatnaah chuan kan ram topography te, kan ram pianhmangte kan en a, tlangdung harsa tak mai te leh khirhkhan tak tak te an ni a. Tin, chutih laiin kan ram a la changkang tawk lova, road communication te, transportation lam te a la tha lo em em a. Mizorama kawng zawng zawng hi chhim leh hmar tlang kal zulzui deuh vek kawng a ni a, a vang tan zawng kawngte pawh kan nei chhe em em a, kan inkal pawhna kawng a harsa em em thin a. Tlang dung inauh phak mai tura awmte kha han inkalpawh tur chuan thui tak hel te a lo ngai a. Chutiangte han en chuan district thar kan han hawnah hian mipuiten awlsamna tam tak an neih phah ngei dawnin ka hria a. Chu chu a lawmawm ka ti a ni.

Tin, administrative gap kan tih, rorelna chungchangah pawh thil harsa eng emaw over lapping kan tih te, criss-crossing parallel thil tam tak awmte hi district thar hawn tur hian a rawn solve ngei dawn a. Chungte chuan district thar kan neih tur hian mipuite ah thil lawmawm tam tak a thlen dawnin ka hria a ni.

Development chungchangah hian Pu Deputy Speaker, kan inkhairual lo em em a. Kan sawi tak ang khan thingtlang lamah te thil kan la nei chhe em em hlawm mai a. Aizawl khawpuiah thil hrang hrang administration tam tak hi kenkawh a lo ni a, district capital thenkhatah te nen. Thingtlang mite an lo kal a, rei tak tak an in hmun lo ram chungchangah te thil ngaiantuah turin mi inah harsa tak takin an lo thleng a. Chuvang chuan tun tuma district thar kan nei tur hian mipuite ah awlsam zawkna tam tak a thlen dawnin a lang a ni. Heng hian kan lawmna a tizual em emin ka hria a ni.

Pu Speaker, Mizoramah hian thangthar hoten harsatna an tawh lian em em chu unemployment problem hi a ni a. Hnate hi a vang em em mai a. University-ah te zirtirtu niin kum eng emaw chente kan lo thawk ve tawh a. Ka hmuh chian em em chu kan zirlai tha tak tak te, lehkhathiam, nun uluk tak takte pawh hian hna hi an hmu lo em em mai a. Civil Services-a in ziak tlingho chin tlemte te hi a vannei

zualpui an ni a. A tlangpuiin miin hna an hmu lo em em a. Lehkhathiamte tan pawh hna a vang tawh a ni. District kan hawn rual hian hna tam tak, employment opportunity a rawn siam dawn hi a lawmawm ka ti a, thalaite tan phei chuan kut benna tur hi a tamin ka hria. Thalaiten heng district hawn thar rual hian hna tam tak an hmu ngei dawn a ni. Chuvang chuan Pu Zoramthanga kaihruai sorkar-in district a rawn tipuitling tur hi thalaite tan chuan support tur a niin ka hria a, hei hi lawmawm ka ti em em a ni.

Pu Speaker, pakhat ka sawi leh duh chu Lunglei North constituency bialtu ka nihna angin Hnahthial district kan lo hawn dawn hian saw lam context-in tlem te han sawi ka duh a. Kan bial Lunglei North hi Hnahthial district-in a lak hek tur anga ngaihna hi a lian zual a, a effected constituency lian deuh ber ni ah ka inngai a. Chuvang chuan mipui aiawha thlan ka nihna in heng district kan lo hawn dawn takah hian ka bial chhunga khaw thenkhat entirnan Chengpui khua te, Zotuitlang te, Kangmun South te leh Mausen te, Hmuntlang khua te, Pangkhu te, Lungmawi khua ho te hian a hnaih zual kan ni a. Chhiphir tlangdung, Zote, Bualpui V te, Haulawng tlangdung hrang hrang hote pawh hi lut tur ang a ngaih kan ni a. Hengte aiawha ka sawi duh chu Pu Speaker, hei hi pek kan lo nih chuan development works hi tam tak kan bialin a nei dawn niin ka hria a, hei hi kan lawmna a ni a. Hei hi min pe a, min rin lut te a lo nih chuan communication, road transportation tha te sorkar-in min pek hi kan mamawh lehzual dawnin ka hria a. Tin, district demarcation kan siam lai hian a theih hram chuan kan bial khaw mipui ho te pawh kan aw te min ngaihthlaksaka; tin, RD block-te leh office hrang hrangte kan dah hunah pawh, a khawpui lianhote pawhin an rawn dilna te khawngaih taka min lo ngaihthlaksak tur leh remchan zawkna te, entirnan Pangzawl khawpuite pawh Hnahthial hnaih a lo ni a. Chung hote pawhin an dil, office hmun an rawn dil ang chi te pawh min lo ngaihthlaksaka, Chhiphir tlangdung lam te pawhin, chutianga he bial mipuite aw pawh sorkar-in min ngaihthlaksak turin vawiinah hian ka ngen nghal duh a ni e. Ka lawm e.

**SPEAKER :** Aw le, kan tih dan thinah dar 4 pelh loh hi kan tih dan tlangpui a ni a. Tin, thu han inchuh leh han inhnial deuh a awm lem lo a, a lawmawm e, mi 18-in an sawi tawh a. Saiha atangin Lawngtlai-ah, Lungleiah, khitah Khawbung; tin, hetah Pu Thangmawia te, Pu Rinsanga Ralte te, Pu Dika te, heti hian an hual nasa tawh mai a. A tul riau bik kan la awm a nih chuan thil dangah ngai ta

ila. Leader of Opposition 2 hi an la ding loin ka hria a, kan pelh hmel dawn tlat mai. Minister-te pawhin an sawi tawh a. Dar 4 hi kan pel dawn tlatin a lang a ni, Dr. Mathlantea kha a nih sawm ang aw.

Pu Speaker, ka lawm e. Pu C Lalmuanpuia resolution chungchangah hian tlem a zawng sawi ve ka duh a. Hun a tlem deuh tawh a, kan Group Leader te khan hun an nei thei turah ngai ila. Ka sawi rei vak lo ang e.

1<sup>st</sup> Five Year plan tih chhoh a nih khan District Development Council, din chhoh te a lo ni a. Tin, 1967-ah Administration Reforms Commission din a ni a. Chutah chuan district lam kaihhnawih thil ngaihtuah a ni a. Committee hrang hrang, Kanwalla commission tih te, Hanumantharau Commission te, GVK Rau Committee te khan district hi engtin nge tih changtlun zawk a nih theih ang? Engtin nge district planning hi kalpui a nih theih ang tihte a lo buaipui tawh a. Tin, Mizoram bikah phei chuan kan lo buaipui viau tawh a. A history phei chu ka hma ami ten an lo sawi tawh a, sawi ka tum lem lova.

District an siam chhan chi hrang hrang a awm thin a, tam tak karah point 4 lek han tarlang ila. District capital pan chungchangah mipuiten buaina an tawk thin a, harsatna an tawk thin a. Tin, a pahnihnaah chuan office dawr chungchangahte buaina an tawk thin bawk a. Tin, district thenkhat phei chu communitisation, hnam bik han inhunga duhte an awm a. Movement-te a lo awm chho a, loh theih lohin district-te siam a lo ni leh a. Tin, a palinaah, development-in ram kilkhawr ber a thlen awlsam zawkna atan ruahmanna siam a ni thin a. Chutiang chuan district te siam a lo ni thin a.

India ramah district hian 725 a awm a, chung zingah chuan Mizorama kan district neihte hi a te pawl kan ni a. A tet lamah chuan Arunachal amite ho hi a then an te hlawm a. Anni hi an ram a lian deuh a, an inthen darh angreng thung a. Saiha hi a te lamah 13-na kan ni a, Serchhip 15-na, Kolasib hi 21-na a ni a, Mamit 23-na, Lawngtlai 30-na a ni a, Champhai 31-na a ni a. Lunglei leh Aizawl hi chu tlemin kan lian hret a. Chutiang chuan a te lam pawlah kan awm a. Then hran leh kan nih chuan Mizoram area 21081 hi district 11-a han then chuan average in 1916 sq.km bawrah kan awm ve dawn a ni a. India ramah chuan a te pawl kan ni dawn a. Amaherawhchu, district siam hi Khawzawl, Saitual leh Hnahthialte hian an nghakhlel tawh khawp mai a, an lawmpuiawm bawk a, ngaihtuah tur tam tak a awm

bawk a. District siam hian nghawng tam tak a nei thei bawk a. Chungah chuan point 6 lek ka han tarlang ang a.

Pakhatnaah chuan hna a awm tam phah dawn a. District office-ah hian DC, SP office tih te, DTO tih te leh department office hrang hrangte siam belh a ngai dawn a. A bial chhunga awm te tan hna pawh a tam hle dawnah ka ngai a.

Pahnihnaah, revenue leh capital expenditure lam a san phah dawn a. Development ten infrastucture lam leh thil dangah a tawrh phah dawn a . Hetah hian fimkhur a ngai khawp mai.

Tin, a pathumnaah kan sawi kan sawi boundary chungchangah harsatna a awm dawn a. District-te kan la siam leh dawn a nih chuan khaw hming ni lovin, hnam hming ni lovin, ram emaw, tlang emaw, lui emaw, khatianga siam kha a finthlak khawpin ka hria.

Tin, a palinaah district dil belh leh an awm ngei dawn a, politics-ah a lut leh ang a, inthlan leh dawnah chuan thawm a rawn ri ring leh viauin ka ring a. Chu chu a effect leh dawn a.

Panganaah chuan department kan neih sate an indaih lo dawn hle a, district dang atanga hmui ngaite an awm ang a. Kan rin ang khan a then chu an ni leh dawn lo a ni. District beiseih tam tak hian an beisei angin office-te an nei rup rup thei dawn lo a, an rilruah te pawh a awm nghal a ngaiin ka ring a.

Tin, a paruknaah district anga central lam sum kan lak theih a tam sawt dawn a. Thalaite tan te leh district mipuite tan pawh tangkai taka kan hman thiam a ngai dawn a, district mipuite kutah a innghat dawn a ni. District lo piang hi a bial mite nichina ka sawi ang khan ka lawmpui khawp mai a, a nihna tur ang tak leh awmze nei taka a kal theih nan leh hmasawnna an hmuu ngei theih nan duhsakna ka hlan bawk a ni. Ka lawm e.

**SPEAKER :** Tunah Opposition Group Leader Pu Zodintluanga, member zahawm tak i lo sawm ang.

**PU ZODINTLUANGA :** Pu Speaker, ka lawm e. Private members' resolution rawn puluttu member zahawm tak Aizawl North III bialtu MLA Pu C. Lalmuanpuia hi a inpuahchahna a nasa hle a, research pawh a bei nasa hle a ni tih a

lang a, a rawn move atang khan. Amaherawhchu Pu Speaker, vawiina lawmthu sawi hi chu a la pre-mature, a la hun lo deuh em aw tih hi ka ngaih dan a ni a. A chhan chu i dinglama thuten nidangah chuan resolution kan neih reng rengin minute 10/15-te kan in dil belh thin a. Vawiina thusawitu tam zawk hian minute 5, minute 6 bak sawi tur an hriat loh atang khan he resolution hi a la hma a ni tih hi a chiang em em a ni. Chuvang chuan, an thusawiah pawh khan an fimkhur tlang hle a. District pathum nei tawh anga an han in sawinate kha vawiinah chuan Pu Speaker, district pathum hi a la piang tlat lo. District pathum dinna tur pawisa te an dah tan chauh a ni a. Tin, tu tute nge, khawilai nge chu district chu tih tur pawh a la awm loh laia vawiina lawmthu lo sawi hi a la hma deuhin ka hria.

Nichinah khan member zahawm takten an sawi a. District siam dawnin khawi library-ah mah, khawi hmunah mah district boundary siam tur a ni, siam lawk tur a ni tih an hmu lo an tih kha Pu Speaker, a dik khawp ang, a awm lo ang. Amaherawhchu, mi pangngai leh rilru tak tak seng tan chuan khatiang ti hmasa lova district puan ngawt hi chu a fuh lo a ni tih chu an chiang ang. Kum 1998-a district panga Congress sorkar-in a lo puan tawhte kha awlsam taka tihhlawhtlin chi a ni. A chhan chu a tih tur zawng zawng tihfel tawh a ni a, district boundary tur tihfel sa a ni a, district-in a huam chin tur te, khawi khua nge chumi district chhunga awm tur zawng zawng tihfel sa veka kal san kan ni. Khatiang kha chu Pu Speaker, awlsam taka chhunzawm theih mai a ni. Vawiinah chuan khawi hi nge, khawi khua hi nge chumi district-ah chuan awm dawn, khawi khua hi nge awm dawn lo tih hi kan la hre thei lo a ni. Tukin question hour-a ka zawnahah pawh khan sorkar-in district boundary a siam tur chungchangah eng nge hmalakna awm tawh tihah khan hmalakna mumal sawi tur kan la hre tlat lo.

Chutih rual chuan vawiinah resolution kan han pulut hi a la hma ka ti a. Chanchinbuah te kan lo hmu a, tun Independence Day-ah chuan district headquarters-ah district DC-ten flag an rawn pawt pharh tawh ang tihte kan hmu a ni. District headquarters-a a khaw mipuite chu kan lawmpui em em. Amaherawhchu chutih lai chuan a tih tur, a nih ang tur tih fel hmasak loha hetianga puan hi thil pawi tam tak a la rawn tleng thei a ni. Independence Day ni 15 hma in thla hniih awrh a awm a ni. Chumi chhunga kan in tih fel loh chuan khawi DC flag pawt pharhtu kha, a tu zawk nge lal zawk dawn? Entirnan Lunglei-ah chuan Hnahthial-ah flag lo pawt pharh dawn se tu jurisdiction-ah nge, tu nge lal zawk ang tihte kha ngaihtuah

hmasak hi a tulin ka hria a. Tin, Lunglei-ah Chief Minister zahawm tak kar hmasa maia a kal khan chanchinbu miten an lo zawt a. Chuta a chhanna chu district boundary chungchang hi chu mipuiten an duh danin kan kal ang a ti a ni. Mipuite duh danin kal dawn ta se, district lo piang tur hi fiamthu thawh nan miten kan hmang ang em le tih hi ngaihtuahna thui tak a awm a ni. Entirnan Block Development Officer, BDO area leh DC area-te kha mipuite duh dan a nih chuan a intiat thei a. District SP jurisdiction leh vawiina Officer-in-Charge, O/C Police jurisdiction-te kha te kha intiat thlapin a awm thei a ni.

Chuvangin Pu Speaker, vawiinah boundary felfai tak a awm hmaa he resolution a lawmna tur lo sawi hi chu a la hun lo deuh a ni ka ti a. Nakinah hun a lo kal ang a, district boundary leh a huam tur chin te felfai taka an tih fel hnuah, nakinah lawmpuina helai House bakah, a khaw mipuite nen pawh a lawmpuina turah chuan Zoram mipui pawhin an lawmpui ka ring. Mahse, tunah chuan he kan resolution hi han lawm em em na tur atan chuan lawmpuina tur em em a awm lo a ni tih kha ka rawn sawi ve a ni e. Ka lawm e.

**SPEAKER :** Pu B.D.Chakma hi party dang pakhat a ni ve tlat mai a, a lai taka kan lak a ngai si a, hun pe ang aw? BJP a ni si a, a nil dawn tlat mai. A reilo ang chu ti raw? Dr. B.D. Chakma.

**Pu B.D.CHAKMA :** Pu Speaker, ka lawm e. Tun tuma kan Speaker thar hi a strict deuh hlek a. Chuvangin Deputy Speaker awmlaiin thu hi ka sawi mai ang ka ti a. Hun min pek belh lo mai ang tih ka hlau a. A hmasain Aizawl North III bialtu MLA zahawm tak Pu C.Lalmuanpuia resolution “MNF sorkar-in kum 2008-a district thar 3 Khawzawl, Saitual leh Hnahthial District a hawn te kum 10 lai hlamchhiah an nih hnuah sorkar-in tihlawhtling tura chak taka hma a la hi lawmawm kan ti hle” tih ka support rual rualin thusawi tur hi tlem te ka nei a, suggestion ni pah fawmin.

District-ah hian financial involvement a awm ni. Mahse India ram, a bik takin North East lamah Mizoram hi district nei tlem ber kan ni a, district 8 chauh kan neih laiin tunah district 3 kan neih belh dawn a, a vaiin district 11 a ni dawn a ni. Member zahawm tak te thusawi atangin ka rilrua lo awm chu anmahni pawh hian district 3 aia tam hi an duh tho ka ring a. Chuvangin, ka duh danin district  $8+3=11$  bakah a dang neih belh thei ila tha ka ti a. A chhan chu district administration tha

taka a kal theih chuan sum pawh central atang pawhin hmuh theih dan a awm tho ka ring a. District a tlem chuan, Sub-Division leh Block a tlem chuan central lam dawr pawh a harsa ve a. ‘District 8 chauh in nei a, engah nge sum hetiang zat hi in mamawh’, min ti thei a. Chuvangin North East State dang anga keini pawh kan kal chuan a tlem berah Mizoramah district hi 15 tal chu nei thei ila. Tin, tunah Sub-Division hi 23 chauh a ni a, RD Block hi 26 chauh a ni. Chuvangin, RD Block pawh a tam thei ang ber, a tlem berah 50 tal te han awm thei se, Sub-Division pawh 30 tal awm thei se tha ka ti a. A chhan chu geographical area-ah Mizoram hi a buaithlak a, very difficult zone angin kan ngaihtuah a ngai. A bik takin Chawngte RD Block pawh BADP Scheme hlawhtlin lohna chhan chu monitoring & supervision a ni a, Chawngte RD Block huamchhung hi zau tak a ni a. Chuvangin Chawngte-ah pawh RD Block 2 tal, pakhat chu tunah proposal a awm in ka hria a. Kha kha tun sorkarah min tihhlawhtlin sak se a lawmawm hle ang. Hetianga RD Block leh Sub-Division leh district tam tak kan neih chuan sum pawh a lut tam ang a, central dawr pawh a nuam hle ang tih ka sawi duh a ni.

Tin, district a awm chuan employment opportunity pawh tam tak kan nei dawnin ka hria. MCS te pawh tunah lehkhathiam tam tak kan nei a, Mizorama nula leh tlangvalte chu lehkhathiam tak tak an ni a. MCS chhuak thar ho chu very smart an ni a, an thiam lutuk. Chuvangin RD Block pawh anmahni role, major role chu an play thei mai ang. Hetiang zelin kan annual budget hi cheng vaibelchhe singkhat sangkhat pawh a tlin loh laia district thar kan neih belh theih chuan sum lamah pawh central dawr thei tur chuan hma kan lo lakpui thei ang tih ka sawi duh a ni. A tawp ber atan Pu Speaker, i phalna leh House zahawm tak phalna-in proposed district thar 5 te hming chu ka’n tarlang nghe nghe ang e. Kamalanagar, Aizawl ‘E’, Aizawl ‘W’ (after burification of Aizawl district), Darlawn, Tlabung leh West Phaileng a ni e. Aizawl kha chu 2 ah, population leh khua hisapin kan kal ta a ni a, chuvangin Aizawl District pawh hi 2 ni loin Aizawl East leh Aizawl West, pahnih chu kan siam thei anga. Tin, khulamah Darlawn District pawh hi kan siam thei ang a. Hman atangin kan Minister zahawm tak, term hmasa ah pawh vawi tam tak a nawr tawh a, a khawngailthlak em mai. Long pending issue a ni a, ama biala district chu moral support chu kan nei a ni. Chuvangin tunah tih hlawting a ni tur hi a lawmawm ka khawp mai. Chuvangin hei Chawngte pawh hi, chumi hunlaia a rual a kan thehluh a ni a proposal hi emaw Chawngte emaw khatiang civil district in neih chuan

Autonomous District Council hun chhungah Lai leh Mara leh Chakma, an mahni bikah hian civil district pakhat tal chu awm thei se, mipui harsatna sut kian nan a tha thei mai ang ka ring. NREGA pawisa pawh direct benefit transfer avangin Chawngte lamah bank pahnih a awm a, Rural leh SBI an ni a, NREGA wise a lak laiin khang kha chu bank nge cinema hall tih kha hriat a har lutuk. Mi an tam lutuk a, thui tak an in line thin a ni si a. Chuvangin hetiang RD Block civil district a awm theih chuan a zia awm ang tih ka ring a. Chuvangin hei Chawngte, civil district pawh hi chimu rural chuan Lunglei hi district lian tak a ni a, hetah pawh Tlabung emaw Lungsen emaw ah civil district awm thei se.

Tin, Mamit pawh hi area zau tak a ni a, 3-na a ni a area wise ang a kan hisap dawn chuan, 3025 sq km a ni a chuvangin Mamit ah pawh West Phaileng district hi awm thei se. Khatiang zawng khan a tlem berah District 15 tal leh sub-division hi 30 tal leh block hi minimum 50 a awm theih chuan a tha mai ang ka ring. Hei chu flagship programme pawh NLUP leh SEDP hi a bik takin hei chu enge ni vote zawn na, enge ni, sustainable development atan chuan civil infrastructure hi kan siam that loh chuan a buai lutuk, hei chu angin a awm a ni mai. A pawp a nih chuan, nowhere a ni mai hetiang scheme hi, chuvangin permanent sustainable livelihood a nih chuan infrastructure development hi ngaihpawimawh a ni a. Kawng tha a nih a electric tha, tui connection tha a awm chuan mipui chuan mahni eizawnna tur chu an zawng mai ang. Chutiang zawng chuan sawi ve ka duh a ni, Pu Speaker, ka lawm e.

**SPEAKER** : Member zahawm tak Pu Lalduhoma, Serchhip bialtu i lo sawm ang.

**PU LALDUHOMA** : Pu Speaker, heng Khawzawl, Hnahthial leh Saitual a District Demand Committee te hian hun rei tak a sual in an sual a. Kan hnen ah te pawh an lo kala, an harsatnate kan hriat pui a, an rilru kum tam tak chhung a hah a, tunah a hlawhtlinna an han chang ta hi thinlung takin kan lawmpui a, lawmpuina ka hlan a ni.

Hemi hmu tur hian an tuar nasa hle a, Hnahthial lamah vuak an tuara damdawi in a lut te an awm a. Khawzawl khua a khaw pumpui sorkar-in a ensan tawh bawk a, khatiang an lo paltlang zawng te hriatpui tu kan ni a. A tawp a tawp-ah nghakhlel taka kum tam tak an nghah hnu ah an duh a taka a lo chang ta hi kan lawmpui takzet a ni. Tin, tun thum inthlan ah khan heng constituency a mipui te hian MLA a tlingte an vote chhan lian ber pakhat chu District kha a ni a. Mipui in

tuna rorel mek hi tha an bat tawh a, sorkar hian a rulh hi a a bat a ni a. Chuvangchuan mipui in an vote hmangin sorkar an rawn lawm tawh a, tunah hian kan sorkar in an sut ve leh a. Leiba tunah chuan an in rul tla a ni tih kha hria sela. Chumi hnu ah MP inthlan ah khan lawmthu an sawi tawh lehnghal bawk a, tun hnu zelah chuan bat an in tlak tawn a ni tih kha bial mipui te pawhin lo hre tawh selangin a tha in ka ring a.

Tin, District in tiām chungchangte, puan chungchangte puan a nih tawh hnu a bawhzui chungchang ah te hian kan hma a sorkarna lo chelh tawh tute kha tumah hi dem tur an awm in ka hre lo. Keini mithmuah chuan an demawm ve ve, an kal pui dan kha kan duh thu a sam lo ve ve a ni. Chuvangin, politics khelh nan leh eng emawa kan hmanga thil kan ti thina kha tawp tawh se tih pawh kha kan sawi duh a. tin, a boundary hi duh thu samah chuan tiām sa ni thei se a tha khawpin ka hria a. Tunah hi chuan technically-a kan tawng duh chuan District pakhat chhungah DC pahnih an awm dawn a ni.

S.P pahnih te an awm dawn a ni, boundary an neih miau loh avangin. Tin, a bial chhung khuate pawh khan tu zawk nge dawr tur kha an chiang mai dawn lo. Confusion nasa tak a awm dawn tih hi chiang sa a ni a, kan hmanhmawh deuh em aw? He'ng hi chu tih fel nise tih kha ka rilruah a awm a. Tin, kan CM zahawm tak sawi dan khan mipuite duhthlanna a ni dawn a, beh leh beh loh chungchang kha. Khatiang a nih chuan, ka rin danin MLA bial te pawh hi a then lehlam ah a bet ang a, a then lehlamah a awm ang a, MLA-te hian DC pahnih, BDO pahnih kan dawr kawp a ngai ang a, min dawr kawp a ngai ang a. Chutiangin SDO-te, BDO-te, SDPO-te leh District Official-ho khanin pu 2 hi an hrawn nawlh mai dawn a ni.

Tin, District Level Committee te a lo tam a, MLA-te kan tel a lo ngai a, khalaiah khan kan constituency kha district pakhat aia tama a lo awm chuan tel hman loh changte kan ngah dawn a, buaithlak hi a tam thei viau mai dawn a. Chuvangin, a boundary hi chu fel rang thei sela tunah a la fel lo a nih pawhin a rang thei ang bera tihfel hi chu a tha ka ti.

Tin, Pu Speaker, tun hnuah district hi a nawra nawr emaw vote zawnna zawng emawa hman zui toh loh hi ka duh hle mai a. Mithiamte, a ngaihtuahtu tur din mai ila, chu chuan tha takin a population-te, area-te, topography-te, communication-te thlirin kan mamawhna hmunah, tul an tihna hmunah dah sela.

Sorkar-in tul a tihna hmuna a dah tur a ni a, a ngen a ngena, a nawra nawr tur pawh hi a ni chiah lo a ni. Kan kal dan hi a fuh lo a ni. Chutianga a bul atanga lo tih chu ni se, tuna kan district hi tuna a awm ang hi a nih ka ring miah lo a ni.

Chuvangin, hun lo kal zel turah chuan chutiang rilru chu pu tlang thei ila a lawmawm hle in ka'n ring a. Tin, sum, tuna kan budget, kan pass tura awm zat kan hria a, nuai 500 diat diat in an chang dawn a ni a. Hei hi chu DC leh SP Office ringawt kan sawi a, Department 40 bawr vel kan nei a, kha department tinah khan District Office an neih kim vek a ngai a ni. Tunah keinni Serchhip bial Chief Minister in reitak a lo bialna-ah pawh District Office kan la nei kim lo a ni a. Khang zawng zawng han bun tur chuan driver a ngai a, office building a ngai a, quarter a ngai a, stationery, khang zawng zawng a ngai a, hmabak hi a la ko hle mai a. Hei hian a daih dawn lo tih chu a chiang sa a ni.

Tin, kan budget kalphung pangngai kan en chuan, nakum budget-a touch devolution atanga kan dawn tur zat pawh a in ziak sa vek a, 14<sup>th</sup> Finance Commission-ah khan. Khata tang ringawt kha chuan heng hi kan tlin dawn lo tih hi a chiang a, a huphurhawm viau a. Ka ngaihtuah lai la lain kan House Leader zahawm takin kan budget hi chu a chi tur vek a ni e a tih avang khan ka'n thlamuang ve ngawt a. Central-a an dah dan te min hrilh a, tuizem lianah khawhlut pur pur a, lehlama liam zawih zawih, duhtawka thal mai tur tih kha kan in zirtir dan a nih avangin lo thlaphang lo phawt ila, bial mipuite pawhin beiseina sangtak nen lo thlir se ka'n ti a ni.

Tin, District Headquarter nih avanga eng emawni ta mai tura mipuiin kan in ngai hi, hemi kan impression hi sawh sawm deuh a ngai ka ti a Khawpui kan nih hian kan per capita income kha kan mimal-ah khan a rawn sang ngawt lo, khawpuia awm avanga changkang ngawt tur ni se, Aizawl-ah pem khawm mai tur a ni a, Delhi-ah pem mai tur a ni a, mahse khang khawpui lianah khan puh tur an tam ting ang. Kan retheihna kha a bo chuang reng reng lo a ni. Chuvangin, District Headquarter han tih hi a pawimawh rual rualin kan ngaihtuah tur pawimawh zawk chu kan thalai, tuna hna hmu lo tam takte, kan kuthnathawktute, beidawng mek te, heng chhanchhuah zawk hi a la pawimawh a. Chumi atan chuan District Headquarter ai chuan RD-Block neih belhte hi kei chuan a letin ka ngai pawimawh zawk a ni. Hei hi mipui tan a pawimawh hle a ni.

Tin, Pu Speaker, kan resolution hi a bul wording hi ‘MNF sorkar-in’ tih atangin a in tan a, hei hi a lungchhiatthlak ka ti a. Mizoram sorkar emaw kan neih kan tih laia MNF sorkar, MNF siam, MNF tan a nihna kha kan resolution hian a rawn tichiang hle in ka hria a. A bul in tanna ‘MNF sorkar-in’ tih hi kan ram dinhmun, tuna kan tawng mek tidiktu chu a ni lawi bawk si a. Hun kal tawh zawng zawngah vawiin thleng hian kan sorkar neih thin hi party sorkar a ni, mipui sorkar kan la nei ngai lo. Kan sorkar, Mizoram sorkar ti pawhin kan ko thei lo a, Congress sorkar, MNF sorkar kan ti bawl bawl mai a ni. Eng vang nge kan tih chuan, ruling party-in hleih nei takin an party tan ro an rel thin vang a ni a. Sem policy-te kan hria a, dawng ve tur chuan mahni awmna chhuah sana, chu pawl-ah chuan ruling-ah chuan va inpek te a ngai a. Mahni zahawmna leh duhthlanna pawh hmang hleithei lo in party sorkar hian min hrut a, contract-te pawh chu vek chuan a ni a.

Tunah te pawh in cancel sak te pawh a awm nawk nawk a, kan hria a. Tin, Aganwadi building committee-in a lo sakte pawh tunah ruling party in an chhuhsak leh mek tih te pawh kan hria a ni. Chu chu party sorkar zia a ni. Hei hi a khamawm tawh em em a ni. Hna lak chungchangah pawh chu vek chu a ni a. Zirtirtu atan kan fate zirtirtu atana kan duh loh an la a, police atan min vengtu atana kan duh loh an la a, kan ram hi kan tichhe tual tual a, chung a bo theih nan chuan MPSC kan han din ve a, a tirah 5 % hna an han la thei a. A lo rei deuha 20% kan tia, chu pawh chu kan phal lo, kan chhuhsak kan chhuhsak leh a.

1993 ah khan high school zirtirtu 78 lak tur a ni a. Sorkar in MPSC thuneihna a chhuhsak a, aman a la a. 1998 ah HSSLC zirtirtu tur lak a ni leh dawn a, MPSC kutah kan dah phal lo, kan chhuhsak leh a. Chutiang chuan vawi 6 lai kan ti tawh a. Limitations of functions kan tih hi ennawnsak an ni thin a. Khangah khan MZP te pawhin kawng te an lo zawh tawh a. Exam turte pawh an lo dang hial tawh a ni. Chutiang khawp chuan mipui sorkar ni lo kan sorkar tia kan koh theih loh, Mizoram sorkar tia kan koh theih loh, vawiina kan Resolution pawh MNF sorkar-in tia bul tanna hi, hei zawng zawng hi a hrin chhuah a ni a. A pawi em em a ni.

Hei tunah zirtirtu kan han la leh dawn a, cabinet meeting meuhvin dan dinglai an relax a, an tidanglam a, an tum chu a lang reng, engang pawhin lo sawi se, nimirah pawh MZP hruaitu lo ni tawh thin Minister ngei pawhin assuarance a pe thei miah lo a ni, kan Houseah hian, chu chu a ni tlat a ni. Chu chu enge tunah hian

kan sorkar hian a tih leh tak kan tih chuan Mizoram Subordinate Service Selection Board din tumin MPSC thuneihna kan chhuhsak leh dawn mek a ni tunah hian. MSUte press release te kha kan chhiar em ? Kawng te an zawh dawn nge dawn lote kan hria em ? Kan zirlaite rilru hi kan tibuai a, party sorkar avang hianin hna lo awm reng reng turah kan mi leh sate than kan tum tlat avang hian sorkar efficiency a tlakhniam leh tur pawh pawi ti miah loa kan khawsak thin avang hian kan zirlaite rilru kan tina a, kan tichhe mek a ni. Examnaa tihthat in awmzia a nei tawh lo a, ka pa Block President a nih leh nih lohin awmzia a neih zawk fo na sorkar ah hian lehkha zir taihmak pawh hi a tuiawm tawh loh a ni. Chu chu a lo nih tak avangin MPSC hi an indaih love kan ti a nih chuan hman atanga kan hriat tawh hnu a ni a, tihlen mai tur alawm.

Tunah a aia hautak daih tur, Service Board han siam leh tum te hi miin mahni duhzawng lak tumna thinlung atanga lo chhuak niin an ngai lo thei lova. Chu chu a hautak dawn em em bawk a, sum leh paiah hian. Chutiang chu vawiina kan kalphung a nih avang hian vawiina kan Resolution hi district hrim hrima kan lawmpui rualin a thu lo intanna, MNF sorkar-in tih a nih chhung hi chuan kan hnam hi a dam lovang.

Chuvang chuan ZPM chuan mipui sorkar siam kan tum a, a kalphung thlakthleng a, mipui sorkar kan tih theih tur siam kan duh a, kan Resolution reng rengah pawh Mizoram sorkar-in, kan sorkar-in tia bul tan theih a nihna tur hi keini hi chuan kan la bei fan fan a, Pathian zarah kan la hlawhtling ang tih pawh hi kan ring tawp a, eng pawh nise he Resolution hrim hrimah hi chuan kan thlawp e, ka lawm e.

**SPEAKER :** Hun a hmang dik khawp mai, minute 15 kha a ni ka pek kha a nia. Awle, kan sawihona chu kan duh tawk ang a, hei Minister incharge-in sorkar-in a kalpui dante kan sawi ang a, kan hriat angin kan Chief Minister zahawm tak kha NITI Aayog ah khan meetingin Delhiah a kal a. Pu Dr R.Lalthangliana, Minister zahawm tak hnenah charge a hlan a. Tunah Minister, House Leader ni rih bawk I lo sawm ang.

**Dr. R.LALTHANGLIANA, MINISTER :** Pu Speaker, ka lawm e. Hei kan Chief Minister, tuna kan ngaihthlak ang khan Delhi lamah loh theih lohin a kal a ngai a, chuvang chuan ka rawn ding a ni. A hmasa berin, hei kan Resolution hi nia, a

tha khawp in ka hria a. Amaherawhchu a thu leh eng emaw fel tawk lo deuh hlek a awm a nih pawhin a thu kena kha kan chiang maiin ka hria a. Subject tak kal chiah lo te pawh tlema han persante pawh kan han ngaihthlak nawk nawk te pawh kha kawng lehlamah chuan a leng vekah ngai ta ila. Amaherawhchu, kan tum ber laia erawh chu helaia district 3 lo piang mai tur chungchanga sorkar hmalakna kan hriat tawh chinah lawmthu sawi hi a tulin kan member zahawm tak Pu Lalmuanpuia hianin a hria a, private members Resolution angin a rawn pu lut a.

A hmasa berin hei kan Chief Minister a awm lova, a aiawh ang deuh han sawi tur ka nih rualin he district thar lo piang tura hi ka bial a lo ni a. Tin, hei kan Deputy Chief Minister zahawm tak Pu Tawna bial a lo ni bawk a. Ani Delhi-ah a awm a, hmanni lawkah ka tlawh a. Ani pawh hian a vei hle mai a. Tin, hei Pu Zira a lo ni leh bawk a, a bik takin district thar lo pianchhuahna tur bial mipuite hmingte leh kan 3 hmingte pawhin kan sorkar ah hian lawmthu kan sawi ve hrim hrim duh a ni.

Tin, chumi rual chuan hei kan official-te an che tha ka ti a, kan Chief Secretary te, Finance lam te, DP&AR lamte leh tin, Legislator ang pawha min support-tute in thusawi atang khanin kan ngaithla a. A lawmawm ka ti em em mai a, chuvangchuan, vawiin niah hian lawmthu kan sawi hmasa duh a ni.

MNF hian nia hei sorkar-na kan han siam a, nia mipui sorkar a ni a, hmun tam takah chumite kaihruai sorkar tihte chu a ri lo thei lo a. Amarawhchu, mipui sorkar a ni tih hi kan hriatreng kha ka duh a. Chuan, rilru thil dang daih min rawn khawihtu awm pakhat chu khatia inthlan kan han zo chiah December ni 15 niin ka hria a, cabinet lakluh kan nih ni kha khami hnu lawk khan Krismas vuakvet a lo ni a. Hnathawhna hun tak tak a awmlo a, kan zi mur mur a. Kan kutpu ti mai ila, te a lo ni a. January thla kan han kai a, cabinet meeting CM-in an ko va, agenda tur kha a sawilawk mang bawk si lo a. Kan tih hmasak ber tur chu a ti a Mizoram-a zu zawrh chungchanga hi heliaih hian ngaihtuahna kan sen a ngai a ni a ti a. Khami ni la la khan thil kha kan han titlang tawp mai a Pu Speaker, ka rilru hian kan kaldan tur hi rinai chuan kan che chak deuh dawn em mawni chu aw tih kha ka ngaihtuah a, a lawmawm ka ti ang reng a.

Tin, 1998-a MNF kan han sorkar khan, kan sorkar hma khanin .....

**SPEAKER :** Ngawirawh aw, kan hun pangngai ang kha a tawp a. Hei, kan bawhpel ang a, kan zo law law dawn em? House kan rawn e.

**Dr. R. LALTHANGLIANA, MINISTER :** Khatia kan han sorkar khanin, sorkar kalchhuak chiah Congress sorkar khan district 5 kha a puang a, July thla bawr vel kha a ni a. A tawp dawn tep ah a puang kha a ni a. MNF khan district 3 awm mek atang khan Congress sorkar ina district 5 an puan kha theihtawp kan chhuah a, term 2 kan sorkar a, 1998 atanga 1993 inkar khan fufe kim fel takin kan tifel deuh duak ve hman tlat mai a. Chuan district 3 ni thin kha 8, ni lo 1998-a kan sorkar kha a ni a ka sawi. A ni maw, kan sawisual a nih chuan min lo hrethiam ula, 1998 maw, khami kan sorkar tawp dawna puan kha a ni a. Chuan 1998-a kan sorkar khan hnaah kan neih nghal chawt a, 8 kha tikhanin kum5 chhung khanin rinai khan kan dinfel titih ve deuh tlat mai a.

Ti hian ka ngaihtuah a, district 3 rei taka lo awm tawh kha district 8-a han tihlawhtlingtu kha Pu Zoramthanga kaihhruai sorkar kha kan lo ni reng a. Tun tumah hian district 3 2008 September-a notification chhuak, kum 10 engmah ti mumal loa liam ta, tunah thla 6 emaw lek sorkar hnua budget lehkhabu-a nimin mai ni lo, March thla kumina lo lang ta mai district kan neihna tura kha kan ngaihtuah thin a, 3 kan han neih belh leh ang a, tizawng hian kan sawi ang a. District 11 kan neih turah hian MNF hunlai hian district 8 kha kan function tir dawn tlat mai.

District lampang hi kan kut hmuina lam a ni awm mang e aw ka ti a. Kan Chief Minister pawh hi vawiin niah hian a fakawm thlawtin ka hria a. Thil hi an ti pawp mai a, chutih mek lai chuan nia...sorkar nih takah chuan a hmasa kalchhuak taten thil hnutchhiah pawimawh tak tak duh anga an tih hman loh entirnan Medical College te Falkawn ah an lo din a. August thla maia din a nih chuan tihtur kha ala tam tur zia kha Health Minister ka nihna ang chuanin a huphurhawm a ni. Chutih lain kum nga (5) chhung Medical Council of India in MBBS zirna tur atan hianin a tling chho zel dawn em tih a rawn inspect reng lai a lo ni bawk si a. Ka ngaihtuah a nimin chu, a huphurhawm a ni.

Mahsela thil tha a ni a, sorkar hmasa in a tih tawh thil tha hi chu engti kawng zawng pawhin kan Chief Minister hianin chhunzawm hi a tum em em mai a. Hei kan han bei ta tak tak mai a. Hei hi ka sawi duh hrim hrim a. Chuvang chuan hmannia Medical Council of India in-a Delhi a kan Secretary te leh Director te an kothhlak

tum ah pawh thil lawmawm tak kan sawi duh lawk chu, hmingthlak tih vel hian engmah min tibuai lo. Amaherawhchu, a pawimawh zawk chu teaching faculty engzat nge in neih, kan teh fung in tling em? non-teaching faculty engzat nge in neih, tih kha min lo teh fung ber a nia. Thil mak deuh chu, hmanni a, thla hmasa mai a an zuk kal khan, kan deficiency an tia, an tawngkam han hmang ta ila. Kan tlin lohna 100% chu a har lutuk, August maia din kha a ni, mahse 20%-in drastically-in kan zuk tihniam tawh a ni. Chuvang chuan October thla pawh hian eng emaw chen hmasawnna kan neih ka ring a. Kan sawi duh lai tak chu, kan Chief Minister ka fakna em em chu Sorkar hmasain thil tha tura a ngaih hi a ti tlat zel a ni tih hi, vawinniah hian ka sawi duh a ni. Chuvang chuan thil tam tak, hei rei lote Sorkarna kan han lak chhung hian kan ti pawp pawp mai a, a fuh lo ang tihte chu a chang chuan ka hlau, mahse mipui chu an lawm viau a. Assam rifle chhuak tur tih ang chi te pawh kha, ka rin aia ranga chhuak tur deuh khan thil kha a kal mai a, amaherawhchu an la inpaih chiah lo chu a nia. Eng pawh chu ni se la, lehkhana han nei thei mai te, tin, SEDP kan flagship programme pawh dik tak chuan 2008-a kan Sorkar tlak dawn a Sorkar thar, min rawn thlaktute kha chuan an rawn Sorkar khan kum 2 vel chhung kha chu NLUP budget-ah khan an dah hlei thei mang reng reng lo. Keini erawh chu nimin piah maiah kan Chief Minister-in a speech-a chiang tak a a rawn tarlan chu, heti zat hi kan dah a ni tih kha a rawn tarlang tlat mai a ni. Chuvang chuan hei kan District chungchangah pawh hian hahdam deuh hlekin awm i la ka duh ve tlat a ni. He laia budget-a lo lang hi chu ₹ 450 lakh district khat a tan ₹ 150 a ni mai thei. Amaherawhchu, a piah lamah hian nichin a kan ngaihthlak ang khan district thar tihchangtlun nan hrim hrim khami piah lamah ₹ 855 lakh min han dah hran sak hlauh te.

Tin, kawngchhe han siamna tur a tan te hian kan CM, kan Finance Minister hianin ₹ 414,000 min han dahsak a, dik tak chuan kan han hria a, nikum lampanga kawng chhiatzia kan hria a. Enga tinge a chhiat tih zawhna tam tak a awm a, a chhiatna chhan ber chu sum a awm lo a ni. Mahse sum kha kan ngaihtuah hman bik miah lo, January thla atangin kan buntir tawp a, Mizoram kawng a danglam vek. Sum awm lo in tih in tih thin a kha. Chuvang chuan a sum a chu a khawia pawh nisela, a tul kan tihnaah kan hmang a. Tunah chuan Pu Speaker, Lunglei leh Aizawl inkar darkar 7-8 a Sorkar hmasak hun laia kal kha, tunah chuan dar kar 4 leh a

chanve ah kan thleng tlat tawh a ni. Chuvang chuan eng emaw tak hi chuan kan sorkar, vawinnia kan neih meka hian lifetime vehicle tax kan han tih tawp tur te.

Tin, Mizoram Sorkar hnathawk la hriat loh MR hlawh kan han tih pun te, thil tam tak kha vawinniah hianin, rei lote chhung hian kan Chief Minister zahawm tak hma laknaah hianin hmuh tur an awm a. Chuvang chuan he district thar kan dinna turah pawh hian, tihian kan sawi ang a, hmanni lawkah 15<sup>th</sup> Finance Commission, Delhi atangin an lo kal a, keiniho chuan kan hmu thei lo a. Amaherawhchu, thil kan lo tih chu, kan Opposition lampang hruaitu Pu Duha te bial pawh kha kan tel vek a nia. District hospital changtlunna tur atan khan Kolasib-te pawh a tel vek, vaibelchhe 10 aia tlem lo kha kan dah vek a ni. Min pe dawn em, tih erawh chu kawng dang a ni. Chuvang chuan min pek ngei pawh kan beisei a. Chuan hei district thar 3 lo piang tur Khawzawl, Saitual leh Hnahthial tur a tan te pawh hian vaibelchhe 12 aia tlem lo kan lo dah lawk vek. Chuvang chuan khati zawng khan a DC leh SP leh Treasury te leh Judicial lampang, a tir lama han tih ngai ang chi atan, a tlem a zawng an han dah lailawkah khan ngai ta i la. Chuvang chuan Pathian leh mipui zarah kan Sorkar hian kan function tir thei ngei dawn ni hian ka hria a, a lawmawm em em a ni.

Tin, hemi piah lamah ka han sawi duh chu kan Minister te ka fak em em a, lehkha te kan han siam a, a bik takin kan Deptt. chanah he district thar 3 te lo piang turah hian, kan Opposition Group Leader Pu Duhoma sawi ang deuh khan, hetah a district office neuh neuh tur Horticulture, Agriculture, LAD tihte leh eng eng emaw kan neih turah khan, hma min lakpui ula, rilru nei takin district hi min thuampui rawh u kan han ti ta a, a sawt khawp mai a. A hlawhtlinna kuminah ngei pawh hian kan Minister thenkhat phei chuanin heng district tharah hian hmalakna thar in rawn nei dawn tih te kan han hria a. Food & Civil Supply Minister pawhin nichinah, “Session zawh veleh ka phei ang” a tiin ka hria a, a lawmawm khawp mai. Chuvang chuan hmanniah keini bial angah pawh Hnahthial ah chuan hmunhma eng emawzat ka tlawh a, District Head ti mai ang, kan han tihna tura hi ram lei ngai vak lo hian kan lo nei deuh vek a ni. Chuvang chuan Pu Speaker, a hahthlak zawng kha han ngaihtuah lo i la, kha ti zawnga kan tan tlan vek chuan he district 3 hi chu phuisui takin kum 5 a ral hi chuanin tifel hman tura beisei a ni.

Tin, hei DP& AR lam te pawhin DC pathum awm tur atan post creation te, Additional DC pathum, SDO Sadar pathum, Election Officer pathum tih neuh neuh, a vai hian GAD-in ruahmanna an han siam post 53-te pawh hi rei lo te chhung hian min clear turah kan ngai a. Chuvang chuan sorkar-in a commitment a nih avang hian a hlawhtling ang tih kan beisei a, amaherawhchu DC building an luah tur te tun atanga sak kan tum chho a, kha kher kher kan nghak dawn a nih chuan a rei ang. Amaherawhchu tun maiah chuan in luah tur te pawh kan han hmu chho tan dawn a, a tak ramin vawiinah hian district hi kan nei thei ngei dawn a ni tih hi ring ng het tlang ta i la a tha in ka ring a ni.

India ram state thenkhatah chuan district hi a lo tam viau an tia a dik viau a. Chu bakah RD Block, Dr. B.D. Chakma sawi kha a dik viau a, development kan kalpui dawn tak tak chuan decentralization hi a pawimawh a ni. Example-ah ka'n sawi lawk ang a, Lunglei District hi term engemaw zat kan lo tlin ve na a ni bawk a. Ka ngaihtuah ka ngaihtuah a, Mizorama district-ah hian a ber a, MLA constituency 7 a awm a, khutah Chawngte lam atangin Tlabung, Demagiri atangin khitah Thingsai-ah, S. Vanlaiphai, Muallianpui nena han ti tur chuan kal ngaihna kha a awm tawh lo hrim hrim a, a fel lova ni. Chuvang chuan vawiinniah hian ruahmanna sorkar-in kan han nei thei tur hi min chhawk dawn khawpin ka ring a. Kan sawi hona atanga kan duh thawh em em thil pakhat kan rawn tarlan kha a awm a, chu chu a boundary, a ramri tih chungchang kha a ni. Ngaihtuahna nei mang lo khan min ngai ang tih kha ka hlau deuh va, ngaihtuahna thui tak helaiah hian kan Chief Minister hian min neihpui tawh a ni tih hi ka sawi duh a. Chuvang chuan kan hun hun tur angah hi chuan ngaihtuahna, sorkar angin kan inpeih fel hman turah kan beisei a ni.

Hei district panga kan implement lai khan ka rilruah ka huphurh em em, mahse Govt. of India kha dawr an nuam em em khatih hun lai khan, enge an an zel dawn chu ka hrelo a. Champhai leh Kolasib-ah te, Mamit-ah te, Serchhip-ah, hetah Lawnglai-ah district thar a awm a, heta tan hian DIET, zirtirtu training-na tur pakhat theuh kan mamawh. Minister ka nih lai khan ka zu kal a, ka zuk thlen a. ‘E!’ an tia, awlsam deuh khan min pe a ni. District alo nih chuan DRDA kha a ngai tlat, heta district dang kha a tawm theih tawh si lova, kan han dil a, awlsan ang reng deuh khan min pe leh mai a.

Tin, DRDA te alo awm tawh kha chuan DRDA pakhat hnuia BDA pakhat ringawt mai a mal khalh kha a lo rem lova. Chuvang chuan B.D. Chakma sawi pawh kha maw, RD Block dang kha a la keng dawn a ni. Tin, kan district headquarters neihna tur hmun Hnahthial a ni emaw, Saitual a ni emaw, Khawzawl emaw ringawt, khami khua ringawt ni lovin, khami district-in a huam khuaah khan development lo kal hlei thei tawh lo khaw tam tak, engemaw circle office kan tih ang chi te eng engemaw kha a awm a ni. Tuanah pawh hian kan bial S.Tuipui-ah chuan tam tak a awm a ni. Khang kha tih nun lehna tur atan remchang a ni dawn a ni.

Chuvang chuan development hnuk hi district thar kan neih tur hian a keng a ni tih hi vawiinni hian kan hriat a pawimawhin ka hria a, chung chu tawi te te in ka'n tarlang duh a ni. Chuvang chuan vawiinni a kan resolution sawitu zawng zawng te khan a ni lo zawng leh, a engemaw, a against zawng khan kan sawi lova a lawmawm ka ti khawp mai a, chutih mek lai chuan kan duhthawh thilah a ramri tih chungchang vel kan han sawi pawh kha, khang zawng zawng hria a kan Chief Minister zahawmtak hian budget-ah te a rawn dah a, ruahmannna ama chan GAD hnuia awm kan nihna anga rawn ti a ni tih kha hre ta i la a tha awm e. Chuvang chuan kan zavai hian lungrual takin he kan private member resolution, kan member zahawmtak Pu C. Lalmuanpuia put luh hi pass thei i la tih kha ka duh khawp mai, ka lawm e.

**SPEAKER** : Le, tunah chuan resolution neitu, a puluttu Pu. C. Lalmuanpuia kan sawm ang a, han wind up sela, adopt rawn dil nghal bawk se, i lo sawm ang.

**PU C. LALMUANPUIA** : Pu Speaker, ka lawm e. vawiinah private member resolution pawimawh tak mai ka put luh te, member zahawm tak tak ten min hlutpui hlein ka hria a, an chungah lawmthu ka sai tak meuh meuh a ni. ‘MNF sorkar-in kum 2008-a district thar pathum, Khawzawl, Saitual leh Hnahthial district a hawn te kum sawm lai hlamchhiah a nih hnuah sorkar-in tihlawhtling tura chak taka hma a la hi lawmawm kan ti hle,’ tih hi he House zahawm taka member zahawm tak tak ten kan hlut thiam a, a nilo zawng leh a kakh zawng leh a nilo lam zawnga min hersak lova, min thlawpna in lan tir thliai thliai ka hmuh hian lawmawm ka ti tak zet zet a, in chungah lawmthu ka sawi tak meuh meuh a ni. State in hma a sawn tak tak dawn chuan, a kailawn rahbi pawimawh tak mai pakhat chu

district a ni tih he House-a member zahawm tak ten an han sawi khan a tilang chiang hle-in ka hria a. Tin, State dang dinhmunte kan han khaikhin a, a bik takin North East State-te kan han en phei chuan Mizoram chu district kan mamawh zia a lang chiangin ka hria a. Vawiin-a a tak tak a, Khawzawl, Hnahthial leh Saitual District lo piang tihlawhtling tura kal mek hi member ten thinlung takin kan lawmpui tak zet zet niin a lang a, a lawmawm ka ti tak zet zet a ni. Chuvang chuan, Pu Speaker, kan Chief Minister zahawm tak Pu Zoramthanga kaihhruai, he Sorkar kal mek hian district pathum tihhlawhtlinna implementation-a chak taka hma a la mek hi a lawmawm em em a. Heng district pathum huamchhunga awm tur mipuite pawh an lawm em em a ni. Hun kan hman pelh hret tawh avangin Pu Speaker, a tawi zawngin ka sawi tawh mai ang a.

Chuvangin, vawiinah hian he House zahawm tak hian ka ‘Private Resolution’ hi lawm taka min pass pui turin ka sawm che u a ni e. Ka lawm e.

**S P E A K E R :** ‘Resolution’ neitu-in adopt a rawn dil a, kan buk ang a. “MNF Sorkar-in kum 2008-a district thar pathum Khawzawl, Saitual leh Hnahthial District-te kum 10 lai hlamchhiah a nih hnu-ah Sorkar-in tihlawhtling tura chak taka hma a la hi a lawmawm kan ti hle” tih hi adopt remti apiangin ‘rem ti’ ti rawh u le. (‘rem ti’) Rem ti lo in awm chuan, ‘rem ti lo’ ti u la.

Aw le, tunah chuan rem ti lo ti an awm lo va. Member zahawm tak Pu C. Lalmuanpuia ‘Resolution’ “MNF Sorkar-in kum 2008-a district thar pathum Khawzawl, Saitual leh Hnahthial District-te kum 10 lai hlamchhiah a nih hnu-ah Sorkar-in tihlawhtling tura chak taka hma a la hi a lawmawm kan ti hle” tih chu House-in a adopt ta a ni.

**Pu C. LALMUANPUIA :** Pu Speaker, ka lawm e.

**SPEAKER :** Aw le, vawiin-a kan Business chu kan zo leh ta a. Pathianni thleng kan chawl ang a, Thawhtanni zing dar 10:30 AM-ah kan Session kan tan leh dawn nia.

Sitting is adjourned. 4 : 27 P.M.